

MATYU

JISASNA NGWAK WALANGA TAMBA JISASNA YELANGIMBA LA NIMBA

1 ¹Jisas Kraistna yelangimba la nimba kindi kiyandi. Jisasna yelangina njambwi nyan Devit. Devitna ngwak tamba la nyan Ebrahim. ²Ebrahimna nyan Aisak. Aisakna nyan Jekop. Jekopna nyan Judo ndina yakwa nimbonala. ³Judana nyan Peresogwi Saro. Mbila nyimena si Tema. Peresna nyan Hesron. Hesrona nyan Ram. ⁴Ramna nyan Aminadap. Aminadapna nyan Nason. Nasona nyan Salmon. ⁵Salmona nyan Boas. Boasna nyimena si Rehap. Boasna nyan Obet. Obetna nyimena si Rut. Obetna nyan Jesi. ⁶Jesina nyan Devit. Devitna tamba la nyambwi kinga. Devitna nyan Solomon. Solomona nyime tat nat nyan kla lat taagwat. Li kat tat kla la nyan si Yuraia. ⁷Solomona nyan Riaboam. Riaboamna nyan Abaisa. Abaisana nyan Esa. ⁸Esana nyan Jihosafat. Jihosafatna nyan Joram. Joramna nyan Asaia. ⁹Asaiana nyan Jotam. Jotamna nyan Ehas. Ehasna nyan Hesekaia. ¹⁰Hesekaiana nyan Manasa. Manasana nyan Emos. Emosna nyan Josaia. ¹¹Josaiana nyan Jekonaio ndina yakwa nimbonala. Josaia ta njimbla Juda walinja nimba kat kandi kwutaa Babilonat kalindi. ¹²Kandi kwutaa kalindi maa Jekonaia nyan njandi. Ndina nyana si Sialtiel. Sialtielna nyan Serababel. ¹³Serababelna nyan Abaiat. Abaiatna nyan Elaiakim. Elaiakimna nyan Eso. ¹⁴Esona nyan Sedok. Sedokna nyan Ekim. Ekimna nyan Elaiat. ¹⁵Elaiatna nyan Eliesa. Eliesana nyan Matan. Matana nyan Jekop. ¹⁶Jokopna nyan Josep. Josep ndi Mariana lana. Maria li Jisasna nyimeak. Jisas Juda kat kwunapmak kat Juda kawiga linja nyana. Ndi ndina Kraistna.

¹⁷Devitna yelangimba la nimba ndina ngwak walanga taamba vili kiyeli aynat mbaapmamba la niimba ndi. Taamba vili kiyeli aynat wan nyan Ebrahim. Isrel kat kandi kwutaa Babilonat kalinja njimbla ta nimbana yelangi nimba ndina ngwak walanga taamba vili kiyeli aynat mbaapmamba la nimba ndi. Taamba vili kiyeli aynat wan nyan Devit. Kraistna yelangimba la nimba ndina ngwak walanga taamba vili kiyeli aynat mbaapmamba la nimba ndi. Taamba vili kiyeli anyat wan nyan kandi kwutaa kalinja njimbla ta nyana.

MARIA JISAS KRAIST KAT KWUTA VAT

¹⁸ Maria Jisas Kraist kat kwukna vak kingiyen. Josep ngangitnya mina kwutndi, kwo yetili. Lila ngway ana tologa yetindi. Godna waagqan lila yapmba nondanyan kwutnjan ngwandindi maa nyan tili. ¹⁹ Josep li kat klandangat kwusisivanja nyan apma nyan tagula nyana. Nyan tila vak kat vilaa nat nimba kat mbupmak kat kai waa makasigit yetindi. Kat kiya waweyan Maria wutaa wup yigiyali waa yelavika yetindi. Wupma yivak kat kai waa yelavika yetindi. ²⁰ Maawupmba yelavika yetiga sindu kwandi, njambwi nyana ensel simapmba ndi kat yaa wandi. “Josep min Devitna yelangi nayan min. Maria kat klavak kat ke kai waga. Lila yapmba liga nondanyan nat nduna nyan ana ndi. Godna waagan kwutnjangwanda nyana tiga. ²¹ Nondanyan kwuti maa ndina si Jisas waigamin. Ndina mbaapmamba liga nimba yilinja kavle vak kat silimbwigiyandi. Ngi kat tiga ndina si Jisas waigamin” waa wandi Ensel.

²²⁻²³ God tamba la profet kat wandi maa Maria Jisas kat kwuta vak lavu nyingamba piliwutndi.

Mat mwunya wiya nyan ngini nondayan kwukiyalw.

Wan nyana si Emanyuel. Wan sina angwa kingiyen.

God ninogwinala ligandi,

waa tamba piliwutndi. Kan vak Maria Jisas kat kwutaa vak tamba profet piliwukna vak vla tindi. ²⁴ Josep simak valaa laatndi. Simak vilaa laataa Maria kat kai walinda vak kat kwagalalaa li kat klandi. ²⁵ Ana li kat nyway tologa yetindi. Kwo liga nyan tiga nyan kwuti. Kwuti maa Josep ndina si Jisas waa wandi.

NYA WOKE LA KAYAMBA NAMBUO LA NIMBA JISAS KAT VIVAT YANDI

2 ¹ Maria Betlehem walinja ngepmamba tiga Jisas kat kwuti. Judia walinja kipmamba la ngepma Betlehem. Ndi kat kwuta njimbla ndina King Herot ta njimbla. Samat tiga nya woke la kavamba la nambu la nimba singwut wogwela lindi, vigiva Jerusalem yandi. ² Yalaa wagalandi. Juda kat kat njuambwi nyan tivat ya mat nyan andamba ligandi. Nya woke liga kavamba la nimba nin. Ndini si kwutaa katsovak yanin waa wandi. ³ King Herot wanja vak kat wutaa ngipaliga ndandi. Jerusalem la nat nima sakwat nimba wan nyaangit wutaa ngipaliga ndandi. ⁴ Ngi kat tiga Herot wandi maa God kat kwunata njambwi nimbagwi Moses kwiya nyaangit simogwi la nimbo kita yisolaa lindi maa Herot ndi kat wagalandi. Juda kat kwunapmak yaiga nyan ndina Kraist anda ngepmamba yalaa liga laakiyandi waa ndi kat wagalandi. ⁵ Wagalandi maa ngepmamba yalaa liga laakiyandi waa tamba la profet waga ⁶⁻⁷ God wandi maa tamba piliwutnda lavu nyinga kwutaa viga mbutndi

Juda walina kipmamba la Betlehem walina ngepma mat sandi ngepma ana ndi. Nat kavamba liga angwa ngepma wan ngepma kat ana kwula kiyandi. Wuna nimba Iarel ndi kat viga ligiyaa nyan ndina njambwi nyan wan ngepmamba yalaa liga laataa ndi kat viga ligiyandi waa wandi God,

waa piliwutndi tamba la profet vilaa kavamba la nimba kat Herot yagwa wandi maa yand. Yandi maa ndi kat wagalandi. Vingwa singwut anda njimbla wogwelaa lindi, vingwuk waa wagalandi ndi kat. ⁸Mbutndi maa wutaa ndi kat wandi. Betlehemat ay ngwula. Singwut kat vilaa wutaa yagwa mat nyan kat yiga vilaa wun kat yaa mbupmba ngwuk. Wuno ndi kat yiga vilaa ndina si kwutaa katsovak kat wowun waa ndi kat woseka wandi Herot.

⁹Herotna nyaangit wutaa wogwelaa ngepmamba liga vinja singwut wogwelaa lindi maa vigiva yindi. Singwut yilindi, vigiva singwut yila vla yilindi. Ndi kat vigiva yilindi maa mat nyan ta ngay sisomba yiga tamata lindi. ¹⁰Singwut mat nyan ta ngay sisomba tamata linda vak vilaa apma maawut yelavika solat siga lindi. ¹¹Ngay wuleilaa wan mat nyan nyime Marionala tindi, vindi. Vilaa kwali mamba sila nambu silandalaa ndina si kwutaa katsondi. Ndina yimbwimba la nda ndi kat kwivat kiyanja nda walinja kapa ndi kat windi. Apma njangu veila mbaw ndi kat kwind. Apma njangu veliga ngwaak ndi kat kwindi. ¹²Kwindi maa viga kava ke yiga ndi kat simapmba mbutndi. Herot tiga kava ke yiga ndi kat mbuka waa simapmba ndi kat wandi God. Ngi kat tiga yanja yambi kwagalalaa nat ava yambimba yindi ngepma.

NYAEK NYIME NYAN KUVUK NIMBA ISIP WALINJA NEMA KIPMAT VAAKA YINDI

¹³Yindi maa njambwi nyana ensel Josep kat simapmba ngan wandi. Laataa nyan taagwa kwuka. Isipmat vaaka kwiyatapman ay ngwula. Yiga timin mala at min kat ngini waigowun. Herot mina mat nyan kat vatnyavak kwatigandi waa wandi maa ¹⁴Josep ngan laataa nyan nyime kat kwutaa vaaka kwiyatapman Isipmat yindi. ¹⁵Isipmba yiga yetindi, Herot kiyandi. Wan Isipmat yinja vak kwo ana yindi. Tamba God wandi maa profet piliwukna vak vla yindi.

God wandi, wuna nyan Isipmba yiga lindi, ndi kat ngini wowun maa lungwamataa yaigandi waa wandi God

waa tamba la profet piliwutndi. ¹⁶Nya woke la kavamba tiga ya nimba ngini lungwamataa yiga Herot kat ana vindi. Herot ndi yelavitndi. Ndi ana yaigandi. Wun kat woseka wandi waa yelavita nyingi maawut yelavika lindi. Ngi kat tiga Herot wandi maa ndina soldia Betlehemat mat nondanyangu kat vatnyavat yindi. Tat nya woke la kavamba tiga

ya nimba ndi kat wandi. Ndimwe vililik tigiya nondangangu kat aywaa kwutaa vatnyamba ngwuk wandi. Wandi maa wutaa yiga aywaa vatnyandi. ¹⁷Vatnyanja vak kat tamba la proget Jeremaia lava nyingamba tamba piliwutndi.

¹⁸Rama valinja ngepmamba la nimba nima kindigin wutndi. Nima vak nyangu kat nglalinja kwundi wutndi. Resel lila nyangu kat nglalili. Yelavika nglalila maawut kat ana alipsiga kwunakiyandi. Lila nyangu kat aywaa sindi, kiyandi waa tamba la profet piliwutndi.

ISIPMBA LIGA LUNGWAMATAA YANDI

¹⁹Herot wundumbu ya vak kat Godna ensel Josep kat simapmba mbutndi. Josep Isipmba lindi, mbutndi. ²⁰Laataa mina nyan taagwa kat kwutaa lungwamataa Isrelat ay ngwula. Mina mat nyan vatnyavat ta nimba tamba wundumbu yindi waa mbutndi ensel. ²¹Mbutndi maa wutaa laataa nyan taagwa kat kwutaa laataa yindi.

²²Akeleas ndina nyaek Herot ta njivwa klalaa tindi. Ndi Judia walinja kimpamba la kinga. King tinda vak kat Josep wutaa Judiamba yiga yetivak kat vaaka lindi. Vaaka yiga galili walinja kimpamba lindi. ²³Galili yilaa Nasaret walinja ngepma yiga yetindi. Kwo ana yindi. Jisas Nasaretmba yetinda vak kat tamba la profet piliwutndi

Jisas ndi Nasaret nyana waa waigandi waa tamba piliwutndi.

NGU YAGULA JON MBUTA NYAANGIT

3 ¹Wan njimbla ngu yagula Jon Judiana nat kava ndinyangu lapma kavamba yalaa nyaangit mbutindi. Mbuka wandi. ²Kavle vat yiga yetilingwa vak ngwuk kwagala ngwula. God nin kat viga ligiya njimbla tamba yaa ngway tolagandi. ³Tamba la profet Aisaia piliwutnda nyaangit Jon kat piliwutndi.

Ndinyangu lapman kavamba liga kita nyan laataa nima kwundimba nyaangit mbutigandi. Njambwi nyan yaiga yambi kat ngwut kwunak ngwula. Nin kat yandeya yambi agwuk ngwula waa mbutigandi waa piliwutndi tamba la profet Aisaia.

⁴Jon kamelna yuwimba kwutnja waavwimba kwusondi. Ndina yipmamba simbimba sitndi. Ndi kwapimba la nda wakalavio wanyanyevina ngumba kiga lwandi. ⁵Jerusalemba la nimba Judiana ngepma ngepmamba la niimb ndi kat vivat yalindi. Jodan walinja ndandang ngwaymamba liga negpma ndino ndinai la kavat yalindi. ⁶Kavle savle yetilinja vak ndi kat mbuka kavle vat yinin waa wandi maa Jodan

walinja ngumba ndi kat ngu yagundi. ⁷Ferisi valinja mbaapmamba la nimbo Sadyusi walinja mbaapmamba la nimbo ndinai la kavat yalwandi ngu yagundangat. Ndi Judana njambwi niimba ndi. Jon ndi kat vilaa wandi. Ngwuk kavle vat yiga yetiliga nimba ngwuk. Ngwuk kamboyna nyangu vla ligangwuk. Ngwuk manda kat wuna lak yangwuk. God ngini ndinyangu kat sindeya vak ngwuk ana kwagalagiyangwuk. ⁸Wuna lak ke yangwa. Tak yiga apma njivwa kwuka yeti ngwula. Wupma yetingweyan nat niimb vilaa vaigandi. Ndi kavle vak yetilinja vak tamba kwagalandi waa waigandi. ⁹Ngwuk kupma waligangwuk. Nin apma nimba nin. Nina ngwak Ebrahim tamba la nyana waa waligangwuk. Walingwa vak ana nglaatndi. Ngwuk kavle nimba ngwuk. Ebrahamna yelangimba la nimba yetilwnja vla ana yetiligangwuk. Kavle savle yetilingwa vak kat vilaa God kan kipmamba liga vilingwa kambak klalaa ndu lagwa kwutaa Ebrahamna yelangimba taagandeyan wovuna. Ngwuk kat kai waw kwagalalaa kambapmba mandit nimba kwutaa ngwulai liga yelangimba taagandeyan nglaatndi. ¹⁰Yaiga nyan kula kwutaa liga nyan vla ligandi. Mi angwamba vikiyandi. Apma mi sik kwalapma yigiya mi vitaa yamba laagagiyandi.

¹¹Ngwut kavle maawut kwanalalaa apma maawut yelavika lingwuk maa ngwuk kat kwutaa ngu yaguliowun. Wuna kwupmba yaiga nyan ndi ngwuk kat Godna waagan kwigiyandi. Ngwula kavle vat yiga yetilingwa vak kat yamba laagandi, vikiyandi. Wuna kwupmba yaiga nyan wuna njambwi nyana. Ndina man su wun ana alipiiga kwutaa kaligiyowun. Wun mat nyan wun. Ndina njivwa kwupmak kat wup yiga ligowun. ¹²Kavle yuwi sik yamba yaagilinja vak vla ndino kavle niimba kat kwutaa ya vitiga kavamba yaagigiyandi. Wan kavamba vitiga ya ana ngiligiyandi. Apma yuwi sik klalaa ngaymba yisoga taaga linja vak vla ndino wupma apma vak tiga nimba kat kwutaa ndina ngaymba laagagiyandi.

JISAS YANDI, JON NDI KAT NGU YAGUNDI

¹³Jisas Galilimba liga Jotan walinja ndandangi ngu la kavat yindi. Jon ndi kat ngu yagundangat Jisas yindi. ¹⁴Yalinda vak kat viga wutaa Jon Jisas kat wandi. Manda kat min kat ngu yaguwangat wun kat yamin. Wun kat ngu yagumeya vat wovena wandi Jon. ¹⁵Jisas ndi kat wandi. Kiat walaa wama vapmba wutaa wun kat ngu yagugiyamin. Wupma yimangat God woviyaguga ligandi was wandi maa wutaa Jon kiyak walaa tiga liga wandi. Kwowa wameya vat tamba wulowun. Min kat ngu yagugiyowun waa wandi Jon.

¹⁶Ndi kat ngu yagundi maa ngu yagulas nimbak wokendi. Wokendi maa nyinangwuk mbilindi, Godna waagan namiyo vla Jisas ta sisomba ngaga yandi. ¹⁷Ngaga yalaa tindi maa nyinangwupmba liga kwundi

wandi. Wan nyan wuna nyana. Ndi kat vilaa woviyaguga solat siligowun waa nyinangwupmba liga kwundi wandi.

SETEN JISAS KAT KAVLE VAT AY WANDI

4 ¹Godna waagan wandi maa Jisas ndinyangu lapman kavat yindi. Seten ndi kat kavle vat ay mila wavat yindi. ²Ngan ndumi vili nandinya ndumi vili kiginda lapman kwo lindi. Ngi kat giga wundi kat tindi. ³Tindi, Seten ndi kat vilaa yalaa wandi. Min Godna nyanat timeyan wamin maa viga lima kambak bretnat tigiyan, waa wandi. ⁴Wandi maa wutaa Jisas wandi. God waa nyaangit tamba piliwutndi. Kupma piliwutndi.

Kita nyan bret-nao kivak mina yelavik lindeyan ana nglaatndi aywaa wupmak yelavik kindeyan wan apma vala. God waa nyaangit kan nima nda.

waa tamba piliwutndi waa wandi Jisas.

⁵⁻⁶Seten Jisas kat kwutaa Judana angwa ngepma Jerusalemat kalindi. Kaliga yiga God kat kwunatinja ngayna sambangemba taagandi, lindi. Taagalaa Seten ndi kat wandi. Godna nyanat timeyan laataa kipmat vasaseli. God waa nyaangit tamba piliwutndi

God ndi ensel kat wandi maa min kat viga ligiyandi. Ana kavble yigiyamin. Min kat pwegwukiyandi. Ngi kat tiga mina mbangi ana kavle yigiyandi. Kwo ligiyamin

waa tamba piliwutndi waa wandi Seten. ⁷Jisas ndi kat wandi. God wandi, tamba piliwutnja nat nyaangit ngi liga.

God mina njambwi nyana ndi kat kavle vat ay waa ke waa waa tamba piliwutndi waa wandi Jisas.

⁸Seten Jisas kat kwutaa woke limbwilaa lan nambu nduwiat kalindi. Kalilaa kipmamba la nda kipmana nimba aywaa ndi kat simogwindi.

⁹Simogwilaa wandi. Kwali mamba silaa nambu silandalaa wuna si kwutaa katsomeyan wan kipmamba lindi, vilima nda aywaa mina lak kwigiyowun wandi Seten. ¹⁰Wandi maa Jisas wandi. Min Seten wun kat kwagalalaa ay mila. God waa nyaangit tamba kupma piliwutndi.

Njambwi nyan Godna si mina kwutaa katso ngwula.

Nat nyan kai. God kita ligandi

waa tamba piliwutndi waa wandi Jisas.

¹¹Wandi maa Seten tinda kava kwagalalaa yindi. Yindi maa Godna ensel yalaa Jisas kat kwunatndi.

JISAS GALILI YIGA LIGA TAT NJVWA KWUTNDI

¹²Ngu yagu la Jon kat kwutaa kalabusmba laaganja vak kat Jisas wutaa Galili kwagalalaa Kapaneamat yindi. ¹³Ndina angwa ngepma

Nasaretmba ana lindi. Yinda ngepma Kapaneam Galili walinja sak ngwaymba lindi. Wan kipma Sebyulan waa Naftalai walinja kwpmma. ¹⁴Kan kava kwo ana yindi. Tamba la profet Aisaia piliwuta vak vla yindi. Tamba kupma piliwutndi.

¹⁵Sebyulan walinja kipma, Naftalai walinja kipma, Galili walinja sak waymba liga kipma. Jodan walinja ndandang nat naangimba liga kipma. Juda ana ndi Judagwi ndina wava liga kayana kipma.

¹⁶Wan kipmamba la nimba tat tingjan kulun wala la kavamba lindi. Mbambala nya vla sindi, kembandi, vindi. Kulun waa kavle kavamba ligiya nimba ndino nya vla sindi, kembandi, vigiyandi waa tamba piliwutndi. Jisas yalaa ndi kat apma vat kwindeya vak kat tamba la nayan Aisaia piliwutndi.

¹⁷Tiga liga laataa Jisas ndi kat nyaangit mbutindi. Kavle maawut yelavika lingwa vak kwagala ngwula. God ngwuk kat viga lindeya njimbla tamba ngway tolagandi waa mbutndi Jisas.

KAMI KWUTA NDI AYNAT NIMBA KAT JISAS WUNA KWUPMBA YAGWA WANDI

¹⁸Galili walinja sakna tivagawimba Jisas yiga liga kami njulamba kwuta mbik nyamwun sambu kat vwndi. Mbitna si Saimon waa Pita walinja nyano Endruo. ¹⁹Jisas mbik kat wandi. Laataa wuna kwupmba yagwa mbila. Kami kwutimba vak kwagalalaa ndinyangu kwutimbeya vak kat mbik kat ngini simogwigiyowun waa wandi maa ²⁰laataa njula kwagalalaa ndina kwupmba yimbit.

²¹Yiga liga nat vili pali nyamwun samb kat nyaekno njaambipmba liga njula kwunatimbik, vindi. Mbitna si Jemsogwi Jono. Mbitna nyaekna si Sebedi. Jisas mbik kat laataa yagwa wuna kwupmba wandi, ²²laataa nyaeknogwi njaambik kat kwagalalaa ndina kwupmba yimbit.

JISAS NIMA SAKWAT NDU LAGWA KAT NJIWA KWUTNDI

²³Jisas Galilina ngepma ngepmamba yiga njivwa kwutindi. Juda nyaangit ngambulinja ngay wuleilaa God ndi kat kwunakiya apma nyaangit mbutindi. Mandip mandip yelogwen kat ta nimba kat kwunatindi. ²⁴Yilinda vak kat vilaa wan kavana nimba kat mbuki mbukimba mbutindi. Ngi kat tiga Siria walinja nima kipmamba la nimba aywaa wan nyaangit wutndi. Wutaa ndina mbangi mandip mandip yelogwen vita nimba kat kwutaa Jisas ta kavat kalindi. Kavle waagan tavila la nimbagwi kwutaa kalindi. Ava plaga kipmamba nda la nimbagwi kwutaa kalindi. Man taamba kivi wata la nimbagwi kwutaa kalindi. Jisas ndi kat vilaa aywaa kwunatndi. ²⁵Galilimba liga yaa

nimba, ngepma tamba vilimba liga yaa nimba, Jerusalemba liga yaa nimba, Judiamba liga yaa nimba, Jotana nat naangimba liga yaa nimba nima sakwat yalaa Jisasna kwupmba yisolaa yindi.

JISAS NAMBU NDUWIMBA WOKELAA LIGA NYAANGIT MBUTINDI

5 ¹ Jisas wan nima sakwat nimba kat vilaa nduwiat wokendi maa ndi kat vilaa ndina kwupmba wokendi. Nduwi wokelaa kipmamba ndaa lindi. Ndina mbaapmamba la niimba ndaa linda kavamba yiga yisolaa lindi. ² Jisas wan nima sakwat ya nimba kat vilaa ndi kat nyaangit mbutindi.

APMA MAAWUT KLALAA SOLAT SIGA YETHNEYA VAK KAT JISAS WANDI

³ Kita nyan kupma wandeyan. Wun kavle nyan wun. Wuna maawupmba yelavika apma vak yiga ana yetigiyowun. Kapma liga apma vat ana yiga yetigiyowun. God wun kat ava kwindi maa apma vak yiga yetigiyowun waa wandwyan wan nyan nyinangwupmba liga apma nda klaigandi. Klalaa apma vat tigiyandi wan nyan.

⁴ Kavle vat yiga yetiliga nimba nima maawut yelavika kinjeyan apma vala. God ndi kat kwunatndi maa solat siga ligiyandi.

⁵ Nat nimba ndina si kwusolapman tiga yigumba linjeyan apma vatna. Ndi Godnanamba nima sakwat nda klaigandi.

⁶ Nat nimba Godna nyaangit wupmak kat woviyaguga linjeyan apma vala. Klavak yelavika linja nda God ndi kat kwigiyandi.

⁷ Nat nimba kat miwa yiga ligiya nimba apma vatna. God ndi kat miwa yiga ligiyandi.

⁸ Apma tagula maawutno ligiya nimba apma vatna. Ngini God kat vigiyandi.

⁹ Waleavak kat ndinyangu sivak kat kai waga wupma ke yingwa waa waliga nimba ndi. God ndi kat waigandi. Ngwuk wuna nyangu ngwuk waa waigandi.

¹⁰ Nat nyangu Godna apma njivwa kwutindi, vilaa nat kavle nyangu ndi kat vat yilinjeyan apma vatna. Nyinangwupmba liga nyan kwigiya apma nda wundi apma nimba klaigandi waa wandi Jisas.

¹¹⁻¹² Jisas ndi kat nat nyaangit ngambundi. Ngambuga wandi. Wuna kwupmba yalingwa vak kat vilaa ngwuk kat kavle vat yiga njika waga woseka walinjeyan ngwuk nima vak ke yelavikngwa. Ngwuk apma maawuk sika solat siga yeti ngwula. Ngwuk kat yilinja kavle vak vla tamba la profet kat wupma yilindi.

SOLOGWI NYA VLA LIGA NYAN KAT JISAS WANDI

¹³ Kilinja sol yuvut kigindamba taagandi, ana njangu veiga kavle yigiyandi. Ngwulo wupma kilinja sol vla liga kipmamba liga nimba kat

kwunatigangwuk. Sol nyingi liga vat ngilindyan ngini kwunatndeaya vak kai. Tamba kavle yindi. Ava yambimba yaagindi maa yi ya liga nimba mamba veiga yetiligandi.

¹⁴Ngwuk kipmamba liga kamba liga nda vla ligangwuk. Nambu nduwinmamba ngepma kwutaa linjeyan ana alipiiga pagwugiyandi. Wan ngepma aywaa vigiyandi. ¹⁵Kita nyan lam sagalalaa aw yapmba ana naangagiyandi. Njambimba wokega taagaiyandi. Taagandi mala kembalindi, ngaymba liga nimba aywaa viga ligiyandi. ¹⁶Lam njambimba taaganda vak vla kwutingwa apma njivwa kapmba agwuk ngwula. Ndinangu aywaa vilaa ngwutna nyinangwupmba liga nyaekna si kwutaa wiyak waa katsogiyandi.

MOSES KWIYA LO KAT JISAS MBUTNDI

¹⁷Jisas Moses kwiya lo kat kalipmat yandi waa ke yelavikngwa. Wungi vak kat ana yawun. Ndinai kwuta la lonana angwa nyaangit mbupmat yawun. ¹⁸Maawut ke siliwoka yetingwa. Yelavika yeti ngwula. Moses kwiya lomba tiga nyaangit aywaa ana kwo vatnat tigiyaandi. Nginangwutno kipmo tigiya njimbla wan nyaangit tigiyaandi. Ngingwutno kipmo ngilindi, ndina lo ngiligiyandi. ¹⁹Kita nyan lo kat kai waga nat nimba kat kalitinda vat simogwindeyan ndi nyinangwat wuleilaa mat nyanat tigiyaandi. Kita nyan lona nyaangit wuke kwutaa yetiga nat nimba kat yetinda vak simogwindeyan ndi nyinangwat wuleilaa njambwi nyanat tigiyaandi. ²⁰Moses kwiya lo visimogwi liga nimbagwi Ferisio maawut sitapman nima njivwa kwuka lo waa nyaangitmba yetiligandi. Wundi nimba nyinangwat ana wuleigiyandi. Wundi nimba yetiga vak kat kwulataa apma maawut yelavika apma vak yetingweyan nyinangwat wuleigiyangwuk. Yetinja vak kat kwulatapman yingweyan ana nyinangwat wuleigiyangwuk.

KWONDU MAAWUT MENA YELAVITNJA VAK

²¹Tamba mbutnja nyaangit tamba wutingwuk. Nat nyan kat ke vatnyapga. Vatnyangweyan kotngwangat kaligiyandi waa tamba mbutndi. ²²Mbambala ngwuk kat mandit kupi nyaangit mbutigowun. Kita nyan ndina yakwa nyan kat nyigi maawut tiga walealindeyan ndi kat kotndangat kaligiyandi. Kita nyan ndina yakwa nyan kat min kavle nyan min waa wandeyan ndi kat kaunsilmba kotndangat kaligiyandi. Kita nyan ndina yakwa nyan kat min tungwengan yiga yetiga nyan min waa wandeyan wan nyan ya vitiga kavat yigiyandi.

²³⁻²⁴God kat kwunapmak tiga wuna yakwa nyan kat tamba kavle vat yiwun waa yelavipmeyan kwilima nda njambi ngwaymba taagalaa kwagalalaa yakwa nyan kat yiga avi. Ndi kat kavle vat yilima vak kwunataa at yiga God kat kwunapmak agwi.

²⁵Kita nyan min kat kotmak kalindeyan ava yambimba yiga liga kavle vak kat kwunap mila. Kwunatapman yimeyan jas wandi, plisman min kat kalambusmba taagagiyandi. ²⁶Min kat woseka ana wowun. Kalabus ana kwo kwagalagiyamin. Jas min kat wand mbak ngilindi maa wogwegiyamin.

YAMBISIK YILINJA VAK KAT JISAS KAI WANDI

²⁷Tamba la nimba tamba mbutinja nyaangit tamba wutingwuk. Nimbana taagwa kat yambisik yilinja vak ke yiga yetilingweya waa mbutindi. ²⁸Kan mbambala ngwuk kat mandit kupi nyaangit mbutigowun. Kita nyan nat nimbana taagwa kat minimba vilaa yambisik yilinja vak kat maawupmba yelavitndeyan wan kavle vatna. Yambisik yilinja vak vla ligandi. ²⁹Yaagindan naangi liga mini sikmba kavle vak vilaa kavle vak yelavika kavle vak yilimeyan wan mini sik kuvu ngwula yaagi. Mini sik tapman timeyan nima vak ana ndi. Ya vitiga kavat yimeyan wan nima vatna. ³⁰Yaagindan taambamba kavle vat yilimeyan wat taamba kalitaa yaagi. Kita naangi taambambaa yetimeyan wan nima vat ana ndi. Ya vitiga kavat yimeyan wan nima vatna.

NDU TAAGWA KAT KWAGALANDA VAK

³¹Tamba la nimba tamba mbutinja nyaangit tamba wutingwuk. Kita nayan ndina taagwa kat kwagalavat yelavitndeyan pas mina piliwutaa li kat kwilaa kwagalagiyandi. Nyaangit kai, waa tamba la nimba mbutindi. ³²Mbambala ngwuk kat mandit kupi nyaangit mbukiyowun. Kita nyana taagwa yambisik yiga ana yetili. Lila lan li kat kwo waga kwo li kat kwagalandi. Wupma yinda vak wan kavle vatna. Wupma kwagalandi maa nat ndu kat yiga ngway tololeyan yambisik taagwat tigiya. Ngini yila nyan ndi yambisik nduat tigiya ndino.

NIMA SAKWAT NYAANGIT MBUTINJA VAK

³³Tamba la nimba tamba mbutinja nyaangit tamba wutingwuk. Nima njivwa kwukiyanin woseka ana waiganin. God viga ligandi waa nima kwundimba wandweya njivwa agwuk ngwula waa tamba la nimba wandi. Woseka ke wangweya waa wandi. Wan nima kwundimba walinja vak ke walingweya. ³⁴Kan mbambala ngwuk kat mandit kupi nyaangit mbukiyowun. Nima njivwa kwukiyanin. Woseka ana wanin nyinangwut tiga nimba viga ligandi waa ke waa. Wan nima kwundimba walinja vak ke walingweya. Nyinangwut viga lingwa kava ana ndi. God ndaa liga tigitna nyinangwut. ³⁵Nima njivwa kwukiyanin. Woseka ana wanin. Kipma liga nimba viga ligandi waa ke waa. Kipma viga lingwa kava ana ndi. God nyinangwupmba ndaa liga lingwa kava ana ndi. God nyinangwupmba ndaa liga man veila linda kava kipma. Nima

njivwa kwukiyanin. Woseka ana wanin. God viga liga nima ngepma Jerusalemba liga nimba viga ligandi waa ke waa. Wupma wangweyan wan kavle vatna. ³⁶Nima njivwa kwukiyanin. Woseka ana wanin. Wundi nima njivwa kwutapman yineyan nina nambumba liga yuwi kavle yigiyandi waa ke waa. Ngwutna nambu tiga vak ana viga ligangwuk. Wangwut maa ngwula nambuna nimba sawun mbangi tiga ngik mbangi tigiyanidi? kai. ³⁷Ngwuk kat nyaangit wagalanjeyan awa o kai waa awa ndi kat. Wan nima kwundimba ke wangweya. Nat nima sakwat nyaangit ngwuk ke waga. Nat nima sakwat kavle nyaangit Setenanamba ngwuk klaligangwuk.

AWAT SOWAT KAVLE VAT YILINJA VAK

³⁸Tamba la nimba tamba mbutinja nyaangit tamba wutingwuk. Kita nyan mina mini kavle yindeyan awat ndina mini kat kavle vat ay. Kita nyan mina nimbi kavle yindeyan awat ndina nimbi kat kavle vat ay waa tamba la nimba piliwutndi. ³⁹Kan mbambala ngwuk kat mandip kupi nyaangit mbutigowun. Kita nyan ngwuk kat kavle vat yindyan ndi kat awat kavle vat ke yiga. Ngwula ngangava viyandeyan ndi kat nat naangi liga ngangavamba agwi viyandangat. ⁴⁰Kita nyan ngwula waavwi klavat ngwuk kat kotmak kalindeyan ndi kat agwi. Kwilaa alagu kwusolingwa waavwi klalaa agwi. ⁴¹Kita nyan min kat yiweya yambi kita vat yili waa wandeyan yivak kat wanda sivla kwulaka ay mila. Wuna kwanda kwanda nda kwutaa mail kita yiga kali mila waa wandeyan ndina nda kwutaa mail vililik kali mila. ⁴²Kita nyan ngwuk kat kita nda klavak kat wagalandeyan agwi ngwula. Kita nyan wun kat mina nda agwi ngini awat kwigiyowun wandeyan ndi kat agwi.

MAAMA NIMBA KAT YINGWEYA VAT

⁴³Tamba la nimba tamba mbutinja nyaangit tamba wutingwuk. Ngwutna ali nimba kat woviyaguga liga ndi kat kwunak ngwula. Ngwutna maama nimba kat ndi kat kai awa waa tamba mbutindi. ⁴⁴Kan mbambala mandip kupi nyaangit ngwuk kat mbukiyowun. Ngwutna maama nimba kat ndi kat woviyanguga liga ndi kat kwunak ngwula. Ngwuk kat kavle vat yiliga nimba kat ndi kat tiga God kat wagala ngwula. ⁴⁵Maama nimba kat apma vat yingweyan ngwutna nyinangwapmba liga nyaekna nyanguat tigiyanigwuk. God wandi maa nya sindi, apma vat tiga nimba kavle vat tiga nimba aywaa ndina ambukatna kiginda waatigandi. God wandi maa meik ndandi, apma vat tiga nimba kavle vat tiga nimba aywaa ndina ambukatna kiginda waatigandi. ⁴⁶Takis sanya klaliga kavle nimba ndi kat woviyaguga liga nimba kat mina apma vat yiligandi. Ngwuk kat woviyaguga liga nimba kat mina apma vat yiga yetingweyan God ngwuk kat apma wenga ana kwigiyandi. Ngwuk ndinyangu aywaa ndi kat apma

vat ay ngwula. ⁴⁷God kat kai waliga nimba ndina ava nimba kat mina apma nandinya waligandi. Ngwula ava nimba kat mina apma nandinya wangweyan wan apma vat ana ndi. Ngwuk ndinyangu aywaa ndi kat apma nandinya awa ngwula. ⁴⁸Nyinangwupmba liga ngwula nyaek apma vat yilinda vak mina ngwulo wupma yiga yeti.

**NAT NIMBA KAT MIWA YIGA KWINGWEYA
VAK KAT JISAS NDI KAT MBUTNDI**

6 ¹Ngwuk viga wuka ligiyangwuk. Nat nimba kat apma vat yingweya vat kapmba ke kwuka. Nat nimba vilandi. Vinjeyan ngini ngwuk kat nyinangwupmba liga nyaek wenga ana kwigiyandi. ²Sanya lapman kwanda kwanda lapman tigiya nyan kat kwivat tingweyan nyaangit ke tak tapmba mbuka. Nat nimba avla ndina si kwutaa kwusoliga nimba ndi. Ndi Juda nyaangit ngambuliga ngaymba wuleilaa ava yambimba yilaa nyaangit mbutaa mina kwiligandi. Nat nimba kat kwilinja vak vilaa ndina si kwutaa katsonjangat tat tapmba nyaangit mbutigandi. Ndi ndina wenga nda ndinyangunamba tamba klandi. Nyinangwupmba liga nina nyaeknanamba ana klaigandi. ³Sanya lapman kwanda kwanda lapman nyan kat kwivat tingweya nda pagwuga agwi ngwula. Ngwulogwinala liga nimba vilandi. ⁴Pagwuga kwingweyan nina nyaek viga ligandi. Vilaa apma wenga ngwuk kat kwigiyandi.

GOD KAT WAGALANGWA VAK KAT JISAS NDI KAT MBUTNDI

⁵God kat wagalangweya njimbla kapmba laataa wagala linja vla ke wagalangwa. Wundi nimba avla ndina si kwutaa kwuso liga nimba ndi. Ndi Judana nyaangit ngambulinja ngay wuleilaa way ava yambimba liga laataa God kat wagalaligandi. Nat nimba ndi kat vinjangat kapmba laataa wagalaligandi. Ngwuk kat woseka ana wowun. Ndi wenga lamba klandi ndinyangunamba. ⁶God kat wagalangweya njimbla wupma ke wagalangwa. Ngay weleilaa ngay kamanga kwalalaaa pagwula liga kavamba tiga God kat wagala ngwula. Nyinangwupmba liga nina nyaek papwula liga wagalangweya vat viga wutaa apma wenga ngwuk kat kwigiyandi. Ndino pagwula ligandi. Ndina mbangi ana viliganin.

⁷God kat wagalangweya njimbla nima sakwat kwo nyaangit ke ngambuga. Ngepma ngepma la God kat vilapman nimba ndina ngepma waagan kat wupma mandit mandit waligandi. Sivla mbundi nyaangit ngambuneyan nina waagan wukiyandi waa yelavitaa ngambuligandi. ⁸Wupma ngambulinja vak vla ngwuk ke ngambuga. Nina nyaek ngini wagalangweya vat ndi mbambala viga ligandi. Manda kat nima sakwat nyaangit ngambuga ndi kat wagalagiyangwuk. Nima sakwat nyaangit ngwuk ke wagalaga. ⁹God kat ngambuga wagalangweya njimbla kupma ngambungwula waa wandi Jisas.

Nina nyaek nyinangwupmba ligamin. Mina si waga kwutaa katsonjeyan apma vatna. Min nima nyan min.

¹⁰ Kava kava kat viga limeya njimbla yaandi. Wungi vat yandeyangat woviyanguga liganin. Mbambala nyinangwupmba liga nimba aywaa mina kwundi wuka ligandi. Nino kipmamba liga nimba aywaa mina kwundi wutneya njimbla nin kat yaandi. Wungi vat yandeya njimbla kat woviyaguga liganin.

¹¹ Mbambala kineya kiginda nin kat agwi mila. ¹² Nin nat nimba nin kat kavle vat yinja vak kat vilaa kwagalaiganin. Mino yina kavle vak kat vilaa kwagala mila. ¹³ Kavle vat nin kat yaa kwutandi. Wamin maa ana nin kat yaa kwukiyandi. Seten nin kat kwutaa lilindi. Wamin maa ndi ana nin kat kwutaa ligiyandi waa God kat wagala ngwula.

¹⁴ Jisas wandi. Ngwuk kat wowun. Nat nimba ngwuk kat kavle vat yinja vak kat viga kwagalangweyan nyinangwupmba liga nini nyaek yingweya kavle vat viga kwagalagiyandi. ¹⁵ Viga kwagalalapman yingweyan ndino ana viga kwagalagiyandi waa wandi Jisas.

KIGINDA KIVAK KAT KAI WALINGWA VAK KAT JISAS MBUTNDI

¹⁶ Nat njimbla kiginda kivak kat kai walaa God kat mina wagalaligangwuk. Kiginda kivak kat kai waa lingweya vak nat nimba mbak vilandi. Mindama sili lipmwiga ke liga. Nat nimba avla ndina si kwusoliga nimba ndi wupma yiligandi. Wupma mindama sili lipmwiga nat nimba vinjangat tiligandi. Ndina mindama vilaa ndi kiginda kivak kat kai walaa kwo ligandi. Apma nimba ndi waa waigandi. Wan ana nglatandi. Awuk ngwula. Ndi wenga tamba ndinyandgunanamba klandi. Ngini Godnamba ana klaigandi. ¹⁷ Kiginda kivak kat kai waa kwagalalaa mbangi njangulaa sanda nimbi kwuka mbangi kwutaa apma mindama viga lingweyan wovuna. ¹⁸ God kat wagalavat kiginda kivak kat kai waa kwagalalaa tingweya vat nat nimba vilandi. Nina nyaek ndi vilaa apma wenga ngwuk kat kwigiyandi. Ndino pogwula liga nyana. Nina mini ndina mbangi ana viga liganin.

NYINANGWUPMBA APMA NDA YISOGA TAAGANGWEYA VAK KAT JISAS NDI KAT MBUTNDI

¹⁹ Kan kipmamba ke nima sakwat kwanda kwanda yisoga taagaga. Ndikna kwutindi, vilingini kalitigandi. Kun kiga ligiyandi. Sikwutiga nimba weleilaa tivwi ngilika sikwukiyandi. ²⁰ Nyinangwupmba nima sakwat kwanda kwanda yisoga taagangweyan wovuna. Ndikna ana kwukiyandi. Vilingini ana kalikiyandi. Kun ana kiga ligiyandi. Sikwutiga

nimba ana tivwi ngilika sikwukiyandi. ²¹Ngwutna kwand kwanda nda yisoga taagangwa kavakat mina nimamba maawupmba yelavika ligiyangwuk. Kwanda kwand kipmamba yisoga taaga liga nimba kipmana nda kat mina yelavika ligandi. Kwanda kwanda nyinangwupmba yisoga taagaliga nimba nyinangwutna nda kat mina yelavika ligiyandi.

MHNI NGAYNA NDAAMANGE VLA LIGANDI WAA JISAS MBUTNDI

²²Ngwutna mini ngay wuleinja ndaamange vla ligandi. Minimba vingwuk, nima sakwat vak ngwula mbangi wuleigiyandi. Apma nda mina viga lingweyan ngwula mbangi ngwula maawut apma vat tigiyanidi. ²³Kavle nda mina viga lingweyan ngwula mbangi maawut kavle yigiyandi. Apma nda ngwula maawut weleigiya nat yambi kai. Kavle vat mina wuleindyan wan kavle nglei vatna. Apma vat ana ndi.

**NIMA NYAN VILILIKMBA KITA NYAN ANA ALIPSIGA
NJIVWA KWUKIYANDI WAA JISAS MBUTNDI**

²⁴Ndu nyan kita nima nyan vililikmba ana njivwa kwukiyandi. Nat nima nyan kat kai walaa nat nima nyan kat mina yelavika ligiyandi. Nat nima nyana kwundi wupmak kat kai walaa nat nima nyana kwundi mina wuka ligiyandi. Ngwutno wungi vat tiga nimba ngwuk. Godna njivwa kwukawi sanya njivwa kwukawi ana kwukiyangwuk.

NIMA MAAWUT YELAVIKA LILINJA VAK KAT JISAS NDI KAT MBUTNDI

²⁵Ngi vak kat ngwuk kat wowun. Kingweya nao kiginda ngu kat nimamba ke yelavitingwa. Kwusongweya waavwi kat ke nimbamba yelavitingwa. Wan kiginda nima vat ana ndi. Waavwi nima vat ana ndi. God waa nyaangit wuka apma vat mina yiga yetineyan wan nima vatna. ²⁶Wan wiyaka yi yaliga waavi kat avi ngwula. Ndi ambkat njivwa ana kwutigandi. Ndi ambukatna nda ana vaga yiga kiga kwutigandi. Ndi ambukatna nda ana vaga yiga kiga kavamba yisoga taagaligandi. Nyinangwupmba liga nina nyaek ndi kat viga ligandi. Nino nin kat viga ligandi. Waavi mat nda. Nin ndinyangu nima nda nin. ²⁷Nima vak yelavika yetingwa vak nima njivwa kwutiga vak ana ndi. Kita nyan wundumbu yivak kat vaaka nima maawut yelavika lindeyan ndina livi nimba kat ana kwulakiyandi. Wundumbu yivak kat vaatapman tigiya nyan kat ana kwulala kwo yetigiyandi. Ndi kiyaigandi.

²⁸Kwusoga yetingweya waavwi kat manda kat nimbamba yelavika ligangwuk. Kipmamba avla waataa liliga mwe ndi kwuso waavwi kat ana yelavika liligandi. Mwe ana njivwa kwuka waavwi klalaa tavaga yelaga ligandi. ²⁹Tamba la King Solomon ndi apma nglei waavwi kwusoga lindi. Ndina kwuso linda waavwi mwena mbangi kat ana kwulatindi. Mwena mbangi ndina waavwi kat kwulatindi. ³⁰Avla waatiga nda kat

God ndi kat apma yelaga nda kwiligandi. Avla waatiga nda nima nda ana ndi. Sivla mbundi ana liligandi. Ndinyangu kalika kita livwimba yisolaa ya sagalandi, vika ngililigandi. Nin ndinyangu wupma liga nda ana nin. Nin nima nda nin. God nin kat viga liga kwusoneya waavwi kwigiyandi. Ngwuk nima maawut ke yelavika lingweya. Ngwuk God kat wagala ngwula. ³¹Kiweya nao kiginda ngu andamba lindi, klaigowun kwusoga yetiweya waavwi andamba lindi, klaigowun waa ke nimamba yelavitigwa. ³²Godna si wutapman ta nimba ndino wupma nima maawut yelavika lindi. Ngwuk Godna nyangu ngwuk. Ndi ngwuk kat viga liga miwa yiga kwigiyandi. ³³Wan nda kat ngwuk nima maawut ke yelavika lingwa. Godna kwundi wupmak kat mina nima maawut yelavika lingweyan ndina apma vak kwilaa kan kipmana nda ngwutna lak kwigiyandi. ³⁴Ngini yaiga vak kat ke ngwuk nima maawut yelavika lingwa. Yaiga vak ngini yaigandi. Nandinya nandinya nima vat tigiyaandi. Ngwuk mand kat yaiga vak kat nima maawut yelavika ligiyangwuk. Ana nglaatndi.

**NAT NIMBA YIGA YETINJA KAVLE VAK KAT
VILAA SIGA NAGUNGWEYA VAK**

7 ¹Nat nimba kat vilaa ngwuk kavle nimba ngwuk waa wangweyan God ngwuk kat vilaa ngwuk kavle nimba ngwuk waa waigandi. ²Ndi kat vilaa walingwa vak vla God ngwuk kat vilaa waigandi. ³Nat nyan yiga yetiga kavle mat vat manda kat vilaa siga naguligangwuk. Ngwulai yiga yetiliga kavle nima vak kat ngwuk ana viligangwuk? ⁴Nat nyan kat vilaa min samat kavle vat tamba yimin. Yima vak kwunakiyanin waa manda kat waligangwuk. Kavle vat yiga yetingwa vak nima nglei vatna. ⁵Ngi kat tiga nat nyan samat kavle vak yinda vak kat vilaa walingweyan ngwuk woseka waliga nimba vla ligiyangwuk. Ngwulai yiga yetiliga nima kavle vak kwagalalaaa yingweyan nat nyan yiga yetigiya mat kavle vak kat kwunakiyangwuk. Tat ngwutnai yiga yetiga kavle vak kwagala ngwula. ⁶God waa apma nyaangit wupmak kat kai waliga nimba kat ke mbuka. Mbukngweyan kavle waala valinda vak vla ngwuk kat yigiyandi. God waliga apma nyaangit kavle nyaangitna waa waliga nimba kat ke mbuka. Ndi wutaa kai waigandi. Mbak yetiga kavamba yaagingwa apma nda mbak velingwundi, ndailaa liga nda vla ligiyandi ngwutna nyaangit.

GOD KAT NIMBAMBA WAGALA NGWULA WAA JISAS WANDI

⁷God kat wagalangweyan ndi kat wagalangweya nda klaigangwuk. Kwaka lingweya nda vigiyangwuk. God tiga ngayna mbapmo taambamba viyangweyan ndi lavwiyyiyandi. ⁸God kat wagala liga nimba ndi aywaa wagalalinja nda klaigandi. Kwaka yetiliga nimba aywaa kwatinja nda

klaigandi. Mbapmo taambamba viyaliiga nimba aywaa wan ngayna mbapmo God lavwindi maa wuleigiyandi.

⁹Ngwula ngepmana vatnonala kita vatna. Kita mat nyan ndina nyaek kat nao kat wagalandyan ndina nyaek ndi kat kambapmba kwigiyandi? E? Kai la. Wupma ana kwigiyandi. ¹⁰Kita mat nyan nyaek kat kami kat wagalandeyan ndi kat kamboymba kwigiyandi? E? Kai la. Wupma ana kwigiyandi. ¹¹Ngwuk kavle nimba ngwuk. Ngwutna mat nyangu kat apma nda klalaa kwiligangwuk. Nyinangwupmba liga nina nyaek ndi kavle nyan ana ndi. Ndino wupma nin kat apma nglei nda klalaa ndi kat wagala liga nimba kat kwiligandi. ¹²Mandana apma vat yinda vak kat vilaa woviyaguga lima nat nyan kat yindangat wan vak woviyaguga lima vak nat nimba kat ay mila. Wan vak Moses kwiya lomba profet piliwutnja nyaangitmba la angwa nyaangitna.

NIMA AVA YAMBI MAT AVA YAMBI KAT JISAS MBUTNDI

¹³Ngwuk mat suwi yambimba wulei ngwula. Kavle kava yilinja ava yambina suwi yambi nima nglei ligandi. Kavle kava yilinja ava yambi savagu ligandi. Nima sakwat nimba wungi ava yambimba yiligandi. ¹⁴Apma kava yilinja ava yambina suwi yambi nima ana li. Matnat. Apma kava yloinja yambi savagu liga yambi ana ndi. Nima sakwat nimba ana yiligandi.

KAVLE NYAANGIT MBUTIGA NYANGU KAT JISAS MBUTNDI

¹⁵Woseka waa kavle nyaangit mbutiga nyangu kat yiga ngwaymba avi. Nin God waa nyaangit mbutiganin waa woseka waligandi. Ndina mbangi mindama apma vatna. Ndinai yelavika yetiga maawut kavle maawutna yelavika yetinja. Ndi kat yiga ngwaymba avi ngwula. ¹⁶Yiga yetinja vak kat vilaa ndinai maawupmba yelavika yetinja vak kat viga wukiyangwuk. Ndi kavle mi vla ligandi. Kavle tangu mbundi liga apma mi sik ana kwaligandi. Yilavi mbundi liga kavle yuwi apma vak kilinja yuwi sik ana kwaligandi. ¹⁷Apma mi mina apma sik wogwulaa kwaligandi. Kavle mi ndino kavle mi sik wogwulaa kwaligandi. ¹⁸Apma mi kavle mi sik ana kwaligandi. Kavle mi apma mi sik ana kwaligandi. ¹⁹Apma mi sik kwalapman mi vitaa tamba lamba kalika yisolaa ya sagalandi, vitigandi. ²⁰Ngi kat tiga God waa nyaangit mbutiganin waga kavle nyaangit mbuka yetiliga nimba kat yiga yetinja vak kat vilaa siga ngugiyangwuk. Yiga yetinja vak mi sik vla ligandi.

JISAS WANDI. NGWUTNA MENDAMA ANA VIGA LIGOWUN

²¹Nima sakwat nimba wun kat vilaa njambwi nyan waa woseka waligandi. Ndi aywaa nyinangwut ana alipsiga wuleigiyandi. Nyinangwupmba liga wuna nyaek waliga kwundi wuka yetiliga nimba

mina nyinangwuk wuleigiyandi. ²²Ngini yaiga nandinya nima sakwat nimba wun kat yaa vilaa njambwi nyan njambwi nyan waa woseka waigandi. Mina simba waga God waa nyaangit nat nimba kat yiga mbutinin. Mina simba waga kavle waagan kat savilinin. Mina simba waga nima nima njivwa kwutinin waa woseka waigandi. ²³Wandi maa ndi kat waigowun. Ngwutna mindama ana viga ligowun. Wun kat kwagalalaa ay ngwula. Ngwuk kavle nimba ngwuk waa ndi kat waigowun.

NGAY VHLHK KAT JISAS MBUTNDI

²⁴Kita nyan mbutuwa nyaangit wutaa wan nyaangipmba yiga yetindeyan kambapmba ngay tolaa kwutiga apma nyan vla ligandi. ²⁵Wan nyan kambapmba ngay tolaa kwutndi mala nima meik mwutolo kiyandi. Ndandi mala ngumbi kiyandi, wan ngay kwo lindi. Kambapmba taundi. Ana ndandi. ²⁶Kita nyan mbutuwa nyaangit wutaa kai wandeyan yaawiamba ngay tolaa kwutiga kavle nyan vla ligandi. ²⁷Wan nyan yaawiamba tolaa ngay kwutndi mala nima meik mwutolo kiyandi. Ndandi mala ngumbi kiyaga singwamatndi, aywaa ndandi wan ngay waa wandi Jisas.

JISAS KWONDUO LIGA MBUTNDI

²⁸Jisas wandi maa wan nima sakwat nimba ndina kwundi wutaa ngipaliga ndandi. ²⁹Ndina nat nimba Moses kwiya lo simogwiliga nimba vla liga ana Jisas mbutindi. Ndi kwonduo liga mbutndi.

KAWILA KIGA LA NYAN KAT JISAS KWUNATNDI

8 ¹Jisas nduwimba liga ngaga yandi. Ngaga yandi maa tat ndinai mbukna vak wuka la nimba ndina kwupmba yalaa yisolaa lindi ndu lagwa. ²Tiga liga kawia kiga la nyan yalaa Jisasna mangindamba kwali kwali silaa Jisas kat wandi. Njambwi nyan wun kat kwunapmak wameyan alipsiga kwunakiyamin. ³Wandi maa Jisas ndina mbangimba taamba taagalaa wandi. Min kat tamba kwunakowun. Apma vat yeti mila waa wandi maa kawia kiga linda vat wan kawia kasendi. ⁴Jisas ndi kat wandi. Awup mila. Min kat kwunakwa vak nat nimba kat min ke mbuka. God kat kwunatiga nyan kat mina yiga mina mbangi simogwi mila. Mina mbangi vilaa God Moses waa vapmba kwanda kwanda vatnyalaa God kat kwigiyandi. Kwindeya vak vilaa mina mbangi kwo linda vak kat vigiyandi waa wandi Jisas.

SOLDIANA NJAMBWI NYANA NJIVWA KWUTA NYAN KAT JISAS KWUNATNDI

⁵Jisas Kapaneam walinja ngepma yiga wuleindi maa njambwi soldia yalaa Jisas kat wandi. ⁶Jambwi nyan wuna njivwa kwuta nyan yelogwen

kat tigandi. Ndina ava kiyandi, njambimba kwandi. Nima kangit yilindi, tigandi waa Jisas kat wandi. ⁷Wandi maa Jisas ndi kat wandi. Yiga kwunakiyowun wandi.

⁸Wan nyan Jisas kat wandi. Wun apma nyan ana wun. Wuna ngay manda kat yaigamin. Kai wowun. Kumba liga nyaangit mina wamin maa wuna njivwa kwutiga nyan kwo ligiyandi. ⁹Wuna njambwi soldia wun kat viga ligandi. Ndina kwundi wuka ligowun. Wuno nat nimba kat viga liga nyaangit mbutiga nyan wun. Wuna kwupmba liga soldia kat ay waweyan yigiyandi. Yagwa waweyan yaigandi. Wuna njivwa kwutiga nyan kat njivwa agwut waweyan ndi kwukiyandi waa wandi njambwi soldia. ¹⁰Jisas wutaa ngipaliga ndalaa wandi. Ndina maawupmba yelavika linda vak vla ana Isrelmba liga nimbana maawut yelavika ligandi. Ndi kat aywaa kwulatndi. Ndina maawut apma vat tigandi. Yelogwen kat kwa nimba kat kwunatuwa vak ndi viga ligandi. ¹¹Yigumba awuk ngwula. Nyinangwut wuleigiyaa wan kava. Wuleilaa Judana njambwi nimba Ebrahim, Aisak, Jekopnogwinala kita vak kiga kita yelangimba yetigiyandi. ¹²Judana nat nima sakwat nimba ndi ana wuleigiyandi. Nat nimba wuleigiyandi. Ndi wuleilapman nimba kavle kava yilaa nglaga nimbi ngliaka ligiyandi waa Jisas ndi kat wandi.

¹³Ndi kat walaa njambwi soldia kat wandi. Mina ngay ay mila. Wagalama vat tigiyanidi waa wandi maa yilaa ndina njivwa kwuta nyan kwo linda vat vindi. Vilaa yelavitndi. Jisas waa njimblamba ndi kwo lindi waa yelavitndi.

**PITANA NASAKWAT YELOGWEN KAT TILI,
JISAS LI KAT VLAA KWUNATNDI**

¹⁴Jisas Pitana ngay wuleilaa ndina tangwana nyime yelogwen kat tili, vindi. Lila mbangi kangan walindi, njambimba kwali. ¹⁵Jisas lila taamba kwutndi maa lila mbangi kangan yelogwen vitinda vak ngilindi, laataa kiginda kwuti Jisas kat.

JISAS NIMA SAKWAT NDU LAGWA KAT KWUNATNDI

¹⁶Nglambu kavle waagan tavila la nimba kat kwutaa Jisas ta kavat kiyandi, ngwuk kavle waagan ndi kat kwagalalaa ay ngwula waga ndi kat kwunatndi. Yelogwen kat ta nima sakwat ndu taagwa yandi, vilaa ndino ndi kat kwunatndi. ¹⁷Ndi kat kwo ana kwunatndi. Tamba la profet Aisaia piliwuthnda nyaangit vla kwunatndi. Tamba Jisas kat piliwutndi.

Yelogwen kat tina vak ndina lak klalaa
kwunatndi
waa tamba piliwutndi.

JISASNA KWUPMBA YIVAT WA NIMBA

¹⁸Nima sakwat nimba yalaa yisolaa lindi vilaa Jisas tamatndi. Ngi kat tiga Jisas njaambit kulaa wandi maa ngusamba kaga nat naangat

valigendi. ¹⁹Kawindi mala Moses kwiya nyaangit simogwi liga nyan yalaa Jisas kat vilaa wandi. Simogwi liga nyan yimeya kava wuno mina kwupmba yigiyowun waa wandi maa ²⁰Jisas ndi kat wandi. Kwapimba yetiliga waala sindu kwalinda waangu ngi liga. Waavi sindu kwalinja ngay ngiliga. Wun Godna vak ndinyangu kat simogwi liga nyan wun sindu kwaweya kava kai waa wandi Jisas. ²¹Ndina kwupmba yeti liga nyan laataa Jisas kat wandi. Njambwi nyan. Wuna nyaek tamba wundumbu yindi. Ndi kat yiga waangu vala nguvat wowun. Ngini yalaa mina kwupmba yetigiyowun waa wandi maa ²²Jisas ndi kat wandi. Ke yiga ndina mala. Wuna kwupmba yavak kat kai waliga nimba ndi waangu vala waangumba ngugandi. Min wuna kwupmba yagwa mila waa wandi Jisas.

JISAS WANDI, MWUK KIYAK WANDI

²³Jisas njaambit ndina mbaapma nimbonala kulaa yindi. ²⁴Yilindi maa nima mwutolo kwutndi, pali laatndi Nima pali laataa ndina njaambit wuleindi. Jisas sindu kwandi. ²⁵Ndinagwi kita vat ya nimba ndi kat sivilulaa wandi. Njambwi nyan. Nina njaambit tamba kambruکا tigandi. Nin ngu kigiyanin waa wandi. ²⁶Jisas laataa ndi kat wandi. Ngwuk manda kat vaatigangwuk. Njambwi nyanat tuwa vat ana ngwuk nimamba yelavitigangwuk waa walaa mwukagwi pali kat wandi, kiyak wandi. Mwuk kiyak wandi, pali ndino kiyak wandi. Ngu yuvut tapman tindi. ²⁷Ndina nyan manda nyana. Mwuk pali ndinai waa vapmba wutinda waa wandi.

KAVLE WAAGAN TAVILA LA VHLIK PALI KAT JISAS KWUNATNDI

²⁸Njaambipmba yiga Gadara walinja ngepma kawindi anguveli naangamba. Kawindi maa kiya nimbana waangumba yeti liga mbit nyan laataa Jisas la kavat yambit. Kavle waagan tavila la mbit nyan. Kao mbundi nyan mbit. Nat nimba mbik kat vaaka lindi. Tilimba kavamba ana yi ya yetiliindi. ²⁹Jisas kat vilaa mbit kiselaa wambit. Min Godna nyan min. An kat angamak yigiyamin. An kat kavle vat yivat yamin? An kat kwulapmeya njimbla na ndi waa kiselaa wambit. ³⁰Nima sakwat mbak wan kavamba kiga yetindi. ³¹Mbik kat tavila la waagan Jisas kat wagalambit. An kat savilivat wameyan savililimin maa mbapmba wuleilaa yigiyaa. Wovuna? waa wagalambit. ³²Wagalambit maa Jisas kwowa ay mbila wandi. Mbik kat kwagalalaa yiga mbapmba wuleimbik maa wan mbak vaaka piliga ndaiga satnat yindi. Yilaa wan mbak aywaa ngu kigiyatndi.

³³Wan mbak kat yiga la nyangu ngepmat piliga yiga ngepmamba la nimba kat nayaangit mbutndi. Kavle waagan ndu nyan kat kwagalalaa mbapmba wuleilaa pilinja vak kat yiga mbutndi. ³⁴Ngepmamba la nimba

wutaa Jisas la kavat yindi ndi kat vivat. Ndi kat yiga vilaa wandi. Nina kipma kwagalalaa min ay mila wandi.

JISAS MAN TAAMBA KIVI WATNA NYAN KAT KWUNATNDI

9 ¹Jisas kat kai wandi maa njaambit kulaa valigega ndina angwa ngepmamba kawindi. ²Man taamba kivi watna nyan njambimba ndaa lindi maa nat nimba ndi kat walalaa kiyandi. Jisas ndi kat kwunakiyandi waa maawupmba yelavitnja vak kat vilaa Jisas wandi. Wuna nyan min nima maawut ke yelavika. Kavle vat yiga yetima vak tamba silimbwigowun waa wandi Jisas.

³Moses kwiya nyaangit simogwi liga nimba wutaa maawupmba yelavika lindi. Wan nyan God kat kavle vat wandi waa yelavika lindi.

⁴Maawupmba yelavika tinja vak kat Jisas vilaa wandi ndi kat. Ngwutna maawupmba manda kat kavle vak yelavika ligangwuk. ⁵Kavle vat yiga yetima vak kat silimbwigiyowun waweyan njambi kwagalalaa laataa yeti waweyan kimbbit vililik nyaangit kita vatna. ⁶Wun Godna vak ndinyangu kat simogwi liga nyan wun. Kavle vat yetinja vak kat silimbwiweya kwondu ngiliga wunamba. Wuna kwondu ngwuk kat simogwivat wowun. Ndi kat ndina kwondu simogwivat man taamba kivi watna nyan kat vilaa wandi. Min laataa mina njambi walalaa ngay ay wandi. ⁷Wandi maa laataa yindi. ⁸Nat nimba vilaa ngipali walaa vaaka lindi. Vaaka liga wandi. God wan nyan kat nima kwondu kwindi waa Godna si kwutaa katsondi.

JISAS MATYU KAT YAGWA WUNA KWUPMBA WANDI

⁹Jisas wan ngepma kwagalalaa yiga takis sanya kla liga nyan kat vindi. Ndina si Matyu. Takis sanya klalinda ngaymba lindi. Jisas ndi kat vilaa wuna kwupmba laataa yagwa wandi. Wandi maa laataa yindi ndina kwupmba.

¹⁰Nat nandinya Jisas ngaymba liga nima sakwat nimbonala nao kiga lindi. Ndinogwinala kila nimba nimbonala nao kiga lindi. Ndinogwinala kila nimba takis sanya klala nimbo kavle vat yiga yeti liga nimbo kita vat yisolaa liga nao kilindi. ¹¹Ferisi yalaa nao kilinja vak kat vilaa Jisasna kwupmba la nimba kat wandi. Takis sanya klaliga nimbo kavle vat yiga yetiliga nimbo manda kat ngwula njambwi nyan nao kiligandi waa wandi.

¹²Wanja vak Jisas wutaa ndi kat wandi. Apma vat kwo liga nimba dokta kat ana yiligandi. Yelogwen kat ta nimba mina yiligandi. ¹³Ngwuk tamba God wandi, piliwutnja nyaangitna angwa vak ana viga ligangwuk. Kupma piliwutndi.

Kwanda kwanda vatnyalaa wun kat ke kwiga. Nat nimba kat nima vak yelavika ndi kat kwunak ngwula

waa wandi God

waa tamba piluwutndi. Wun apma vat yetiliga nimba kat kwunapmak ana yawun. Kavle savle yetiliga nimba kat mina kwunapmak yawun waa wandi Jisas.

KIGINDA KIVAK KAT KAI WANJA VAK

¹⁴Ngu yagula Jona kwupmba la nimba yalaa Jisas kat wandi. Ninogwi Ferisio nima sakwat njambi kiginda kivak kat kai waliganin. Mina kwupmba la nimba ndi wupma ana yiligandi waa wandi.

¹⁵Wandi maa Jisas tamba la nyaangitno ndinai kiya kupi nyaangit kat ndi kat mbuka wandi. Kita nyan taagwa klandeya njimbla nima kiginda kwutndi. Ya nimba wan kiginda kivak kat kilip mbangi yiga ana lindi. Wan kapti kwukna nyan yindi maa ndina mbangi kilip mbangi yindi, kiginda kivak kat kai waigandi.

¹⁶Tamba ngilikna waavwimba kupi waavwi taagalaa tavanjeyan ngini wan waavwi nimamba ngilikiyandi. ¹⁷Tamba simbimba tavanja awmba kupi nima ngu ana salakiyandi. Salatnjeyan nima nguna mbiyak nima yindi maa simbi kikik waa mbiligiyandi. Mbilindi maa nima ngu kipmamba salaka yigiyandi. Nima nguagwi wan simbo kita kita kavle yigiyandi. Kupi nima ngu klalaa kupi simbimba mina kwutaa salatndi maa kwo ligiyandi waa ngambundi Jisas.

¹⁸Jisas ngambulindi maa Judana njambwi nyan yalaa kwali mamba silaa wandi. ¹⁹Wandi maa Jisas laataa ndina kwupmba yindi. Jisasna mbaapmamba la nimba ndino laataa kita vat yindi.

²⁰Yilindi maa yaat tigimbimba yelogwen yilindi, yetila taagwa yali. Naambi tamba vili kiyeli vililik yelogwen yilindi, yetilili. Jisasna kwupmba yalaa ndina njimbwi waavwi sinyiti. ²¹Tat yelaviti. Ndina waavwi sinyikweyan wuna mbangi kwo ligiyowun waa yelavita sinyiti. ²²Sinyiti maa Jisas limbalaguga vilaa wandi. Taagwa nyan nimamba ke yelavika. Jisas wun kat kwunakiyowun waa yelavitinya vak vilaa nyina kavle vak kat tamba kwunakowun. Nyin kwo apma vat tigiyanin waa walaa ²³Judana njambwi nyana ngay wuleindi. Ngay wuleilaa waavi wala nimba nglala liga nimba kat vilaa wandi. ²⁴Ngwuk wun kat tula ngwula. Wat taagwa nyan ana kiyali. Sindu kwali waa wandi maa wutaa ndi kat njitindi. ²⁵Yindi maa Jisas wat taagwa nyana ngway yilaa lila taambamba kwutndi, laati. ²⁶Laataa vak mbutseli mbutseli ngepma ngepma mbuka kalindi, aywaa wutndi.

JISAS MINI VILAPMAN TA VILILIK PALI KAT KWUNATNDI

²⁷Jisas wan kava kwagalalaa yindi maa mini vilapman ta mbit nyan vililik ndina kwupmba yiga wambit. Min Devitna yelangi nyan min. An kat miwa ay mila waa wambit. ²⁸Jisas ngay wuleindi maa ndina

kwupmba wuleimbit. Wuleilaa an kat kwunap mila wambit. Wambit maa Jisas wandi. Mbik angamak yelavika ligambik. Mbik kat alipsiga mbambala kwunakiyowun? waa wagalandi maa awa njambwi nyan min alipsiga an kat kwunakiyamin waa wambit maa ²⁹Jisas mbik kat minimba taamba taagalaa wandi. Maawupmba yelavika limba vak kat vilaa kwunakowun waa wandi maa ³⁰mbila min kembandi, vimbik. Jisas mbik kat nima kwundimba wandi. Mbik kat kwunatuwa vak mbik nat nimba kat ke mbuka waa wandi. ³¹Yimbik maa mbutseli mbutsela mbutimbik, wan kavana ngepma aywaa wutndi wan kwunatnda nyaangit.

KWUNDI NGAMBU LAPMAN NYAN KAT JISAS KWUNATNDI

³²Yilimbit maa kwundi ngambu lapman nyan kat kwutaa Jisas la kavat kalindi. Kavle waagan ndi kat tavilaa ndina tigat kulumatndi, ana kwundi ngambulindi. ³³Jisas wan ndi kat kwuta la kavle waagan kat savilindi maa wan nyan kwundi ngambundi. Nat nimba vilaa ngipaliga ndalaa wandi. Tak nin Isrel tina kavamba wupma ana vilinin. Apma vatna. ³⁴Ferisi ndi mandip vak wandi. Kavle waagana savililigandi waa wandi ndi kat.

JISAS NDINYANGU KAT MIWA YINDI

³⁵Jisas ngepma ngepma yindi. Yiga Juda nyaangit ngambula ngay wuyelilaa wan apma nyaangit ndi kat mbutindi. God yalaa nin kat viga ligiyandi waa wandi. Mandit mandit yelogwen vitindi, ta nimba kat vilaa kwunatndi. ³⁶Nima sakwat nimba kat vilaa ndi kat miwa yiga lindi ndi. Ndu nyan viga lilapman sip sip ta vak vla lindi. Ngi kat tiga ndi kat miwa yiga lindi. ³⁷Ndi kat miwa yiga liga ndina kwupmba la nimba kat wandi. Nima sakwat kiginda ambugapmba kwo liga ak wuligandi. Vilaa sigika kiya nimba kai. ³⁸Ambukat kat viga liga njambwi nyan kat wagala ngwula. Nima sakwat nimba kat ay wamin maa ambugatna kiginda sigika kiyaigandi waa wagala ngwula njambwi nyan kat waa wandi Jisas.

TAMBA VILI KIYELI VILILIK JISASNA KWUPMBA LA APOSELNA SI

10 ¹Jisas wandi maa ndina kwupmba la tamba vili kiyeli vililik nimba yisolaa lindi. Yisolaa lindi maa kavle waagan savilinjea kwondu ndi kat kwindi. Yelogwen kat kwaiga nimba kat kwunatnjea kwondu ndi kat kwindi.

²Wan tamba vili kiyeli vililik aposelna si kingiyan. Tat ta nyan Saimon waa Pita walinja nyan. Nat nyan Pitana yakwa nyan Endru. Nat vililik pali Sebedina nyan Jemsagwi Jono. ³Nat nyan Filip. Nat nyan Batolomyu. Nat nyan Tomas. Nat nyan Matyu. Ndi takis sanya klala nyana. Nat nyan Alfiasna nyan nat Jems. ⁴Nat nyan Tadias. Nat nyan nat Saimon. Ndi

ngepma ngepma yiga nat nimba nina kipma kat yalaa viga linjangat kai waa ngambulindi. Nat nyan Judas Iskeriot Jisas kat vatnyavat kamwin kwiga ndi kat simogwiya nyana.

JISAS WANDI MAA APOSEL NJIWWA KWUPMAK YINDI

⁵Jisas tamba vili kiyeli vililik nimba kat wandi. Ngwuk ngepma ngepma yiga njivwa kwuk ngwula. Juda ana ndi nat nimbana ngepma ke yingwa. Sameria liga nimbana ngepma ke yingwa. ⁶Juda liga ngepma ngepmat ay ngwula. Wundi Juda nima nyan kat pogwula liga sip sip vla ligandi. ⁷Yiga ndi katambuk ngwula. Nginangwupmba liga nima nyan nin kat viga lindeya njimbla tamba ngway tologandi waga yiga ndi kat mbuk ngwula. ⁸Yelogwen kat tigiya nimba kat vilaa kwunak ngwula. Kiya nimba kat vilaa wangwuk mala laakiyandi. Kawia kiga ligiya nimba kat yiga vilaa kwunakngwuk mala kwo ligiyandi. Kavle waagan tavila ligiyaa nimba kat vilaa savilimba ngwuk. Wunamba la kwondu kwo klangwuk. Wun kat wenga kwilaa ana klangwuk. Ngi kat tiga yiga ndi kat kwo kwunak ngwula. Ndina wenga ke klangweya.

⁹Moni sanya kwuka wana yilingweya. Yimbwi kwuka wana yilingweya. ¹⁰Mandip waavwi mandip man su vasi vasi ke kwutaa yiga. Ngwuk njivwa kwutiga nimba ngwuk. Njivwa kwukngwuk maa ngwuk kat wan da kwigiyandi.

¹¹Ngepma wuleilaa wuna ngay yagwa waiga nyan kat vilaa ndina ngay wuleigiyangwuk. Ngay ngay ke yilingweya. ¹²Ngay wuleilaa apma nandinya waga apma vat tigiayangwuk waa waigangwuk ndi kat. ¹³Wuleingwuk maa ngwuk kat yagwa wanjeyan apma nyaangit wangwa nyaangit ndinamba tigiya. Wuleingwuk mala ngwuk kat kai wanjeyan wangwa apma nyaangit lungwamata ngwula lak yaigandi. Lungwamataa ngwula lak yandi maa ndi kavle savle tigiya. ¹⁴Wan ngaymba ligiya nyan wan nima ngepmamba ligiya nyan ngwuk kat kai wandeyan wan ngepma kwagalavat laataa man mbaw vivlilaa kwagalalaa laataa ayamba ngwuk. Ngwuk viga ligiyangwuk. God ngwuk kat sigiyandi waa ndi kat waga man mbaw vivlimba ngwuk. ¹⁵Ngini yaiga nandinya God ndinyangu kat siga naguvat tindeya nandinya Sodom Gomora walinja kavle ngepmamba la nimba ndi nima vat dlaigandi. Ngwuk kat kai waiga ngepma nimba ndi nima nglei vat klaigandi.

NIMA SAKWAT NIMA VAK YAIGANDI WAA JISAS MBUTNDI

¹⁶Awuk ngwula. Ngwuk ngepma ngepma yivat yiligangwuk. Kavle waala sip sip kat valinda vla wundi nimba ngwuk kat kavle vat yigiyandi. Kamboy apma maawut yelavika yigumba yiliga vak vla ngwuk wupma ay ngwula. Namiyo yiliga vak kap ana yaligandi. ¹⁷Ngwuk yigumba viga ligiyangwuk. Nat nimba ngwuk kat kwutaa kotngwangat

kaligiyandi. Juda ngaangit ngambulinja ngay ngwuk kat kwutaa kalilaa vyaigandi. ¹⁸Wuna si wangwuk maa ngwuk kat kwutaa kaligiyandi. Njambwi king mat king ngwuk kat viga siga nagunjangat kaligiyandi. Ngwuk kat kalindi maa wan njambwi nimba kat kwutaa lingwa apma nyaangit ndi kat mbukiyangwuk. Juda ana ndi nat nimba ndino ndi kat mbukiyangwuk. ¹⁹Notngwangat kalindi maa kotmak tingweya nyaangit kat nimamba ke vaaka yelavikngweya. Ngwuk kat kwutaa kalindi maa kotngweya nyaangit ngwutna maawupmba mbukiyowun. ²⁰Mbukngweya nyaangit ngwutna nyaangit ana ndi. Nina nyaek kwigiya waagan ngwutna mbangimba tavindi maa mbukiyangwuk.

²¹Ngini yaiga kavle njimbla kavle vat nima sakwat yaigandi. Kita nyan ndina yakwa nda nyan kat kwutaa kotmak kalindi maa ndi kat kwutaa vatnyangiyandi. Nyaek ndino indina nyangu kat kwutaa kotnjangat kaligiyandi. Nyangu ndina nyaek nyime kat kai walaa nyaek nyime kat kwutaa kotmak kalindi maa vatnyagiyandi. ²²Wuna si ngwuk tamba kwutaa ligangwuk. Ngi kat tiga nima sakwat nimba ngwuk kat kai waigandi. Wan kavle njimbla ngilindi maa kwo liga wuna si kwutaa liga nimba ndi apma vat tiigiyandi. ²³Kita ngepmana nimba ngwuk kat kavle vat yinjeyan wan ngepma kwagalalaa vaaka nat ngepmat ay ngwula. Ngwuk kat wowun. Judana ngepma ngepma yiga mbutingweya njivwa kwiyatapman ana ngiligiyandi. Wun Godna vak simogwi liga nyan yilaa yawun maa wan njivwa ngiligiyandi.

²⁴Kwupmba liga nyan ndi kat viga liga simogwi liga nyana njambwi nyan ana ndi. Simogwi liga nyan ndi njambwi nyana. Njivwa kwutiga nyan wan njivwa kat viga ligiya njambwi nyana njambwi ana ndi. Njivwa kat viga ligiya nyan ndi njambwi nyana. ²⁵Kwupmba liga nyan ndi kat viga liga simogwi liga nyan linda vla lindeyan wovuna. Njivwa kwutiga nyan wan njivwa kat viga ligiya njambwi nyan linda vla lindeyan wovuna. Wun ngwutna njambwi nyan wun. Nat nimba wun kat wandi. Min waagana njambwi nyan min. Min Bielsebul min waa wun kat wandi. Ngwuk wuna kwupmba liga mbaapma nimba ngwuk. Ngwutno ngwuk kat kavle nglei si waigandi.

NDINYANGU GOD KAT MINA VAAKA LIGIYANIN

²⁶Ndinyangu ngwuk kat yigiya kavle vak kat nimamba ke vaaka yelavika lingwa. Ngwuk kat pagwuga kavle vat yilinja vak ngini nat nimba aywaa vigiyandi. Pagwulinja kavle nyaangit ngini nat nimba aywaa wukiyandi. ²⁷Mbambala ngwuk kat pagwuga mbutuwa nyaangit ngepma ngepma yiga kapmba mbukiyangwuk. Kan ngwuk kat mbutuwa nat nima sakwat nimba ana wutigandi. Ngwuk kat mina mbutigowun. Ngwuk wutaa yiga nima sakwat nimba kat kak kiya mbukiyangwuk ngepma ngepmamba. ²⁸Ngwuk kat vatnyagiya nimba kat ngwuk

ke vakngwa. Ndi ngwutna wundumbu kat ana vatnyagiyandi. God kat mina vaaka ali ngwula. Nina mbango wundumbu kat ya vitiga kavamba yiga alipsiga taagagiyandi. ²⁹Mat waavi kilinja waavi peni kita yaagilaa vililik klaigangwuk. Kan mat waavi kiyalinja vak kat nina nyaek ndi viga ligandi. Mat waavi ana kiyagandi waa wandeyan wan waavi ana kiyagandi. ³⁰Ngwulo ngwuk kat wupma viga ligandi. Ngwula nambumba liga yuwina sakwat viga siga naguga ligandi. ³¹Ngwuk ke vatingwa. Ngwuk kat viga ligandi. Mat waavi kat ngwuk kwulatigangwuk.

JISAS NINA NJAMBWI NYANA WAA WALINJA VAK

³²Kita nyan Jisas wuna njambwi nyana waa nat niimba kat wandeyan nyinangwuk tiga wuna nyaek kat vilaa wan nyana si waa ndi wuna nyana waa waigowun. ³³Kita nyan Jisas wandeyan nyinangwut tiga wuna nyaek kat waigowun. Wan nyan wuna nyan ana ndi waa waigowun.

JISAS KAO SINJANGAT YANDI

³⁴Kan kipmana nimba kao yilinja vak kat kalipmak ana yawun. Wungi vak kat ana yawun. Awat sowat kao sinjangat yawun. ³⁵Yawun maa nat nimba wun kat kai wandi maa nat nimba wun kat yagwa wandi, wungi vak kat tiga laataa awat sowat waliandi. Mat nyangu laataa ndina nyaek kat waliagiyandi. Taagwa nyangu ndino laataa ndina nyime kat waliagiyandi. Ndinyanguna taagwa laataa ndina lana nyime kat waliagiyandi. ³⁶Yawun maa kita ngaymba liliga nimba laataa waliaga kapma kapma nimingi vla ligiyandi.

³⁷kita nyan wun kat samat samat yelavitaa ndina nyaek nyime kat nima nima vat yelavitndeyan ndi ana wuna mbaapma wuleigiyandi. ³⁸God wandi, ndina njivwa kwupmat yawun. Nat nimba kai waa wun kat sinjeya vak kat ana vaakiyowun. Wun kat kwinda njivwa kwutapman yiga wuna kwupmba yalapman yindeyan wan nyan wuna mbaapma ana wuleigiyandi. ³⁹Kita nyan avla ndina mbangi kat mina yelavika kwo yetindeya vak kat mina yelavika lindyan ndi kavle yigiyandi. Kita nyan wuna njivwa kwuka ndina mbangi kat yelavitapman yindeyan ndi apma vat tigiyandi.

GODNANAMBA APMA WENGA KLANJEYA VAK KAT JISAS NDINA APOSEL KAT MBUTNDI

⁴⁰Kita nyan ngwuk kat apma vat yindeyan wan apma vat yinda vak wuna lak yaigandi. Kita nyan wun kat ay waa nyanat yaigandi. ⁴¹Kita nyan Godna nyaangit mbuka yetiliga nyan kat vilaa yagwa waa ndina ngayat kalindeyan wan apma vatna. Godna nyaangit mbuka yetiliga

nyan klaiga wenga ndino ngayat kwutaa kalia nyan klaigandi. Kita nyan apma nyan kat vilaa yagwa waa ndina ngayat kalindyan wan apma vatna. Apma nyan klaiga wenga wan di kat kwutaa ngayat kalia nyan ndino klaigandi. ⁴²Ngwuk ke maawut tiviga lingwa. Kita nyan wuna mbaapmamba la mat nyan kat vilaa ndi Jisasna mbaapma nyana walaa ndi kat kigin ngu kuvuk kwindyan ndi apma wenga klaigandi. Wan kwindi mat nda kat vilaa God ndi kat wenga kwigiyandi. Ndina maawut ana tivigiyandi waa wandi Jisas.

**JON NDINA MBAAPMAMBA LA NIMBA KAT
WANDI, JISAS KAT VIVAT YANDI**

11 ¹Jisas ndina mbaapmamba la tamba vili kiyeli vililik nimba kat yinjeya vak kat mbuka walaa ndi kat kwagalalaa nyaangit mbupmat laataa ngepma ngepma yindi. ²Ngu yagula Jon ndi kat kalambusmba taagandi, lindi. Kraist kwuta njivwa kat wutaa Jon ndina mbaapmamba la nimba kat wandi. Kraist kat yiga wagala ngwula. ³Wandi maa yiga Jisas kat wagalandi. Nin kat ambuk. Tat Jon njivia kwuka liga wandi. Kita nyan wuna kwupmba yaigandi wandi. Min kat wandi? E? Kanda kat wandi waa wagalandi.

⁴Jisas ndi kat kat wandi. Kwutuwa njivwa viga wukngwa vak lungwamataa yiga Jon kat ambuk. ⁵Mini kiyala liga nimba kwunakwun mala apma mina viligandi. Man kivi wata la nimba kwunakwun mala laataa apma man veiligandi. Kawia kiga la nimba wowun mala kawia kasiligandi, kwo liligandi. Waan wutapman nimba kat wowun mala laatigandi. kwondu kapman kwo liga nimba kat wan apma nyaangit mbutigowun. ⁶Kita nyan wun kat vilaa ndi God wandi, yaa nyana waa yelavika lindyan ndi apma maawut sika liga nyana waa wandi Jisas.

⁷Jona mbaapmamba la nimba Jon ta kavat lungwamataa yindi maa Jisas wan nima sakwat nimba kat Jon yeta vak kat ndi kat mbutndi. Jon ndinyangu lapman kavamba lindi, vivat yingwa njimbla ndi kat angamak yelavika yingwuk. Mwuk kwutindi, kipmamba liga yuwi ava yuvut yilinda vak vla liga nyana waa yelavika ndi kat vivat yingwuk? Kai. Jon wupma ana lindi. Ndi tagula nyana. ⁸Ndi apma waavwi kwuso liga nyana waa yelavika ndi kat vivat yingwuk? Jon wupma ana lindi. Apma waavwi kwuso liga nimba ndi apma ngayimba yetiliga nimba ndi. Ndi apma ngay kai. ⁹Ndi profetna waa yelavika ndi nat profet kat kwulatndi. Ndi ndina njambwi nyana. ¹⁰Tamba God waa nyaangit pilwuta nimba ndi Jon kat piliwutndi.

God wandi. Kan nyan wuna nyaangit mbutiga nyana.

Ndi tatak yiga mbukiyandi. Ngini yimeya yambi

kwukiyandi waa God wandi ndina nyan kat waa tamba la nimba piliwutndi.

¹¹Ngwuk wutaa yelavik ngwula. Kan kipmamba la nat nimba kat aywaa Jon ndi kwulatigandi. Nyinangwut wuleila nyan God viga liga mat nyan ndi Jon kat kwulakiyandi.

¹²Tat jon nyaangit mbuka yliindan yiga yaa kan mbambala kavle nimba wuna njivwa kalipmak kat waligandi. Kwutima njivwa nina maawupmba apgwup mila waa wun kat waligandi. ndina kwundi wutapman nyinangwupmba liga njambi nyan kipmamba liga nimba kat viga lindangat kan kwutuwa njivwa kwutigowun. ¹³Njambwi nyan kan viga lindeya vat tamba la profet mbutindi. Moses ndino wan nyaangit mbutindi. Jon ndino wan nyaangit mbutindi. ¹⁴Ndinai mbuta nyaangit wuka lingweyan apma vatna. Jon tamba la nyan Ilaija mbutnda vak vla mbutindi. Tamba la nimba piliwutndi. ngini Ilaija yaigandi waa piliwutndi Mbambala Ilaija tamba yalaa ligandi, Jona.

¹⁵Apma maawut yelavika ligiya nimba kan mbutuwa nyaangit kat wutaa yelavika ligiyandi. ¹⁶Mbambala kan kipmamba liga nimba kwuka yetinja vak ngwuk kat mbukiyowun. Ndi mat nyangu vla ligandi. Ngepma nindimba ndaa liga nat nyaangu kat waligandi. ¹⁷Mbangu kwundi waga tamba kwangu viyanin. Mbik ana mbangu veiga ligambik. Nin nglasa kwundi nglasika nglalinin. Mbik ana nglasaka nglaligambik. Yilina vak ana nina kwupmba yina vla yiligambik waa mat nyangu waligandi. ¹⁸Jon yalaa kiginda kivak kat kai walaa liga nima ngu ana kilindi. Mbambala liga mat nyangu vla liga nimba ndi kat vilaa wandi. manda kat wupma yiligandi. Ndi tungwengwan yiga nyana waa wandi. ¹⁹Wun Godna vak simogwi liga nyan yalaa kiginda kiga nima ngu kiliwun. Mbambala liga mat nyanagu vla liga nimba wun kat vilaa wandi. Ndi kavle nyana. Kiginda kiga nima ngu nima sakwat kiliga nyana. Takis sanya klaliga nimbo kavle vat yetiliga nimbana ali nyana waa walindi. Ndi God wandi, yelavika linja maawupmba ana ligandi. Kavle maawut yelavika ligandi. kwutuwa apma njivwa vilaa Godnonala liga kwutigandi waa waigangwuk waa wandi Jisas.

**KOROSINO BETSAIDO KAPANEAM WALINJA NGEPMA
KUVUKMBA LA NIMBA KAT JISAS KAI WANDI**

²⁰Nat ngepma vililik yiga wuleilaa Jisas nima sakwat nima njivwa kwutindi. Wan ngepma nimba kwutinda njivwa yilaa wan yetinja kavle vat ana kwagalandi. Tiga lina ngini wan ngepma wuleilaa wan ngepma nimba kat Jisas njika wandi. ²¹Ngwuk Korosin walinja ngepmamba liga nimba ngwuk kat ngini kavle vat yaigandi. Ngwuk Betsaida walinja ngepmamba liga nimbo ngwulo ngwuk kat kavle vat yaigandi. Tamba vingwa kwutuwa nima njivwa tamba la nimba Taia Saidon walinja ngepmamba la nimba viganjan ndina kavle vak kat kai waa kwagalagendi. Kavle vak kwagalalaa kavle waavwi ndina mbangimba

sitaa mbaw klalaa ndina mbangimba kwukendi. kwutndi maa vilaa nat nimba ndi kat vilaa wagendi. Ndina kavle vat tamba kwagalandi waa wagendi. ²²Ngwuk kat wowun. Ngwuk awuk ngwula. Ngini yaiga nandinya God ndinyangu kat viga siga nagundeya nandinya Taia Saidon walinja ngepmamba la nimba ndi kat God nima vat yigiyandi. Ngwuk ngwuk kat nima nglei vat yigiyandi. ²³Ngwuk Kapaneam valinja ngepmamba liga nimba nin apma vat tiganin nyinangwupmba liga nimba vla ligandin waa yelavika ligangwuk. Wupma yelavika lingwa vat ana nglaatndi. God ngini ngwuk kat kwutaa ya vitiga kavat yisenda kiyandi. Ngwutna ngepmamba kwutuwa nima njivwa tamba la ngepma Sodomba kwukewan ndi kavle yiga yetinja vak kat kwagalagendi. God ndi kat ana kwutaa vatngagendi. ²⁴Ngwuk kat wowun. Gini yaiga nandinya God nandinya Sodom walinja ngepmamba la nimba ndi kat God nima vat sigiyandi. Ngwuk ngwuk kat nima nglei vat sigiyandi waa wandi Jisas.

WUNA LAK YANGWEYAN NGWUK APMA YAT NJAWIYA LIGIYANGWUK

²⁵Wan nandinya Jisas ndina nyaek kat wandi. Wuna nyaek min nyinangwut kipma kat viga njambwi nyan min. Mina angwa vak apma nambu liga nimba kat ana simogwiwun. Save lapman tiga nimba kat mina simogwiwun. nambu liga nimba kat kai. Ndi kat ana simogwiwun. Wan yima vak apma vakna. ²⁶Min mina yelavipma maavupmba wupma yimin. ²⁷Wuna nyaek wun kat mina kwondu minai yelavika liga vat aywaa wuna lak kwimin. Wunai yelavika liga vat nat nimba ana viligandi. Min kita nyan mina viligamin. Minai yelavika liga vat nat nimba ana viligandi. Wun kita nyan viga ligowun. Yagwa walaa wunai simogwia nimba wundi nimba ndino viga ligandi waa nyaek kat wasimblalaa wumba kita vat tinda nimba kat wandi.

²⁸Nima vat tiga njivwa kwuka nima maawut yelavika liga nimba ngwut aywaa yagwa ngwuyla. Yalaa yat njawiaga apma maawut yelavika tingweya vat klaigangwuk. ²⁹Kwutuwa njivwa agwuk ngwula. Wun kao mbundi nyan ana wun. Ngwuk kat ana njika waigowun. Kwutuwa apma nima njivwa kita vat kwukngweyan apma vak yat njawiaga apma maawut yelavika lingweya vat klaigangwuk. ³⁰Wuna njivwa nima vat tiga njivwa ana ndi. Ngwuk kat kwiweya njivwa kwutingweyan ngwutna mbangi wiyo waavi laagagiyandi waa wandi Jisas.

NJIVWA LAPMAN NANDINYA KAT NGAMBULINDI

12 ¹Tiga liga ngini njivwa lapman nandinyamba Jisas ndina mbaapmamba la nimbonala yuwi sik watiga ambugava yindi. Yilaa yetiga liga ndina mbaapmamba la nimba wundi kat tindi. Tiga liga ndi yuwi sik pangwutaa kilindi. ²Kilinja vak kat Ferisi vilaa Jisas kat wandi. Ninai yetiliga vak kat kai valaa mina mbaapmamba liga nimba

njivwa lapman nandinyamba yuwi sik pangwutigandi. Wupma yinja vak ana nglaatndi. Kavle vatna waa wandi. ³Jisas wanja vak wutaa ndi kat wandi. Tamba Devit ndina mbaapma nimbonala wundi kat tiga kilinja vat tamba piliwutndi. Ngwuk ana vingwuk? ⁴Ndi wundi kat tiga Godna ngay wuleilaa God kat taaganja bret-nao klalaa kilindi. nina ngepmana vak God kat kwunatiga nimba mina kilindi. ⁵Njivwa lapman nandinyamba God kat kwunat tiga nimba Godna ngay wuleilaa God kat kwunapmak njivwa kwutigandi. Wan njivwa kwutinja vak Moses kwiya nyaangipmba ana wukngwuk? Njivwa lapman nandinyamba njivwa ke kwuka waa Moses waa nyaangit kat kai walaa ndi God kat kwunatiga nimba ndi njivwa kwutigandi. Ndi kat nyaangity ana ligandi. ⁶Tamba Moses kwila nyaangit kat kwulakiya nat nyaangit ngiliga. ⁷Tamba God wandi, Hosia piliwutnda nyaangitna angwa vat ngwuk ana viga ligangwuk?

God wandi. Kwanda kwanda vatnyalaa wun kat ke kwiga. Nat nimba kat nimamba yelavika kwunak ngwula waa wandi God

waa tamba Hosia piliwutndi. Kan nyaangitna angwa vak vigengwan apma vat yiliga nimba kat vilaa ngwuk kavle vat yiligangwuk waa ana wagengwuk. ⁸Wun Godna angwa vat simogwiliga nyan wun. Wun njivwa lapman nandinyana nima nyan wun. Wan nandinya wun kat njambiya ana taagagiyandi.

TAAMBA KIVI WATA LA NYAN KAT JISAS KWUNATNDI

⁹Jisas wan kava kwagalalaa Juda nyaangit ngambula ngay wuleindi. ¹⁰Taamba kivi wata la nyan kita wumba lindi. Jisas kavle vat yindeyan wovuna. Ndi kat kotndangat kaligiyandin waa yelavika liga nimba ndino wumba lindi. Ndi Jisas Kat wagalandi. Njivwa lapman nandinyamba kita nyan kat kwunapmeyan wovuna? waa wagalandi. ¹¹Jisas ndi kat wandi. Ngwutna kita nyana sip sip nima waangumba ndaindi maa ndi njivwa lapman nandinyamba taambamba kwutaa katsogiyandi. njivwa lapman nandinyamba kwutaa katsondeyan nyaangit kai. Nina ngepmana vat kingiyan. ¹²Ndu nyan sip sip kat kwulatigandi. Ngi kat tiga njivwa lapman nandinyamba kita nyan kat kwunakweyan nyaangit kai. nina ngepmana vat kingiyan waa ndi kat walaa ¹³taamba kivi wata la nyan kat wandi. Mina taamba agiya wandi maa taamba kwindi. kwindi maa ndina taamba kwo lindi. Ndina nat taamba vla lindi. ¹⁴Ferisi vilaa wan ngay kwagalala Jisas kat vatnyanjeya vak kat yelavika lindi.

JISAS GODNA NJIVWA KWUTIGA NYAN

¹⁵Jisas ndi kat vatnyanjeya vak kat wutaa Jisas wan kava kwagalaa nat ngepmat yindi. Nima sakwat nimba ndina kwupmba yindi. ndina

nat nimba yelogwen kat ta nimba. Yelogwen kat ta nimba kat aywaa kwunatndi. ¹⁶Kwunataa wandi. Wuna si nat nimba kat ke yiga mbuka wandi. ¹⁷Wupma kwo ana wandi. Tamba profet Aisaia piliwukna nyaangit vla ndi kat wandi.

¹⁸God wandi. Wan nyan wuna njivwa kwutga nyana. Kwutndeya njivwa ndi kat kwiwun. Ndi kat viga yelavika solat siligowun. Wuna waagan ndi kat kwiwun ndina mbangimba tavindi maa wuna angwa vat aywaa ndinyangu kat mbukiyandi. ¹⁹Ana nima kwundimba njika waigandi. Nindi ava yambimba laataa ana nima kwundimba waigandi. ²⁰Vita liga suwa ana nagi vili mbiligiyandi. kwunakiyandi. Samat samat vigiga lam ana kwutnyagiyandi. Kwunatndi maa nima vak vikiyandi. Njivwa kwuka yiga apma vak kwulakiyandi. ²¹Nima sakwat nimba ndi kat vilaa waigandi. Ndi nin kat kwunatiga nyana waa waigandi waa wandi God waa tamba piliwutndi Aisaia.

JISAS BIELSEBULNOGWINALA KFTA VAT NJIVWA KWUTIGANDI WAA JISAS KAT WANDI

²²Kita nyan kavle waagan ndi kat tavila lindi maa ndina mini kwita liga ndina tigat kulumatndi, lindi. Wan nyan kat kwutaa Jisas la kavat kalindi. Kalindi maa Jisas kwunatndi maa wan nyan mini viga kwundi ngambundi. ²³Wumba la nima sakwat nimba vilaa ngipaliga ndalaa wandi. Ndi Devitna yelangimba la nyan anaga ndi. Nin Juda nin kat kwunatiga nyan anaga ndi waa wandi. ²⁴Walinja vak Ferisi ndino tiga wutaa wandi. Wupma wangwa vak ana nglaatndi. Waagana njambwi nyan Bielsebul ndi kat kwondu kwindi maa waagan kat savililigandi waa wandi.

²⁵Ndina maawupmba yelavika linja vak kat Jisas vilaa ndi kat wandi. Kita ngepma nimba mbaapma vililipmba liga awat sowat siga viyanjeyan wan ngepmamba liga nimba aywaa ngiligiyandi. Kita ngaymba liga nimba mbaapma vililik tiga awat sowat siga viyanjeyan wundi nimba ngiligiyandi. ²⁶Setena mbaapmamba liga nimba ndion wungi vat sigit. Mbaapma vililik tiga awat sowat siga viyanjeyan ndina mbaapmamba liga nimba ndiono ngiligiyandi. ²⁷Beklsebul ndi kat kwondu kwindi maa waagan savililigandi waa wun kat waligangwuk. Ngwutna mbaapma nimba ndino waagan kat savililigandi. Ndi kat kand kwondu kwindi maa waagan kat savililigandi. Wun kat walingwa vat ndina lak yigiyandi. ²⁸Walingwa vak ana nglaatndi. Godna waagan wun kat kwondu kwindi maa kavle waagan kat savililigowun. Savililuwa vak vilaa God nin kat kwutnatndeya njimbla tamba ngway tologandi waa yelavik ngwula.

²⁹Tagula ava la kavle nyan ndina man taamba yaawmba sangilapman tiga ana alipsiga ndina ngay wuleilaa ndina kwanda kwanda kwutaa kaligiyandi. Ndi kat man taamba sangilaa mina ndina nda kwutaa kaligiyandi. Seten ndino ndi kat man taamba sangilaa mina ndina kwupmba liga kavle waagan kat saviligiyandi.

³⁰Kita nyan wunogwinala njivwa kwutapman yindeyan wan nyan wun kat kai waliga nayna. Wun ndinyangu kat kwutaa kiyaa wuna mbaapmamba taaga ligowun. Kita nyan wunogwinala taagalapman yindeyan wuna mbbapma liga nimba kat savililiga nyana.

³¹Ngi kat tiga ngwuk kat wowun. Yigumba awuk ngwula wowun ngwuk kat. Kita nyan kavle vat yiga yetiga kavle nyaangit ngambundeyan ndinai yiga yetiga kavle vak God alipsiga silimbwigiyandi. ³²Wun Godna vak simogwi liga nyan wun. Kita nyan wun kat kavle nyaangit ngambundeyan God ndi kat alipsiga silimbwigiyandi. Godna waagan kat kavle nyaangit ngambundeyan wupma ana silimbwigiyandi. Ngini nimbun ana silimbwigiyandi.

KAVLE MI KAVLE SIK KWAIGANDI WAA WANDI JISAS

³³Apma mi mina apma sik wogwulaa kwaigandi. Kavle mi ndi kavle sik mina wogwulaa kwaigandi. Mina sik vilaa wan mi kat vilaa ndina si yelavika ligiyangwuk. ³⁴Wan apma mi kavle mi tinda vak vla ngwulo ndinyangu wupma ligangwuk. Ngwuk apma nyaangit ana alipsiga ngambuligangwuk. Ngwuk kavle kamboyna nyangu vla ligangwuk. ³⁵Apma maawut yelavika yetigiya nyan ndi apma njivwa kwuka apma nyaangit ngambuga yetigiyandi. Kavle maawut yelavika yetigiya nyan ndi kavle njivwa kwuka kavle nyaangit ngambuga yetigiyandi.

³⁶Ngwuk kat wowun. Awuk ngwula. Ngini yaiga nandinya God ndinyangu kat siga nagundeya nandinya kavle nyaangit ngambungwa nyaangit kat aywaa God ngwuk kat wagalagiyandi. Wagalalaa kavle wenga kwigiyandi. ³⁷Ngambungwa apma nyaangit kavle nyaangit wuka siga nagulaa ngwuk kat waigandi. Min kavle nyan min. Min apma nyan min waa ndinyangu kita kita kat waigandi God waa wandi Jisas.

NIMA NJIVWA AGWUT MHLA WAA JISAS KAT WANDI

³⁸Jisas wandi maa Moses kwiya lo simogwi liga nimbagwi Ferisio ndi kat wandi. Simogwi liga nyan. Apma nima njivwa kwupmin maa vigiyanin waa wandi maa.

³⁹Jisas ndi gat wandi. Ngwuk mbambala yetiliga nimba ngwuk kavle nimba ngwuk. Godna vak ana viga ligangwuk. Apma nima njivwa kwukwangat wangwuk. Wangwa vak vla ana kwukiyowun. Tamba la profet Jona kwukna vak vla kwukiyowun. ⁴⁰Jona nandinya kuwuk nima kamina yapmba tindi. Tiga liga wogwendi. Wun Godna vak

simogwi liga nyan wun. Wuno waangumba nandinya kuvuk ngan kuvuk tiga laakiyowun. ⁴¹Ngini yaiga nandinya God ndinyangu kat viga siga nagundeya nandinya Nineva walinja ngepmamba ta nimba laataa ngwuk kat vilaa waigandi. Tamba la profet Jona mbukna nyaangit wutaa kavle vat yiga yetina vak kwagalanin waa waigandi. Ngwuk Ferisio Mosesna nyaangit simogwi liga nimbo Jonana njambwi nyan mbukna nyaangit wupmak kat kai wangwuk. ⁴²Ngini yaiga nandinya kambangwapmba tiga Solomon kat vivat yat njambwi lagwa kwini laataa ngwuk kat vilaa waigali. Tamba wun Solomona kwundi ngambulinda vat wupmak laataa sivla mbundimba liga yawun. Yalaa ndina ngambulinda apma kwundi wutwun waa waigali wat njambwi lagwa. Ngwuk Solomona njambwi nyana kwundi wupmak kat ngwuk kai wangwuk waa wandi Jisas.

KAVLE WAAGAN YILAA LUNGWAMATAA YANDI WAA WANDI JISAS

⁴³Kavle waagan kita nyan kat kwagalalaa kwo kavamba yiga yi ya yetiga liga tindeya ngay kat kwaka yetindi. Wan yetinda kavamba ngay lilapman yindeyan yelavitndi. ⁴⁴Tamba luwa ngayat lungwamataa yigiyowun waa yelavita lungwamataa yandi. Yalaa vindi. Wan ngay tamba yaguga kwunaka yelagandi, kwo lindi. ⁴⁵Yalaa vilaa kavle waagan sila vili kat yiga walaa kita vat yandi. Yalaa wan ngay wuleindi. Ndi waagan sila vili vili kita la waagan kat kavle vapmba kwulatndi. Ndina ngay vla liga wuleinja nyan tak kavle savle lindi. Wuleindi maa mbambala kavle klei yilaa ligandi. Kavle klei linda vak vla kan mbambala klei liga nimba ndino kita vatna.

JISASNA NYIMEO YAKWA NIMBO

⁴⁶Jisas ngaymba ngambulindi maa ndina nyimeo sambo yandi. Alagumba liga ndi kat wandi. ⁴⁷Ngaymba la kita nyan ndi kat vilaa Jisas kat wandi. Mina nyime yakwa nyangu kindi kiyandi yalaa alagumba liga min kat waliga waa wandi. ⁴⁸Wandi maa Jisas ndi kat wandi. Wuna nyime wuna sambu ngwuk visimogwi kiyowun walaa ⁴⁹ndina mbaapmamba la nimba kat ndinogwinala lindi, taamba siga wandi. Avi mila. Wuna nyime wuna yakwa nimba kindi kiyandi liga. ⁵⁰Nyinanangwupmba liga wuna nyaek wa vapmba yetigiya nimgba wuna nyime, wuna sambu, wuna nyange ndi.

KILINJA NDANA SIK YAAGI LIGA NYAN KAT JISAS MBUTNDI

13 ¹Wan nandinya Jisas ngay kwagalalaa sat ta tivagawiat wogwendi. Wogwelaa ndaa liga ndinyangu kat nyaangit mbutindi. ²Nima sakwat ndu lagwa ndina nyaangit wupmat yalaa tindi, ndi kat vilaa tamataa njaambitnat wuleilaa ndaa lindi. Nima sakwat ndu lagwa tivagawimba yisolaa lindi, ndi kat nyaangit mbutindi. ³Ndi kat pagwuga mandit mandit

nyaangipmba nima sakwat nyaangit ndi kat mbutindi. ⁴Mbuka walindi. Tak kita nyan tindi. Ndi yuwi sik ambugapmba yaagivat yindi. Yaagilindi maa nat sik ava yambimba ndandi, waavi yalaa vilaa kindi. ⁵Nat sik kambat tiga kava tagu kipma kuvut ta kavamba ndandi. Ndalaa kwiyatapman kandi waatndi. ⁶Njingwut tamba lindi maa nya singwalitndi, njingwut law wandi, kiyandi. ⁷Nat sik kavle yuwi sik tiga kavamba ndandi. Kavle yuwi wataa tegilindi mala sik ndina sik ana kwandi. ⁸Nat sik apma kipmamba ndandi. Ndandi, sik kwandi. Nat avamba sik ndumi tambanat kwandi. Nat avamba sik kita ndumi kuvuk kwandi. Nat avamba sik kita ndumi kiyeli tamba vili kwandi. ⁹Apma maawut sika ligiya nyan kan mbutuwa nyaangitna angwa vak kat yelavika ligiyandi waa wandi Jisas.

PAGWUGA MANDIP MANDIP MBUTINDA NYAANGITNA ANGWA VAK

¹⁰Jisas mbutindi, wuka liga yalaa ndina mbaapmamba la nimba ndi kat wagalandi. Manda kat pagwuga mandit mandit nyaangipmba ndi kat mbutimin waa wagalandi. ¹¹Jisas ndi kat wandi. nyinangwut tiga nima nyan nin kat viga lindeya vatna angwa vak ngwuk kat tamba simogwiwun. Nat nimba kat ana simogwiwun. ¹²Apma maawut sika ligiya nyan nima sakwat nyaangit wutaa wan nyaangitna angwa vat wutaa yelavika ligiyandi. Ndi apma vat yelavika lindeyan ndinamba nima sakwat apma nyaangit tigiyan. Apma maawut sitapman tigiya nyan nima sakwat nyaangit wutaa wan nyaangitna angwa vak ana yelavika ligiyandi. Apma nyaangit wuka liga yigumba yelavitapman yilaa waigandi. A. Mbutinja apma vak yigumba ana yelavikowun. Wun tungwengwan yiga ligowun waa waigandi. ¹³Ngi vak kat tiga ndi kat pagwuga mandip mandip nyaangitmba mbutiwun. Ndi mini viga apma maawut yelavitapman tigandi. Ndi waan mina wuka apma maawut yelavitapman tigandi. ¹⁴Wupma ana kwo yiligandi. Tamba la profet Aisaia piliwutnda vak vla wupma yiligandi. Tamba kupma piliwutndi.

God wandi. Ngwuk waan mina wuka mini mina viga apma maawut yelavitapman tigangwuk.

¹⁵Wundi nimba yelavika liga maawut apma maawut ana ndi yelavika linja. Ndina waan tivilaa ligandi.

Ndina mini kwita ligandi. Mini viga waan wutnjeyan ndi viga wuka yelavikiyandi wan apma vak kat. Viga wuka maawupmba yelavita wun kat vivat yandi maa ndi kat kwunakiyowun waa wandi God

waa tamba piliwutndi Aisaia.

¹⁶Ngwuk apma vat tigangwuk. Ngwuk mini viga waan wuka apma vat yelavika ligangwuk. ¹⁷Ngwuk yelavik ngwula. Tamba la Godna njivwa kwuta nimbagwi profetno vilingwa vak ndino vivat walindi. Ana vilindi. Waamba wutingwa vak ndino wupmak walindi. Ana wutindi.

NYAANGITNA ANGWA VAT

¹⁸Awuk ngwula. Kilinja ndand sik yaagi liga nyana pogwuga liga nyaangitna angwa kingiyan. Ngwuk kat mbukiyowun. ¹⁹Godna nyaangit wutaa maawupmba yelavika yetilapman yiliga nimba ndi ava yambimba nda yuwi sik vla ligandi. nyaangit wuka lindi maa Seten yalaa wan nyaangit klalaa yiga pagwuligandi. ²⁰Godna nyaangit wutaa ndi kwiyatapman klala nimba kambat ta tagu kipma kuvut ta kavamba nda yuwi sik vla ligandi. ²¹Nimamba ana wan nyaangit kwutaa ligandi. manda kat wan nyaangit kwuta ligangwuk waa waliaga liga wanjeyan wan nyaangit kwagalagiyandi. ²²Kavle yuwi liga kavamba nda liga yuwi sik nat nimba vla ligandi. Ndi Godna nyaangit wutaa yigumba ana yelavika ligandi. Kan kipmamba liga kwanda kwanda klavak mina yelavika ligandi. Ndi God waa njivwa ana kwutigandi. ²³Apma kipmamba nda liga yuwi sik nat nimba vla ligandi. nyaangit wutaa maawupmba yelavika God waa njivwa kwutigandi. Nat nyan sik ndumi tambanat kwa vak vla nima nglei sakwat apma njivwa kwukiyandi. Nat nyan sik ndumi kuvuk kwa vak vla nima sakwat apma njivwa kwukiyandi. Nat nyan sik kita ndumi kiyei tamba vili kwa vak vla apma njivwa kwukiyandi waa wandi Jisas.

KAVLE YUWI WAATIGA NYAANGIT

²⁴Jisas pagwuga nat nyaangitmba mbutindi ndi kat. Nyinangwupmba liga njambwi nyan nin kat viga lindeya vak kupma ligandi. Kita nyan ndina ambugapmba yuwi sik yaagindi, kandi waatndi. ²⁵Ngan sindu kwandi maa ndina maama nyan yalaa ambugapmba kavle yuwi sik yaagindi. Yaagilaa yindi. ²⁶Kavle yuwi sikno apma yuwi sikno kita kandi waapik, kavle yuwi waataa linda vak kat vindi. ²⁷Vilaa njivwa kwuta nimba yiga njambwi nyan kat mbutndi. Njambwi nyan mina ambugapmba kavle yuwina sik kandana yaagia. Ngi kandi waataa lindi vina kavle yuwi waa mbutndi maa njambwi nyan wutaa wandi.

²⁸Wuna maama nyan ngan yalaa wan kavle yuwi sik yaagindi. Wandi maa wandi. Wamin maa kavle yuwina kandi pika yaagiygiyanin waa wandi. ²⁹Njambwi nyan wutaa kai wandi. Kavle yuwina kandi pipmak yingweyan apma yuwina kandio mbak pitangwuk. Ke yiga pika. Tigandi. ³⁰Nima yilaa sik kwandi maa kilinja yuwina sik sigitiga nyangu kat waigowun. Kavle yuwi tat pitaa saymba sangilaa yamba tulaa apma yuwi sik sigitaa wuna ngayimba yiga taaga waa waigowun waa wandi njambwi nyan waa wandi Jisas.

MASTET WALINJA SIKNA NYAANGIT

³¹Jisas ndi kat pagwuga nat nyaangitmba mbutindi. Nyinangwupmba liga nima nyan ndinyangu kat viga lindeya vak mastet walinja sik vla

ligandi. Wan sik mak nglei nda ndi. ³²Kita nyan wan sik ambugavamba yaagindeyan waakiyandi. Kaawa ava vla waakiyandi. Nima sando ligiyandi. Waavi yalaa ndinamba ngay kwuka ligiyandi waa wandi Jisas.

YISNA NYAANGIT

³³Jisas ndi kat pagwuga nat nyaangitmba mbutindi. Nyinangwupmba liga nima nyan ndinyangu kat viga lindeya vak yis vla ligandi. Kita lagwa yis kwutaa wit milmba taagali maa kikik waga nima yigiyandi waa wandi Jisas.

PAGWUGA NAT NYAANGIT MINA JISAS MBUTINDI

³⁴Jisas wan nima sakwat ndu lagwa kat pagwuga nat nyaangitmba mina mbutindi. Kapmba ana mbutindi. ³⁵Wupma kwo ana mbutindi. Tamba Jisas kat kupma piliwutndi.

Ndi kat pagwuga mandit mandit nyaangitmba mbukiyowun. Tamba kipma kwutndi mala lindi, vilapman yilinja vak ndi kat visimogwi kiyowun waa tamba piliwutndi tamba la profet.

KAVLE YUWI WAAT TIGA NYAANGITNA ANGWA

³⁶Wan nima sakwat nimba Jisas kat kwagalalaa ndina ngay wuleindi. Ndina mbaapmamba la nimba mina ndinagwinala lindi. Tiga liga ndi kat wandi. Kavle yuwi waat tiga nyaangitna angwa nin kat ambuk mila waa wandi.

³⁷Jisas ndi kat wandi. Apma yuwi sik yaagi liga nyan wunayi God na vak simogwi liga nyan. ³⁸Ambugat kan tina kipma. Apma yuwi sik God viga liga apma nimba ndi. Kavle yuwi Setena mbaapmamba liga nimba ndi. ³⁹Kavle yuwi sik yaagiliga wuna maama nyan Setena. Yuwi sik sigitnjeya njimbla ngini yaiga njimbla. Yuwi sik sigitiga nimba ni ensel ndi. ⁴⁰Kavle yuwi pitaa saymba sangilaa yamba tunja vak vla ngini yaiga njimbla kavle nimba kat wupma yigiyandi. ⁴¹Ngini wun Godna vak simogwi liga nyan wun ensel kat wowun maa ndi God viga liga kava kava yiga kavle nimba kat kwutaa man taamba sangilaa ⁴²ya vitiga kavamba yaagigiyandi. Nat nimba kat kavle vat ay waliga nimba kat ndino ndi kat wupma sangilaa yaagigiyandi. Yaagindi maa nglaga nimbi ngliaka kavle savle ligiyandi. ⁴³Wan njimbla Godna nimba ndi apma vat tigiyanidi. Nat nimba ndi kat vilaa ndi apma nimba ndi waa waigandi. Ndina nyaek viga liga kava kava ndi viga ligandi. Mbutuwa vak wutaa ngwula maawupmba yelavik ngwula waa wandi Jisas.

PAGWUNJA NDA KLA NYANA NYAANGIT

⁴⁴Nyinangwutmba liga nima nyan ndinyangu kat viga lindeya vak kupma ligandi. Kita nyan kipmamba vaangunja apma kwanda kwanda

yiga waangu vaga vindi. Vilaa ak wumba yambi kipma tegililaa ndina kwanda kwanda aywaa kwilaa sanya klalaa yiga wan kipma sanya yaagilaa klandi waa wandi Jisas.

**NĪMA SAKWAT SANYA KWILAA KLALĪBJA BIS
WALĪNJA YELAGA NDANA NYAANGIT**

⁴⁵Nyinangwutmba liga nima nyan ndinyangu kat viga lindeya vak kupma lignadi. Kita nyan nima sanyo liga apma bis kat kwatindi.

⁴⁶Kwaka yiga apma nglei bis vindi. Vilaa ndina kwanda kwanda aywaa kwilaa sanya klalaa yiga wan bis sanya yaagilaa kalndi waa wandi Jisas.

NJULANA NYAANGIT

⁴⁷Nginangwupmba liga nima nyan ndinyangu kat viga lindeya vak njula vla ligandi. Njula yiga ngumba yisendalaa mandit mandit kami wan njulamba ndandi. ⁴⁸Ndandi, kwuta nimbak kalindi. kalilaa apma kami mbaymba laagalaa kavle kami klalaa kai waa yaagilindi. ⁴⁹Ngini yaiga nandinya wupma njulamba kwutnja kami vla ligiyangwuk. Nima nyana ensel yi ya apma nyangu kavle nyangu kat mbaapma vililikmba viyaseli viyasela taagagiyandi. ⁵⁰Kavle nimba kat kwutaa ya vitiga kavamba yaagigiyandi. yaagindi maa nglaga nimbi ngliaka kavle savle lzigiyandi.

TAMBA NDA KUPI NDAGWI TA NYAN

⁵¹Jisas ndi kat wagalandi. Mbutuwa nyaangit wutaa yelavika ligangwuk? Waa wagalandi maa awa wuka liganin wandi. ⁵²Jisas ndi kat wandi. Kita nyan Moses kwiya lo simogwiga liga nyan nyinangwut tiga nima nyana mbaapma wuleindyan wan nyan kingi vat tigiyan. Kita nyan ndina ngayna kwanda kwanda taagalinda ngay wuleilaa tamba la nda kupi nda klalaa ndina ngay alagu ngemba taagandi waa wandi Jisas.

NASARETMBA LIGA NIMBA JISAS KAT KAI WANDI

⁵³Jisas pagwuga mandit mandit nyaangit mbuka liga kwagalalaa laataa ndina angwa ngepmat yindi. ⁵⁴Angwa ngepma yilaa Juda nyaangit ngambulinja ngay wuleilaa ndi kat nyaangit mbutindi. Wuka la nimba ngiipali walaa ndi awat sowat ngambulindi. Maawupmba yelavitinda vak ndi kat kandana kwiya. Kwunatinda nima njivwa mandamba kwutigandi. ⁵⁵Ndina nyaek ngay kwuta nyana. Ndi Mariana nyana. Jems, Josis, Saimon, Judas ndina nyamwun ndi. ⁵⁶Ndina nyange ndu ninogwinala yetiligandi. An yiga yetilinda vak andamba klandi waa awat sowat ngambulindi. ⁵⁷Ngambuga liga ndi kat kai wandi. jisas ndi kat wandi. God waa nyaangit mbutiga nyan kwo ngepmamba lindeyan ndi kat apma maawut yelavika ligiyandi. Ndina angwa ngepmamba lindeyan ndina angwa ngepmana nimba ndi kat kai waigandi waa wandi Jisas. ⁵⁸Wungi

kat tiga ndina angwa ngepmamba apma nima njivwa ana kwutndi. Mat njivwa mina kwutndi. Ndina mbangi ndi kat vindi mala vali yindangat ana kwutndi.

NGU YAGULA JON KIYANDA VAK

14 ¹Wan njimbla Galilina njambwi nyan Herot Jisas kwuta njivwa kat wutndi. Wutaa wandi. ²Ndi nambu kalikwa ngu yagu la Jon. Kiyalaa liga laatndi. Kiyalaa liga laataa kwondu klalaa wan nima njivwa kwutigandi waa ndina kwupmba la nimba kat wandi.

³Tat Herot wandi maa Jon kat kwutaa man taamba sangilaa kalabusmba taagandi, lindi. Herotna yakwa nyan Filipna taagwa Herodias wali maa Jon kat kalabusmba taaga waa wandi Herot. ⁴Tak ngu yagula Jon yalaa Herot kat walindi. Mina yakwa nyana taagwa sikwuka klama vat ana nglaatndi. Ndi ana wundumbu yindi. Kwo ligandi waa walindi maa ⁵Herot ndi kat vatnyavak kat yelavika lindi. Nima sakwat Juda ndi yelavitndi. Ndi ngu yagu liga Jon God waa nyaangit mbutiga profetna waa yelavika lindi. Herot ndi kat vaaka liga Jon kat ana vatnyandi.

⁶Herot kat kwutnja nandinya nima kiginda kwutndi. Kwutaa wandi, nima sakwat nimba yandi kwutnda kiginda kivak. Yandi maa Herodiasna taagwa nyan laataa mbangu veilili maa viga lindi. Herot viga liga mbangu veila vak kat woviyaguga liga wandi. ⁷Klavat wanyeya nda wun kat mbukiyanyin. Nyin kat kwigiyowun. Woseka ana wowun wawa wandi Herot. ⁸Li yiga nyime kat wagalalaa yaa Herot kat wali. Ngu yagu la Jona nambu kalitaa wun kat yaanjimba taagalaa agwi wali.

⁹Herot wutaa Jona nambu kalipmak kat ndina mbangi kilip mbangi yindi. Woseka ana wowun waa wanda vat aywaa wumba la nimba wutndi. Ngi kat tiga wandi maa ¹⁰yiga kalabusmba lindi, ndina nambu kalitndi. ¹¹Nambu kalitaa yaanjimba taagalaa Herodiasna taagwa nyan kat kwindi. Wan yaanjimba taagalaa kwinja nmbu klalaa nyimeat yiga kwili. ¹²Jona mbaapmamba la nimba nambu kalitnda vak kat wutaa yalaa Jona sim klalaa yiga waangumba valaa taagandi. Taagalaa Jisas kat yiga mbutndi.

JISAS 5,000 TA NIMBA KAT KIGINDA KWINDI

¹³Mbutndi maa wutaa Jisas wan kava kwagalalaa ndinyangu lapman kavat njaambit kulaa yindi. Yinda vat wutaa nima sakwat nimba laataa ndi kat vivat yindi nimbumba. ¹⁴Kawiga liga yanja vak kat vindi. Ndi kat vilaa miwa yiga lindi. Miwa yiga liga ndina yelogwen kat ta nimba kat kwunatndi.

¹⁵Wan nglaambu ndina mbaapmamba la nimba yalaa Jisas kat wandi. Kan kava kwo kava kiginda klaneya kava kai. Ngan lamba ndaiveigandi.

Wamin maa ngepmat yilaa kiginda klaandi waa wandi. ¹⁶Wandi maa Jisas ndi kat wandi. Ndi ana yigiyandi. Ngwuk ndi kat kiginda agwi ngwula waa wandi maa ¹⁷wandi. Nima kiginda nima sakwat ana ligandi. Nao tambanat kami vililik mina ligandi waa wandi.

¹⁸⁻¹⁹Wandi maa Jisas wandi. Wan nao kiginda agwi ngwula wuna lak waa walaa nima sakwat nimba kat vilaa ngwuk yuwimba ndaa ali ngwula waa walaa wan nao kiginda klalaa tanambika vilaa God kat sivu kilaa wan nao tamba lambi limbaga ndina mbaapmamba la nimba kat kwindi. Ndi yiga wan nima sakwat nimba kat kwindi. ²⁰Kilindi, yaat taati. Kilambiga kwagalanja nao kiginda aposel mbanimba tamba vili kiyeli vililikmba naagandi. ²¹Ka ndi nimbana sakwat 5,000 nimba. Taagwa nyangu kat ana siga nagundi. Ndu mina siga nagundi.

JISAS TAGU NGUMBA VEIGA YALINDI

²²Jisas ndina kwupmba la nimba kat wandi. Njaambit kulaa yindi maa wan ndinai la kavamba la nima sakwat nimba kat wandi. Ngwuk ngepma ay ngwula wandi, yindi. ²³Yindi maa God kat nyaangit ngambuvat nduwiat wokendi. Wumba kapma lindi, ngan ndandi. ²⁴Ngan ndandi, kulaa yinja njaambit nindi sapmba lindi maa mwuk ndina ndaama njaambipmba viyalindi, nima pali laataa kiyalindi. ²⁵Ngambi ngan Jisas tagu ngumba veiga ndi kat vivat yalindi. ²⁶Ndina kwupmba la nimba ndi kat vilaa vaaka kiselaga wundumba yaliga waa walindi. ²⁷Jisas ndi kat wandi. Ngwula maawut ke nimamba yelavika vakngwa. Wun Jisas wun yaa ngwuk kat vivat waa wandi.

²⁸Wandi maa wutaa Pita ndi kat wandi. Njambwi nyan minayi? Mina lat timeyan wun kat wamin maa ngu tagumba veiga minai liga kavat yalu wandi. ²⁹Wandi maa Jisas yagwa wandi. Pita njaambit kwagalalaa ngu tagumba veiga yilindi. ³⁰Yiga liga mwuk pali kat vilaa vaaka yelavita lumaka ndaivat yindi. Lumaka ndaivat tiga wandi. Njambwi nyan wun kat yaa kwutaa katso wandi.

³¹Jisas yalaa ndi kat taambamba kwutaa katsolaa wandi. Minai yelavika liga vat nima ana ndi. manda kat vapmin. Vapmangat tiga lumaka ndaivat yimin waa wandi maa ³²mbit njaambit yiga kumbit. kumbit maa kwuta mwuk pali kiyak wandi. ³³Kiyak wanda vak kat vilaa ndina mbaapmamba la nimba Jisasna si kwutaa katsoga wandi. min Godna nyan min waa wandi.

GENESARETMBA LA YELOGWEN KAT TA NIMBA KAT JISAS KWUNATNDI

³⁴Njaambipmba valigelaa Genesaret walinja ngempamba kawindi. ³⁵Kawindi maa wan ngepmamba la nimba Jisasna mindama vilaa yanda vak yiga mbutndi. Mbutndi maa ngepma ngepmamba yelogwen kat

ta nimba kat aywaa kwutaa kiyandi. ³⁶Yelogwen kat ta nimba ndina waavwina njimbwi waavwi sinyipmak kat wagalandi. njimbwi waavwi sinyita nimba yelogwen kat ta nimba ndi kwo lindi.

JUDANA NGWAT YETA VAK

15 ¹Moses kwiya nyaangit simogwi liga nimbo Ferisio Jerusalem kwagalalaa yalaa Jisas kat vilaa wagalandi. ²Manda kat mina mbaapma nimba nina ngwat ndu tamba waa vapmba yetilapman yiligandi. Taamba njangi lapman manda kat kwo kiligandi waa wagalandi maa ³Jisas ndi kat wandi. Ngwuk God waa nyaangit kat kwagalalaa ngwula ngwat ndu waa nyaangipmba yetiligangwuk. Ana nglaatndi. ⁴Tamba God wandi, “Ngwula nyaek nyime kat apma vat ay ngwula. Kita nyan ndina nyaek nyime kat kavle nyaangit ngambundeyan ndi kat vatnyagiyangwuk” waa wandi God. ⁵Ngwuk Gerisi mandip vak yiligangwuk. Kita nyan wuna nyaek nyime kat kwunapmat kwiweya nda tamba God kat kwigiyowun waa wandeyan apma vatna nyaangit kai waa wangwuk. ⁶Wun ngwuk kat wowun. God kat kwindeyan ndina nyaek nyime kat ndi kavle vat yigiyandi. God kat kwindeyan mbik kwanda kwanda lapman tiga kavle savle ligiyambik. Wungi vak walingwa vapmba Godna nyaangit kwagalalaa ngwutna kavle maawupmba yelavika yetiligangwuk. ⁷Ngwuk woseka waliga nimba ngwuk. Tamba la profet Aisaia ngwuk kat piliwutndi. Ndi woseka waga ana piliwutndi. kupma piliwutndi. Ndi woseka waga ana piliwutndi. Kupma piliwutndi.

⁸God wandi. Wundi nimba ndina kwundimba wuna si nima yindangat waligandi. Ndina maawupmba wun kat ana yelavitigandi. ⁹Ndi nambu silandalaa wun kat maawupmba yelavitnja vak kwo vatnat tiligandi. Wunai waa nyaangit kwagalalaa ndinyangu mbukna nyaangit nat nimba kat simogwiga mbutigandi. Kan God waa nyaangitna woseka waa waa piliwutndi Aisaia waa wandi Jisas.

MAAWUT KAT KAVLE YIGIYA VAT

¹⁰Jisas nima sakwat nimba kat wandi maa yandi. Yandi maa ndi kat wandi. Ngwula waan wuka maawut yelavik ngwula. ¹¹Ndinyangu kigiya kiginda nda nyan kat ana kavle yigiyandi. Ndina kwundimba ngambunjeya kavle nyaangit wan nyaangit ndu nyan kat kavle yigiyandi waa wandi Jisas.

¹²Wandi maa ndina mbaapmamba la nimba yalaa ndi kat wandi. Wama nyaangit kat wupmak kat Ferisi ndi kai wandi waa wandi.

¹³Jisas ndi kat wandi. Nginangwupmba liga wuna nyaek ndi ambukat kwutigandi. Ndina ambukapmba nat nyan tugiya nda God ndi aywaa

pika yaagigiyandi. ¹⁴Ferisi kat ngwuk nima vak ke yelavikngwa. nat mini vilapman nyan kat yambi simogwi liga mini vilapman nyan vla ligandi. Mini vilapman tigiya mbiti vililik pali yiga liga ava yambi kwagalalaa waangumba ndaigiyambik waa wandi Jisas.

¹⁵Pita ndi kat wandi. Ndu nyan kavle vat yigiya vak kat mbutima nyaangitna angwa nin kat simogwi mila. Ana viga yelavika liganin waa wandi Pita. ¹⁶Jisas ndi kat wandi. Nat nimbo ngwutno ana maawut sika ligangwuk. ¹⁷Maawut sitapman nimba vla ligangwuk. Ndinyangu kigiya nda yapmba wuleilaa tiga kwo wogwegiyandi. ¹⁸Ndinyangu kwundimba ngambugiya nyaangit maawupmba yelavita ngambugiya. Wan ngambunjeya vak ndinyangu kat kavle yigiya. ¹⁹Maawupmba liga kavle vak kingiyan. Ngwuk kat mbukwa. Nat nyan kat vatnya linja vat, yambisik yilinja vat, kavle vat yilinja vak, sikwut tinja vak, woseka walinja vak, njika walinja vak. ²⁰Wan vak aywaa ndinyangu kat kavle yigiya. Ngwuk kat wanja vak taamba njangi lapman kingwa vak ndinyangu kat ana kavle yigiya waa wandi Jisas.

KENENA TAAGWA JISAS KAT NIMA VAK YELAVIKA LILI

²¹Jisas wan kava kwagalalaa Taiagwi Saidano walinja ngepma vililik ta kavat yindi. ²²Wan ngepmamba yetak Kenemba la taagwa yalaa Jisas kat vilaa wali. Njambwi nyan, Devitna yelangi nyan, wun kat miwa ay mila. Wuna taagwa nyan kavle waagan tavila lindi maa kavle savle tigali waa wali. ²³Wali, Jisas ana awat li kat wandi. Ndina mbaapmamba la nimba vilaa yaa ndi kat wandi. Nina kwupmba yalaa nima kwundimba waa yiligali. Li kat wamin yigali waa wandi.

²⁴Wandi maa Jisas wandi. Siliwata liga sip sip vla liga Juda kat mina kwunapmak yawun. Nyin Juda ana nyin. Nyin njambwi nyana nyan vla ligat taagwa ana nyin waa wandi Jisas. ²⁵Wandi maa kwali mamba silaa wali ndi kat. njambwi nyan wun kat kwunap mila waa wali. ²⁶Jisas li kat wandi. Njambwi nyan ndina nyangu kat kwindeya kiginda ndina waala kat kwindeyan ana nglaatndi waa wandi Jisas. ²⁷Wandi maa wali. Njambwi nyan ngiyambak wama. Kiginda kilinja njimbla kipmamba nda liga kilambi kiginda waala kilindi waa wali. ²⁸Jisas li kat wandi. Ninai yelavika liga vat nima ngleia. Kan wun kat wagalanya vat tigiya waa wandi Jisas. Wanda sivamba lila taagwa nyan apma vat kwo lili.

JISAS YELOGWEN KAT TA NIMA SAKWAT NIMBA KAT KWUNATNDI

²⁹Jisas wan kava kwagalalaa yiga Galili walinja sak tivagawi yiga nduwi wokelaa ndaa lindi. ³⁰Ndaa lindi maa yelogwen kat ta nima sakwat nimba kat kwutaa ndinai la kavat kiyandi. Man kivi wakna nimba, mini vilapman nimba, ava tagwulia nimba, kwundi walapman nimba, mandit mandit yelogwen kat ta nimba ndi kat kwutaa Jisas

ta kavat kiyandi. kiyandi, vilaa ndi kat kwunatndi. ³¹Kwunatndi maa kwundi walapman ta nimba kwundi ngambundi. Kivi watna man ta nimba laataa veiga yilindi. Ava tagwulia nimba ndino kwo lindi. Mini vilapman ta nimba mini vindi. Kwunatinda vak kat va nimba vilaa ngipali walaa Isrelna njambwi nyan God ndi apma vat nin kat kwunatndi waa wandi.

JISAS 4,000 NIMBA KAT KIGINDA KWINDI

³²Tiga liga Jisas ndina mbaapmamba la nimba kat wandi. Wundi nimba kat miwa yiga ligowun. Nandinya kuvuk wunogwinala tigandi. Kijanja kiginda tamba aywaa ngilindi. Ndi kat kiginda kwilapman tiga ay ngwula waa wavak kat kai wowun. Ay waweyan ava yambimba yiga liga mini ngangan yindi maa anagandi ndaiga waa wandi. ³³Ndina mbaapmamba la nimba ndi kat wagalandi. Kan kava kwo kava. Ngepma kai. Ndi kat kwineya bret-nao andamba klaiganin. Ndi nima sakwat nimba ndi waa wandi. ³⁴Wandi maa Jisas wandi. Ngwut taagala lingwa bret-nao angamala tigandi waa wandi maa bret-nao sila vili mat kami kuvut wupma taagani, tigandi waa wandi.

³⁵Jisas wandi maa wan nima sakwat nimba kipmamba ndaa lindi. ³⁶Bret-nao sila vili kami kuvuk klaa kwutaa God kat sivu kilaa wan nao limbaga ndina mbaapmamba la nimba kat kwindi. Yalaa la nima sakwat nimba kat yiga kwindi. ³⁷Ndi aywaa kilindi, yaat taati. Kilambinja kiginda Jisasna mbaapmamba la nimba klalaa mbani sila vili naangandi. ³⁸Ka ndi nimbana sakwat 4,000. Ndu mina nagindi. Taagwa mat nyangu kat ana nagindi. ³⁹Jisas wan kava kwagalalaa njaambit kulaa Magadan walinja ngepmat yindi.

16 ¹Ferisio Sadyusio yalaa Jisas kat vilaa yelavitndi. Ndi nyinangwupmba liga yandi? E? Nyinangwupmba liga ana yandi. Ndi kipmana nyana waa yelavita wandi ndi kat. Nima apma njivwa agwut. Kwupmin maa vilaa nyinangwupmba ya nyana waa yelavikiyanin waa wandi. ²Jisas ndi kat wandi. Nglambu nya ndaindi, vilaa nyinangwut yelogwen mbangi lindi maa vilaa waligangwuk. nyinangwut yelogwen mbangi ligandi. Kinya meik ana ndaigandi waa waligangwuk. ³Ngambi nya wokendi, vilaa nyinangwut yelogwen mbangi lindi maa vilaa waligangwuk. Mbambala meik ndaigandi waa waligangwuk. Nyinangwut vilaa ngini yaiga meik mwuk tat viga ligangwuk. Manda kat kwutawa njivwa vilaa yetuwa vak kat ana viga ligangwuk. ⁴Kan mbambala liga ndu lagwu Godna vak vilapman kavle vat yiga yetiliga nimba ndi. Nima apma njivwa agwup mila waa wun kat wangwuk. Ana kwukiyowun. Nima nyivwa kita mina kwukiyowun. Tamba la nyan Jona kwukna vak vla mina kwukwun, vigiyangwuk waa wandi Jisas. Wandu maa Jisas kat kwagalalaa yindi.

FERISIO SADYUSINA YIS

⁵Jisas ndina mbaapma nimbawgi njaambit kulaa sak valigendi. Kiginda klapman maawut tiviga kwagalalaa kwo yindi. ⁶Jisas ndi kat wandi. Ferisogwi Sadyusina bretmba taagalinja yis ke klag. Kavle nda wandi. ⁷Wandi maa ndina mbaapmamba la nimba awat sowat yelavika ngambulindi. manda kat kupma wandi. Kiginda klapman yanangat anagandi waa waa yelavika ngambulindi. ⁸Jisas ngambulinja vak kat wutaa wandi. Kiginda klapman yangwa vak kat manda kat ngambuligangwuk. Kiginda kat manda kat nimamba yelavika ligangwuk. ⁹Njambwi nyanat tuwa vat ngwuk ana nimamba yelavika ligangwuk. Tat bret-nao tambanat klalaa 5,000 ta nimba kat kwiwun maa kindi. Kindi mala kilambinja kiginda angamala mbanimba naangangwuk. ¹⁰Nat njambi bret-nao sila vili klalaa 4,000 ta nimba kat kwiwun maa klalaa kindi. Kindi mala kilambinja kiginda mbani angamala naangangwuk. ¹¹Tat ngwuk kat wowun. Ferisogwi Sadyusina bretmba taagalinja yis ke klag wowun. Kilinja bret-nao kat ana wowun waa wandi Jisas. ¹²Wandi maa ndina mbaapmamba la nimba maawupmba yelavika lindi. Bretmba taagalinja yis kat ana wandi. Ferisio Sadyusio mbutiga nyaangit ngwuk ke wuka waa wandi waa yelavikaw lindi.

MİN KRAIST MİN WAA JISAS KAT WANDI PITA

¹³Jisas Sisaria Filipai walinja ngepmana ngwayat yindi. Ndina mbaapmamba la nimbo ndino kita vat yindi. Jisas ndi kat wagalandi. Wun Godna vak simogwi liga nyan wun kat ndu lagwa anda simba waligandi waa wagalandi maa wandi. ¹⁴Nat nimba ndi ngu yagu liga Jona waa min kat waligandi. Nat nimba ndi Jeremaia waa min kat waligandi. Nat nimba ndi profetna waa min kat waligandi waa wandi. ¹⁵ma Jisas ndi kat wagalandi. Ngwuk wun kat angamak waligangwuk waa wagalandi.

¹⁶Pita ndi kat wandi. Min nin kat kwunapmak ya nyan min. Min Godna nyan min waa wandi Pita. ¹⁷Wandi, Jisas ndi kat wandi. Saimon, Jonana nyan min apma maawut yelavika ligamin. Maawupmba yelavitima vak nat nyanananmba ana klamin. Nyinangwupmba liga wuna nyaek min kat mbutndi, wamin. ¹⁸Min kambak vla ligamin. Wuna mbaapmamba tigiya nimba kingi kambapmba veiga laataa ligiyandi. Wundumbu yinjeyan wuna mbaapmamba veilapman tigiya nimba ngini kavle yigiyandi. ¹⁹Nginangwuk wuleilinja ndaamangemba liga mbapmona ki mina lak taagagiyowun. Kan kipmamba liga nimba kat kemapmeyan ndi ana wuleigiyandi. Kan kipmamba liga wuleigiyangwuk wameya nimba ndi wuleigiyandi waa wandi Jisas Pita kat. ²⁰Pita kat walaa ndina mbaapmamba la nimba kat aywaa ndi kat wandi. Ndinyangu

kat kwunapmat ya nyan Kraistnat tuwa vat nat nimba kat ke mbukngwa wandi.

KIYALAA LIGA LAAKIYOWUN WAA WANDI JISAS

²¹Wan njimbla Jisas kita nyaangit ndi kat ngambundi. Ngambuga wandi. Samat tiga Jerusalemat yigiyowun. Yiwun maa Judana njambwi nimbo God kat kwunatiga njambwi nimbo Moses kwiya nyaangit simogwi liga nimbo wun kat kwutaa kavle vat yigiyandi. Kavle vat yiga wun kat kwutaa vatnyagiyandi. Kiyalaa nandinya kuvut tiga laakiyowun waa wandi maa wutaa ²²Pita ndi kat kwuknat kalilaa wandi. Njambwi nyan wama vat ana nglaatndi. Manda kat wupma wamin. Wan kavle vat min kat wupma yilandi waa wandi maa ²³Jisas Pita kat wandi. Seten min wun kat kwagalalaa ay. yiweya yambi kat min ke tiviliga. Yelavitima vak Godna vak ana ndi. Ndinyanguna vakna yelavitima waa ndi kat walaa ndina mbaapmamba la nimba kat wandi.

²⁴Kita nyan wuna mbaapma wuleivat wandeyan avla ndina mbangi kwunapmak kat kai walaa kwutuwa njivwa ndino kwukiyandi. ²⁵Kita nyan ndina mbangi kwunapmak mina yelavika lindeyan kavle yigiyandi. Kita nyan wuna njivwa kwuka yetiga kiyandeyan ndi apma vat tigiyan. ²⁶Kita nyan kipmana kwanda kwanda nda aywaa klalaa kavle vat yiga yetindeyan wan apma vatna? Kai. Apma vat ana ndi. Kavle vatna. Njimbla njimbla apma vat tinjeya vat kita nyan wenga kwilaa ana klaigandi. ²⁷Wun Godna vak simogwi liga nyan samat tiga enselonala yaigowun. Wuna nyaek wun kat ndina kwondu kwindi maa yaigowun. Yalaa ndinyangu aywaa kwutinja njivwa kat wenga kwigiyowun. ²⁸Ngwuk wutaa yelavik ngwula. Ngwutna nat nimba kwo liga njambwi nyanat tiga yaweya vat vigiyangwuk. Wun Godna vak simogwi liga nyan wun yaweya vak vigiyangwuk waa wandi Jisas.

JISASNA MBANGI MANDIP MBANGI LINDI

17 ¹Nandinya sila kita yindi maa Jisas Pita Jems Jon nyamwun sambu ndi kat yagwa waa kwutaa nima nduwiat klo kalindi. ²Wokelaa liga Jisasna mbangi mandit mbangi ngwandiyandi, viga lindi. Ndina mindama nya vla silindi, vindi. Ndina waavwi sawun glei mina liga kamba kava vla lindi maa vindi. ³Vilindi maa Mosesogwi Ilaijo yalaa ndinogwinala ngambuga limbit, ndi kuvut nyangu tiga liga vindi. ⁴Viga liga Pita Jisas kat wandi. Njambwi nyan kan kava apma kava. Tinan apma vatna. Wamin maa kwapi mbale kuvuk kwukiyanin. min kat kita Moses kat kita Ilaija kat kita kwukiyanin waa walindi maa ⁵sawun mbangi timbu ngaga yalaa tinja kava kapmandi. Timbumba liga ndu nyana kwundi ngambulindi maa wutindi. Kwundi kupma ngambundi. Wan nyan wuna nyana. Ndi kat viga waa ngambundi wan kwundi.

⁶Wan kwundi wutaa Jisasna mbaapmamba la ndi nyangu vaaka liga mindama mindama kipmamba ndalaa lindi. ⁷Ndalaa lindi, Jisas yalaa taamba laagalaa ndi kat wandi. Ke vaaka lingwa. laak ngwula wandi, laatndi. ⁸Laataa ngambuga linda mbit nyan kat ana vindi. Jisas kapma lindi, vindi.

⁹Wan nduwi kwagalalaa ngaga yalindi maa Jisas ndi kat wandi. Wun Godna vak simogwi liga nyan wan. Wun kiyalaa laakwun maa kan vingwa vak ngini nat nimba kat mbukiyangwuk. Kanmbambala ke yiga mbuka waa wandi Jisas.

¹⁰Ndina mbaapmamba la nimba ngambunda nyaangit wutaa ndi kat wagalandi. Moses kwiya nyaangit simogwi liga nimba kupma waligandi. Kraist tat ana yaigandi. Ilaija tat yandi maa ngini Kraist yaigandi waa waligandi. Wupma manda kat waligandi waa wagalandi Jisas kat.

¹¹Jisas wagalanja vak wutaa ndi kat wandi. ngiyambak wanja. ilaija ndi tamba yandi. Yalaa Kraist yaiga yambi kwunatndi. ¹²Ilaija yandi, kan kipmamba la ndu lagwa Ilaija njambwi nyanat tinda vak kat ana viga lingi. ndina maawupmba ndi kat kavle vat yelavika kavle yindi. Ndi kat kavle vat yinja vat vla wuno Godna vak simogwi liga nyan wan kat kavle vat yigiyandi waa wandi Jisas. ¹³Jisas wanda nyaangit wutaa maawupmba yelavitndi. Ndi Ilaija walindan ngu yagu la Jon kat waligandi waa yelavika lindi.

JISAS KAVLE WAAGAN TAVILA LA NYAN KAT KWUNATNDI

¹⁴Nduwimba liga ngaga yalaa nima sakwat ta nimba la kavat ndi yindi. Yindi maa kita nyan yalaa Jisasna mindama sambimba kwilai mamba silaa ndi kat wandi. ¹⁵Wuna mat nondanyan kat miwa yilaa kwunap mila. Kavle waagan ndi kat tavila liandi. Kavle waagan ndi kat kwutndi maa mini ngangan yindi, kipmamba ndaa ligandi. Nat nima sakwat njambi yamba ndaa ligandi. Nat njambi ngumba yiligandi. ¹⁶Mina mbaapmamba la nimba kat kwutaa kiyowun maa ana alipsiga ndi kat kwunatndi waa wandi maa ¹⁷Jisas ndina mbaapmamba la nimba kat vilaa wandi. Ngwuk nimamba ana yelavitigangwuk. Ngwuk kavle vat yelavitigangwuk. Anda sakwat nandinya tiga ngwuk kat simagaga mbutiwun mala nimamba yelavikiyangwuk. Nimamba yelavitapman yilingwa vak kat wupmak kat kai wowun. Wan nyan kat yiga kwutaa wuna lak agiya ngwula waa wandi Jisas. ¹⁸Wan nyan kat kiyandi maa Jisas vilaa kavle waagan savilindi, yingi. Yindi maa wan nyan apma vat kwo lindi.

¹⁹Wan nima sakwat ta nimba yindi maa vilaa Jisasna mbaapma nimba ndi kat wagalandi. manda kat kavle waagan alipsiga nin savililapman yinan waa wagalandi.

²⁰Wagalandi maa Jisas ndi kat wandi. God kat nimamba yelavika kwutaa lilapman yingwan kat tiga wan kavle waagan kat savililapman

yingwuk. God kat nimamba yelavika lingja vat samat ngwutanamba tindeyan kan tiga nduwi kat ay wangwuk, yigiyandi. God kat nimamba yelavika lingja vak kat nima sakwat vak kat ana wowun. God kat nimamba yelavika lingja vak samat ngwutnamba lindyan ngwuk nima nima njivwa kwukiyanngwuk. ²¹(Kiginda kivak kat kai walaa God kat wagala lingweyan kingi vat tiga waagan saviligiyangwuk waa wandi Jisas.)

KIYALAA LAAKIYOWUN WAA JISAS VHLHLK WAN NJAMBI WANDI

²²Jisasna mbaapmamba la nimba Galilimba yisolaa lindi maa ndi kat wandi. Wun Godna vak simogwi liga nyan wun. Wun kat ngini kwutaa vatnyagiyandi. ²³Kiyalaa nandinya kuvut tiga laakiyowun waa wandi maa wutaa ndina mbaapmamba la nimba nima maawut yelavika lindi.

JISAS TAKIS SANYA YAAGINDI

²⁴Jisas ndina mbaapmamba la nimbo kapaneam walinja ngepmat yindi. Ngepma wuleindi maa Godna ngay kwunatinja takis sanya kla liga nyan yalaa Pita kat wagalandi. Ngwutna njambwi nyan takis sanya yaagiligandi? E? Ana yaagiligandi? Waa wagalandi.

²⁵⁻²⁶Wagalandi maa Pita wutaa awa wandi. Walaa ngay wuleindi mala Jisas ndi kat wandi. Saimon min angamak yelavika ligamin. Kan kipmana njambwi king anda nimbananamba takis sanya klaligandi. Ndina ngepma nimbananamba ana klaligandi. Nat ngepma nimbananamba mina klaligandi waa wandi. Jisas ngiyambak wamin wandi. Nin Godna ngepma nimba nin. Ngi kat tiga nin Godna ngay kwunatinja takis sanya yaagilapman yineyan wan vat kwowa. ²⁷Yaagilapman yineyan nin kat kai waigandi. Ngi vak kat kai wowun. Ngi kat tiga sak yilaa singwa laagagiyamin. Tat kwupma kami kwutaa ndina ngaangamba sanya vilaa klalaa kwutaa agiya. Mina wugin wuna wugin sanya kwigiyamin waa wandi Jisas.

KANDANA NIMA NYAN

18 ¹Jisasna mbaapmamba la nimba Jisas kat yalaa wagalandi. Nyinangwut wuleilaa anda nyana kwulaka nima nyanat tigiya waa wagalandi.

²Wagalanja vat wutaa Jisas mat nyan kita kat yagwa wandi, yalaa ndina nindimba laataa lindi. ³Lindi maa jisas ndi kat wandi. Ngwuk yelavik ngwula. Mbambala maawupmba yelavitingwa vak kwagalalaa kan mat nyan tiga vla tilapman yingweyan nyinangwut ana wuleigiyangwuk. ⁴Kita nyan wun nima nyan ana wun waa yelavika liga kan mat nyan tiga v a tindeyan wan nyan nyinangwut wuleilaa nima nyanat tigiya.

⁵Kita nyan wuna njivwa kwuka kingi vat mat nyan kat apma vat yilindeyan wan yindeya apma vat wuna lak yaigandi waa wandi Jisas.

KAVLE VAT NDINYANGUNA MAAWUT KAT KAVLE YILIGANDI

⁶Jisas ndi kat wandi. Kingi vat mat nyan vla liga nimba wun kat yelavitnja vak kat nat nyan kai wandi maa wun kat kwagalalaa yindeyan wan ana nglaatndi. Wan kai waa nyan kat nima kambak klalaa yaawmba tulaa kwapmba waataa ngumba yaagingweyan apma vatna.

⁷Nat nimba kipmana nda kat vilaa wun kat yelavitinja vak kwagala ligandi. Kan kipmana nda kavle nda. Nat nimba wun kat kwagalagiyandi. Viligowun. Wun kat yelavitiga nimba kat kai waliga nimba ndi wan nimba kavle klei nimba ndi. ndi kavle klei yigiyandi.

⁸Kita nyana taambamba kwutinda kavle njivwa ndina maawupmba liga apma vak kat kwulatndeyan taamba kalika tigandi. Taamba lapman apma kavat tindeyan wovuna. Apma taamba liga kavle kava njimbla njimbla ya vitiga kavat yindeyan kavle vatna. Kita nyan kavle kavat man veiga wan kavamba kavle njivwa kwutinda njivwa ndina maawupmba liga apma vak kat kwulatndeyan man kalikiyandi. Sambin tiga apma kavat yindeyan apma vatna. man apma vat tindi, kavle kava njimbla njimbla ya vitiga kavat yindeyan kavle vatna. ⁹Kita nyan minimba vinda kavle vat ndina maawupmba liga apma vak kat kwulatandeyan mini pinguga yaagigiyandi. Mini lapman kita naangi minimba viga apma kavat yindeyan apma vatna. Mini vili apa apma vat timbik, kavle kava njimbla njimbla ya vitiga kavat yindeyan ana nglaatndi.

SILIWOKNA SIP SIPNA NYAANGIT

¹⁰Ngwuk mat nyangu kat vilaa ndi kwo nda ndi waa ke yelavikngwa. Ndi kat viga liga ensel ngiliga. Ndina ensel nyinangwupmba liga wuna nyaekagwi ligandi. ¹¹(Wun Godna vak imogwi liga nyan wun. Wun siliwota la nimba kat aywaa kwunapmak kat yawun.)

¹²Kita nyan sip sip 100 ndinamba lindi. Viga lindi. Kita yiga siliwotnda. Siliwotndi maa ndi angamak yigiyandi. Ngwuk angamak yelavikaligangwuk. Ngwuk kat waigowun. Samat tiga 99 kwo liga sip sip kat ana viga ligiyandi. Siliwokna sip sip kat kwaka yigiyandi nat sip sip kat kwagalalaa. Kwagalalaa yinda sip sip kwo liga yuwi kiga ligiyandi. ¹³Kwaka yiga vilaa solat singi. ¹⁴Sip sip kat viga la nyan ta vak vla ndino nyinangwupmba liga ngwutna nyaek God wupma viga ligandi. Ndina nyangu mbaak silwatandi waligandi God.

KAVLE VAT YA NYAN KAT KWUNAKNGWEYA VAK

¹⁵Minogwinala kita vat wuna mbaapmamba la nyan min kat kavle vat yindeyan ndi kat vilaa kavle vat yinda vak kat ngambu mbila. nat

nimba kat ke mbuka. Ngambuma nyaangit wutndeyan wovuna. Ndi kat tamba kwunapmin. ¹⁶Wupmak kat kai wandeyan mina mbaapmamba la kita nyan o vililik pali kwutaa yiga ndinogwinala kita vat tiga ndi kat nyaangit ngambu ngwula. Tamba la nimba God waa nyaangit kupma piliwutndi.

Vililik pali o kuvut nimba kita nyaangipmba ngambungweyan wovuna. Ngambungweya

nyaangit kwo valat ana tigiyan di

waa tamba piliwutndi. Tamba piliwutnja nyaangit vla ngambu ngwula. ¹⁷Kuvut nimba ngambu nyaangit wupmak kat kai wandeyan kita vat mbaapmamba lingwa nimba kat aywaa mbukiyangwuk. Kavle vat yinda vak kat wukiyandi. Ndina nyaangit wupmak kat kai wandeyan ndi maama nyana waa ndi kat yelavik ngwula. Ndi takis sanya klaliga kavle nyan vla ligandi waa ndi kat yelavik ngwula. ¹⁸Ngwuk kat wowun. Kan kimpamba kita nyan kavle vat yiga yetinda vak kat kwunatapman yingweyan nyinangwupmba liga nyaek God ndino ana kwunakiyan di. kimpamba liga yinjeya kavle vak kat kwunakngweyan nyinangwupmba liga nyaek God ndino kwunakiyan di.

¹⁹Ngwuk kat nat samak nyaangit mbukiyowun. Ngwutna vililik pali kita maawupmba yelavika liga God kat kwi nda kwindangat wagalambeyan wuna nyinangwupmba liga nyaek wagalambeya nda mbik kat kwigiyandi. ²⁰Vililik pali kuvut nimba kita yisolaa liga wuna si waga ngambulingjeyan wuno ndina nindimba kita vat tigiowun waa wandi Jisas.

NAT NYAN YILINDA KAVLE VAT KWAGALALAPMAN NJIVWA KWUTA NYAN

²¹Pita yalaa Jisas kat wagalandi. Njambwi nyan wuna mbaapmamba la nyan anda sakwat njambi wun kat kavle vat yindi, vilaa ndinai yindeya kavle vat silimbwigiyowun. Njambi sila vili ndina kavle vat silimbwiweyan wovuna? Waa wagalandi Pita. Wagalandi maa Jisas wandi.

²²Kai la. Sila vila njambi kai. 490 njambi yindeya kavle vak kat vilaa silimbwimeyan wovuna waa wandi Jisas. Anda sakwat njambi silimbwigiyowun waa wanda nyaangit wutaa Jisas wupuseput mbutindi.

²³Nyinangwupmba liga njambwi nyan ndinyangu kat viga lindyaa vat kingi vat tigandi. Tamba njambwi king kita lindi. Ndina njivwa kwuta nimbana dinau aywaa kwunataa kalipmak kat wandi. ²⁴Dinau kat kwunaka kalika silimbwiga yilindi, kita nyan nima nglei dinau la nyan kat kwutaa kingat kiyandi. ²⁵Ngi kat tiga njambwi king wandi. Ndina kwanda kwanda aywaa ndina nyan taagwa aywaa kwilaa wenga klalaa wan dinau kat agwi. Ndino ndi kat kwilaa wenga klalaa wun kat

agwi waa wandi maa ²⁶ njivwa kwuta nyan kwali mamba silaa nambu silandalaa king kat wandi. Wun kat miwa ay mila. Ngini yuwa inau aywaa kwiigiyowun waa ndi kat wagalandi. ²⁷ King wutaa miwa yilaa ndina dinau kat kai waa kwagalandi.

²⁸ Kwagalandi mala laataa wogwendi. Wogwelaa ndinogwi kita vat njivwa kwuta nyan kat vindi. Vilaa kwapmba kwutaa ndi kat wandi. Min tamba la wuna mat dinau kat agwi mila wandi.

²⁹ Wandi maa nat nyan wandi. Samat kawiga ali. Kwigiyowun wandi. ³⁰ Kawiga livak kat kai walaa ndi kat kwutaa yiga kalabusmba taagandi. Dinau kat kwimeyan mina kalabus ngiligiyandi walaa ndi kat kalabusmba taagandi.

³¹ Kita vat njivwa kwuta nat nimba yinda vak vilaa kavle vat yindi waa yelavitaa njambwi king kat yiga mbutndi. ³² King wan nyaangit wutaa ndina njivwa kwuta nyan kat yagwa wandi, yandi. Yandi maa king ndi kat wandi. Min kavle klei nyan min. Wun kat yima nima nglei dinau wun kat yaa wagalamin maa kai waa kwagalawun. Minagwi kita vat njivwa kwuta nyan ndi kat ana miwa yigamin. Min kat tamba miwa yiga kai waa nima dinau kwagalawun. Ndi kat wupma ana miwa yiga min kat yinda mat dinau kwagalamin. ³³ Min kat miwa yiga luwa vak vla manda kat nat nyan kat miwa yilapman yimin. Min kavle keli nyan min waa wandi njambwi king. ³⁴ Njambwi king nyingi maawut tiga wandi maa ndina njivwa kwuta nyan kat kwutaa yiga kalabusmba taagandi. Dinau kat kwimeyan mina kalabus ngiligiyandi walaa ndi kat kalabusmba taagandi.

³⁵ Kan ngwuk kat wawa wapuseputna angwa nyaangit yelavik ngwula. Ngwutna mbaapmamba liga nimba ngwuk kat kavle vat yinja vat kat kai waa kwagalalapman yingweyan nyinangwupmba liga wuna nyaek kavle vat yingwa vat kat ana kai waa kwagalagiyandi waa wandi Jisas.

TAAGWA KAT KWAGALANJA VAT

19 ¹ Jisas wan nyaangit ngambulaa Galili kwagalalaa Judiat yindi. Jodan walinja ndandangi nat naangat yindi. ² Nima sakwat nimba ndina kwupmba yindi. Yindi maa ndina yelogwen kat vilaa Jisas kwunatndi. ³ Nat Ferisi ndi kat yalaa wagalangeya vak kat anagandi mandip vapmba ngambugiya waa yelavitaa ndi kat wagalandi. Moses kwiya nyaangit angamak wandi. Kita nyan ndina taagwa kat kwo kwagalandeyan wovuna? waa wagalandi.

⁴ Jisas wuta wandi. Tamba God wandi, pilwutnja nyaangit ngwuk ana vingwuk? Tamba God ndu lagwa kat kwutaa kipmamba laagalaa wandi.

⁵ Ndu ndina nyaek nyimena ngay kwagalalaa yiga ndina tagwonala yetigiyandi. Ndu taagwa kita vat tigiyambit waa wandi God

waa tamba piliwutndi. ⁶Ndu taagwa klandeyan kapma kapma mbangi ana ndi. Mbik kita mbango ligiyambit. Mbila mbangi kita mbik kita nyan mbik. God mbik kat sangindi, ligambit. Ndu ndina taagwa kat ana kwagalagiyandi waa wandi Jisas. ⁷Ferisi wanda nyaangit wutaa ndi kat wagalandi. Wama nyaangit ana nglaatndi. Tamba Moses wandi. Kita nyan pepa piliwutaa taagwa kat kwilaa kwo kwagalagiyandi waa Moses tamba piliwutndi. Manda kat wupma piliwutndi waa wandi. Wandi maa Jisas wandi.

⁸Kavle savle tingwa vak kat vilaa ngwuk taagwa kwagalavak kat pepa taagwa kat kwilaa kwagalagiyangwuk waa wandi Moses. Tamba God ndu lagwa kat kwuta njimbla ndu taagwa kat kwagalanjeya vak wupma ana lindi. ⁹Ngwuk kat wowun. Kita nyan ndina taagwa kat vivak kat kai waa kwo kwagalalaa nat taagwa kat klandeyan ndi wan nyan wupma yindeya vak yambisik taagwa kat yinjeya vak vla ligandi. Ndina taagwa simblan wangiga yetili, vilaa kwagalandeyan nyaangit kai waa wandi Jisas.

¹⁰Jisas wandi maa ndina mbaapmamba la nimba ndi kat wandi. taagwa klaga ligiya nyan ndina taagwa kat kai waa kwagalagiyandi. Nina ngepma vatna. Ngwut taagwa kat ke kwo kwagalaga waa wama nyaangit apma vat tindeyan taagwa klalapman tigiya nyan mina apma vat tigiya waa wandi.

¹¹Jisas ndi kat kupma wandi. Taagwa klalapman vat aywaa wupma ana yiligandi. Nat nimba kat mina wan vak God kwiligandi. ¹²Taagwa klalapman tinja vatna angwa nima sakwat tigandi. Nat nimba ndina maawupmba yelavita taagwa kla vak kat kai waligandi. nat nimba na alipsiga klaligandi. Nat nimba nin Godna njivwa mwana kwuka yetiga taagwa ana klaiganin waa waligandi. Ndinyangu aywaa wupma ana yiligandi. Taagwa kat klalapman yigiya nimba mina kan nyaangit awuk ngwula waa wandi Jisas.

JISAS MAT NYANGU KAT APMA VAT YINDI

¹³Jisas ndina nambumba taamba laagalaa God kat wagalandangat nima sakwat mat nyangu kat nyaek nyime kwutaa kiyandi. Kijanja vak kat vilaa Jisasna mbaapmamba la nimba kai wandi. ¹⁴Kai wanja vak kat wutaa Jisas ndi kat wandi. Ke kai wangwa. Nyinangwupmba liga apma nda kindigi mat nyangu tiga vla tigiya nimba klaigandi waa walaa ¹⁵ndina nambumba taamba taagandi. Taagalaa liga wan kava kwagalalaa yindi.

NIMA SAKWAT KWANDA KWANDA NDO LA KWANDI NYAN

¹⁶Kita nyan Jisas la kavat yalaa wagalandi. Simogwi liga nyan, kan kimpogwi njimbla njimbla nyinangwupmba apma vat tiweya vak klavak kat angamak njivwa kwukiyowun waa wagalandi. ¹⁷Wandi maa Jisas

ndi kat wandi. Apma nda klavak kat manda kat wun kat wagalamin. Kan kipmamba apma nyan ana ligandi. God ndi kita nyan mina apma nyan tigandi. Tamba God wandi, piliwutnja nyaangipmba wuka yetimeya njimbla njimbla apma vat timeya vat klaigamin waa wandi Jisas.

¹⁸ Manda nyaangit kat wamin God waa nyaangit waa Jisas kat wagalandi. Jisas wutaa wandi ndi kat. Nat nyan kat ke vatnyaga, yambisik ke yiga yetimeya, ke sikwuka, nat nyan kat woseka ke waga, ¹⁹ nyaek nyime min kat waiga nyaangit awup mila. Avla mina mbangi kwunatima vak vla nat nimba kat kwunap mila waa tamba God wandi, piliwutndi waa wandi Jisas.

²⁰ Wan nyan wutaa wandi. Wama nyaangit aywaa wuka yetiligowun. Nat anda njivwa kwukweya waa wandi maa ²¹ Jisas ndi kat wandi. Kwupmeya nat njivwa kita ligandi. Wan njivwa kwutaa apma vat tigiyaamin. Mina kwanda kwanda aywaa kwilaa wenga yiga klalaa sanya lapman tiga nimba kat agwi mila. Kwilaa nyinangwut wuleimeyan apma wenga klaigamin. Ndi kat kwilaa wuna kwupmba yagwa mila waa wandi Jisas. ²² Wan kwandi nyan wutaa ndina mbangi vali yilindi maa yindi. Ndina kwanda kwanda nima sakwat nda kat kwagalavak kat kai waa yelavika yindi.

²³ Yindi maa Jisas ndina mbaapmamba la nimba kat wandi. Ngwuk kat wowun. Nima sakwat sanya nima sakwat kwanda kwanda la nyan nyinangwut wuleindeyan nima njivwa. ²⁴ Bulmakau vla liga kamel kumbwi mbawna yambi wuleivat tindeyan njivwa ligandi. Nima sakwat kwanda kwanda ndo liga nyan nyinangwut wuleivat tindeyan nima nglei njivwa waa wandi Jisas.

²⁵ Wandi maa wutaa ndina mbaapmamba la nimba ngipaliga ndalaa ndi kat wagalandi. Nyinangwut kandana wuleiya waa wagalandi.

²⁶ Jisas ndi kat vilaa wandi. Ndinyangu nat nimba kat kwutaa nyinangwutnat ana kaligiyandi. Wan Godna njivwa. Ndi alipsiga kaligiyandi. Ndi nima nglei njivwa kwukiyandi waa wandi Jisas.

²⁷ Wandi maa Pita Jisas kat wandi. Awut. Wutaa yelavik. Nina kwanda kwanda nda aywaa kwagalalaa mina kwupmba laataa yinin. Ngini anda wenga klangeya waa wandi Pita.

²⁸ Jisas wutaa wandi. Ngwuk kat wowun. Ngini yaiga nandinya kupi nda ligiya nandinya wun Godna vak siomgwi liga nyan yalaa wuna njambwi tikitmba ndaa liga ndinyangu kat viga ligiyowun. Njambwi nyanat tigiyaowun. Ngwutno tamba vili kiyeli vililik yelangi kat viga ligiyangwuk. Ndina njambwi nimbat tigiyaowun. ²⁹ Kita nyan wuna njivwa kwupmak ndina ngay nyamwun nyange nyaek nyime nyangu ambukat kwagalandeyan ngini yaiga nandinya mandit nda nima sakwat klaigandi. Klalaa njimbla njimbla apma vat tindeya vat klaigandi.

³⁰ Mbambala kipmamba liga nima sakwat ndo liga nimba ngini yaiga

nandinya ndi kwanda kwanda lapman nimbat tigiyan di. Mbambala kipmamba liga kwanda kwanda lapman nimba ngini yaiga nandinya ndi nima sakwat ndo tigiyan di.

AMBUGAT NJIWA KWUTIGA NIMBANA WAPUSEPUT

20 ¹Jisas wandi. Nyinangwupmba liga njambwi nyan ndinyangu kat viga linda vat kingi vat tigandi. Kita nyan nima ambugavo lindi.

Ngambi ambugatna nyan laataa njivwa kwut nimba kat kwaka yindi.

²Yiga vilaa ndinyangu kat wandi. Nandinya kita njivwa kwukngweyan ngwuk kat dola kita kwigiyowun wandi. Wutaa wovuna walaa njivwa kwupmat yindi. ³Ngambi 9 klok laataa ngepma yiga njivwa kwut nimba kat kwaka wavat nat njambi yindi. ⁴Kwaka yiga kwo la nimba kat vilaa wandi. Wuna ambugapmba yiga njivwa kwukngweyan ngwuk kat wenga kwigiyowun wandi. Wandi maa yindi. ⁵Nima nindi nandinya ak laataa ngepma yindi. Nglaambu 3 klok at ngepma yindi. ⁶Nglaambu 5 klok laataa ngepma yindi. Yilaa kwo la nimba kat vilaa ndi kat wandi. Ngwuk manda kat njivwa kwutapman kwo laataa ligangwuk waa wagalandi maa wandi. ⁷Nin kat nat nyan njivwa ana kwindi waa wandi maa wuna ambugapmba yiga njivwa agwut ngwula wandi. Wandi maa yindi.

⁸Nglaambu ndina ambugat viga la nyan kat wandi. Njivwa kwuta nimba aywaa yandi maa ndi kat sanya agwi mila. Ngini njivwa kwupmat ya nimba tat ndi kat sanya agwi. Ngambi tata njivwa kwupmat ya nimba kat ngini sanya agwi waa wandi.

⁹Nglaambu 5 klokmba yiga njivwa kwukna nimba kat dola kita kita njivwa kwutaa nyangu kat kwindi. ¹⁰Ngambi tata yiga njivwa kwukna nimba vilaa nin nima sakwat dola klaiganin waa maawupmba yelavitndi. Wupma ana klandi. Dola kita mina klandi. ¹¹Dola kita klalaa wan ambugatna nyan kat njika wandi. ¹²Kindi nimba nglaambu yalaa wan ana nima njivwa kwutndi. Nima njivwa ana kwutndi. Nin ngambimba yalaa kan njivwa kwutinin nina mbangi nya nimamba silindi nima waangit soga kwutinin. Ninogwi ndi kat manda kat kita wengamba kwimin waa njika wandi ndi kat.

¹³Wanja vak wutaa ndina kita nyan kat wandi. Wuna ava nyan wuna kita nyaangit awup mila. Min kat ana woseka waa kavle wenga kwiwun. Ngambi min kat wowun. Mbambala njivwa kwupmeyan dola kita min kat kwigiyowun waa wowun maa wovuna yiga mina njivwa kwukiyowun wamin. ¹⁴Klama dola kwutaa ngay ay. Ngini njivwa kwupmak ya nyan kat min kat kwiwa wenga vla ndi kat kwiweyan wuna vatna. Mina vak ana ndi. ¹⁵Kwiweya sanya wuna sanya kwiweya. Wuna maawupmba yelavitaa kwiweyan min nyaangit kai. Ndi kat kwo kwiweya vak kat manda kat min kai wamin. Wuna vatna waa wandi ambugatna nyaek. ¹⁶Nyinangwut wuleigiya nimba ndino wupma klaigandi. Tat mat nyan

tiga Godna njivwa kwuka nima sakwat naambi tiga kiyalaa nyinangwut wuleinjeyan ngini God ndi kat wenga kwigiyandi. Avit ndu liga Godna njivwa kwuka naambi kuvut tiga kiyalaa nyinangwut wuleinjeyan tak God ni kat wenga kwigiyandi waa wandi Jisas.

JISAS WANDI KIYALAA LIGA LAAKIYOWUN

¹⁷Jisas Jerusalem yiga liga nat nimba kat kwagalalaa ndina mbaapmamba la tamba vili kiyeli vililik nimba kat wandi. ¹⁸Ngwuk awuk ngwula. Mbambala Jerusalem yigiyandin. Wun Godna vak simogwi liga nyan wun kat kwutaa God kat kwunatiga njambwi nimbo Moses kwiya nyaangit simogwi liga nimba liga kavat kaligiyandi. Ndi wun kat waigandi. Ndi kat kwutaa yiga vatnya waa wun kat waigandi. ¹⁹Wandi maa Juda ana ndi nat nimba wun kat kwutaa njika waga viyalaa diwai krosmba kaalagiyandi. Kiyalaa nandinya kuvut tiga laakiyowun waa wandi Jisas.

JEMSOGWI JONO NIMA NYAN TIVAK KAT WAGALAMBIT

²⁰Sebedina nyan vililikna nyime mbik kat kwutaa Jisas ta kavat kiyalaa nambu silandalaa Jisas kat kita nda kat wagalavat tili. ²¹Wagalavat tili maa anda nda wun kat wagalanyin wandi. Wat taagwa wali. Ngini kingat tiga nima tigitmba ndaa limeya njimbla wuna mbik nyan nat nyan yaagindan naangimba ndaa liga njambwi nyanat tindangat ndaa liga njambwi nyanat tindangat min kat wagalawun waa wali. Wali maa wutaa Jisas mbik kat wandi.

²²Wagalamba vat mbitna maawutmba yigumba yelavitapman tiga wun kat wagalambik. Wun kat yinjeya nima vat vla mbik kat wupma yivat tinjeyan yinjeya nima vat vla mbik kat wupma yivat tinjeyan wun kat kwagalagiyambit? waa wagalandi maa wambit. Kai min kat ana kwagalagiya waa wambit. wambit maa wandi. ²³Awa luwa. Wun kat kavle yinjeya vak vla mbik kat wupma kavle yigiyandi. Yaagindan naangi ambugendan naangimba ndaa ligiya nimba kat wun ana waigowun. Wuna njivwa ana ndi. Wan njivwa wuna nyaek mina kwutinda njivwa waa wandi Jisas. ²⁴Jisasna mbaapmamba la tamba vili nimba wutaa nyingi maawut yelavika mbik kat waleavat tindi. ²⁵Jisas yagwa ngwula wandi, yalaa yisolaa lindi, ndi kat mbuka wandi. Kan kipmamba la njambi nimba nat nimba kat mandip mandip vapmba viga liga nina njivwa agwuk ngwula waa nima kwundimba waligandi. ²⁶⁻²⁷Ngwuk wungi vat njivwa wana kwutingweya. Ngwutna kita nyan njambwi nyanat tivat wandeyan nat nimbana njivwa kwuka ndina nyaangit wukiyangwuk. ²⁸Wuno Godna vak simogwi liga nyan wungi vat njivwa kwutigowun. Wuna njivwa nat nimba kwutnjangat ana yawun. Ndi kat tiga njivwa kwupmat yawun. kwo luwa vat kwagalalaa kiyalaa nat nimba kat wenga kwivat yawun waa wandi Jisas.

JISAS MINI KIYALA LA MBIT NYAN KAT KWUNATNDI

²⁹Jeriko kwagalalaa yindi maa Jisasna kwupmba nima sakwat nimba yindi. ³⁰Mini kiyandi ta mbit nyan ava yambi waymba ndaa liga Jisas yanda vak kat wutaa nima kwundimba walega wambit. Jisas min Devitna yelangi nyan min. An kat miwa ay mila waa walega wambit. ³¹Walimbit mala wan nima sakwat ya nimba wutaa mbik kat wandi. Mbik kiyak awa mbila walindi, wuka kwagalalaa nima kwundimba walega walimbik. Jisas min Devitna yelangi nyan min. An kat miwa ay mila walimbit.

³²Jisas yiga liga tamataa mbik kat wandi. Mbik kat manda yiwangat waligambik.

³³Wandi mala wambit. Njambwi nyan. Ana mini kwunapmangat min kat walega waligali waa wambit.

³⁴Jisas wutaa mbik kat miwa yilaa mbitna minimba taamba taagalaa kunatndi mbik kat. Apma mini bilaa laataa Jisasna kwupmba yimbit.

JISAS KING VLA JERUSALEM WULEINDI

21 ¹Jerusalem yiga liga Jerusalemna ngwaymba la ngepma Betfasi yandi. Wan ngepma Oliv walinja nduwi waymba ligandi. Yalaa liga Jisas ndina mbaapmamba la mbit vililik pali kat wandi. Mbik tata ay mbila. ²Ngepma wuleilaa donki nyano nyimeo yaawumba tndi, kwambit, yiga vilaa svugiga kwutaa wuna lak agiya. ³Sivugimbeya vak vilaa mandana yilimba waa kita nyan wandeyan ndi kat awamba mbit. Nima nyan wandi mala yaa kalivat yigali waa awamba mbit. Wupma wambeyan kali waa waigandi waa wandi Jisas.

⁴Jisas wupma kwo ana wandi. Tamba la profet piliwutnda vak la wandi. ⁵Tamba la profet kupma piliwutndi.

Jerusalemba liga nimba kat yiga ambuk ngwula.

Ngwula king kingi tamba yaliga. Ndina si avla ana kwutaa katsogiyandi. Nyan donkina mbunimba ndaa liga yaligandi waa yiga ambuk ngwula waa tamba la profet piliwutndi.

⁶Jisas mbik kat tata ayt mbila wandi maa tata yimbik. Yilaa wanda vapmba yiga kwupmbik. ⁷Wutaa doni nyimeo nyano kiyambik. kiyambik maa ndina mbangimba kwusoga yinja waavwi njeguga donkina mbunimba taagandi. Taagandi, Jisas nyan donkina mbunimba ndaa lindi. ⁸Nima sakwat nimba Jisas yigiya ava yambi kat alagumba kwusola linja waavwi lapmiga klalaa ava yambimba taagandi. Nat nimba mi sandi kalitaa ava yambimba taagandi. ⁹Ndina kwupmba la nimba, ndina mindama sambimba la nimba, nima kwundimba kiselaa walindi. Devitna yelangi nyan nin kat vivat yandan apma vat yandi. God

wandi maa yandi. Wan apma vatna yanda. God nin kat apma vat kwiga kwunatigandi waa kiselaa walindi.

¹⁰Jisas Jerusalem wuleindi maa ngepmamba yisolaa la ndu lagwa ngipaliga walaa laataa nimamba kiselaa wandi ndi kat. Wan anda nyana yaa waa wandi.

¹¹Jisasonala yalaa yisola la nimba ndi kat wandi. Ndi Jisas profetna. Ndina ngepma Nasaret. Galilina ngepma waa wandi.

JISAS GODNA NGAY WULEINDI

¹²Jisas Godna ngay wuleilaa wenga kla la nimba kat vilaa savilindi maa laataa yindi. Nat nimba ngepma ngepmana sanya klalaa Judana sanya kwila nimba. Ndina njamba kwutaa kungwamatndi. Namio kat wenga wila nimbana tigit kwutaa kungwamatndi. ¹³Kungwamataa ndi kat wandi. Tamba God wandi, piliwutndi.

Wuna ngay ndinyangu wuleilaa wun kat nyaangit ngambulinjeya ngayat tigyandi waa tamba God wandi

waa tamba piliwutndi. Ngwuk wupma ana yiligangwuk. Ngwuk wupma wenga klalingwan sikwutiga nimba pagwula liga ngay vla ligandi waa wandi Jisas.

¹⁴Mini kiya nimbo man kivi watna nimbo yandi maa Godna ngaymba tiga ndi kat kwunatndi. ¹⁵God kat kwunatiga njambwi nimbo Moses kwiya nyaangit simogwi liga nimbo kwunatinda apma njivwa vilaa ndi kat maawupmba kimbuk yiga yelavika lindi. Mat nyangu nima sakwat Godna ngay wuleilaa kiselaga Jisasna si nima wandi. Min Devitna yelangi nyan min. Apma vat tigambin waa wandi. Judna njambwi nimba walinja vat wutaa nat njambi maawupmba kimbuk yiga yelavika lindi ndi kat. ¹⁶Ndi Jisas kat yalaa wuka liga wandi. Kiselaga walinja vat min ana wutigamin? Apma vat ana ndi walinja waa wandi. Wandi maa Jisas ndi kat wandi. Wuka ligowun. Apma vat waligandi. Ngwuk kan nyaangit ana viga ligangwuk? Kupma piliwutndi.

God wandi. Mat nyangu mwunyamba liga nyangu ndina kwundimba wuna si waga kwutaa katsogiyandi waa wandi God

waa tamba piliwutndi waa wandi Jisas. ¹⁷Jisas ndi kat walaa wan ngepma kwagalalaa Betani walinja ngepma wuleilaa ngan wumba kwandi.

JISAS WANDI MAA FIK WALINJA MI LIGA WUNDI

¹⁸Ngambi Jerusalem yiga liga Jisas wundi kat tiga ¹⁹ava yambimba la fik walinja mi kat vindi. Vilaa ndina sik sigitaa kivak kat yelavitndi. Yelavita laataa yiga wan mi angwa ngway tolalaa tanambika vindi.

Vindan sik kwandi, ana vindi. Nganga mina lindi, vilaa wandi. Ngini kan mi sik ana kwaigandi wandi. Walindi mala wan mi njingwut njama nganga aywaa liga wundi. ²⁰Jisasna mbaapmamba la nimba vilaa ngipali walaa wandi. Kan mi kat wama nyaangit sivla ana wamin. Anda vapmba liga wundi waa wandi maa Jisas ndi kat wandi.

²¹Ngwuk awuk ngwula. Wuka yelavik ngwula. Maawut vililik yelavitapman tiga God kat nimamba apma maawut yelavika lingweyan fik walinja mi kat yuwa vak vla ngwulo wupma yigiyangwuk. Kupma yuwa vak kat kwulakiyangwuk. Kan tiga nduwi kat laataa nguat ay wangeyan yigiyandi. ²²Nimamba apma maawut yelavika lingweyan God kat wagalangweya nda ngwuk kat kwigiyandi waa wandi Jisas.

MIN KAT KANDA WANDI, NJIWA KWUPMIN WAA JISAS KAT WAGALANDI

²³Jisas Godna ngay wuleilaa ndinyangu kat nyaangit mbutindi. Mbutindi maa wutaa God kat kwunatiga njambwi nimbo Judana nat njambwi nimbo yalaa ndi kat wagalandi. Min kat kanda wandi, kan njivwa kwutigamin.

²⁴Jisas ndi kat wandi. Ngwuk kat kita nda wagalagiyowun. Wagalaweya vak ngwuk kat mbukiyowun. ²⁵Kanda wandi maa ngu yagu la Jon yalaa nima sakwat nimba kat ngu yagulindi. God wandi maa yalaa yagundi? E? Ndu nyan wandi mala yalaa yagundi? Ngwuk ambuk ngwula wun kat waa ndi kat wagalandi. ²⁶Wagalanda vak wutaa awat sowat ngambulindi. God waqndi maa ngu yagulindi waa waneyan nin kat waigandi. Ndinai waa nyaangit manda kat wutapman yingwuk waa nin kat waigandi. Ndu nyan wandi maa yalaa ngu yagulindi waneyan wan nima sakwat nimba wutaa nin kat kai waigandi. Jon di profetna waa yelavita ligandi waa awat sowat ngambulaa ²⁷Jisas kat wandi. Nin kat wagalama vat ana viga liganin waa wandi. Wandi maa Jisas ndi kat wandi. Wuno wun kat wagalangwa nyaangit ana ngwuk kat mbukiyowun waa wandi Jisas.

KFTA NYANANA MBIT NYANA WAPUSEPUT

²⁸Jisas laataa ndi kat pagwuga liga wapuseput mbutndi. Kita nyan nyan vililikno lindi. Nyaek laataa yiga njambwi nyan kat wandi. Njambwi nyan min laataa yiga ambugat njivwa agwut waa wandi maa ²⁹kai wowun wandi. Kai walaa tiga mandip vak yelavita laataa yiga ambugat njivwa kwutndi. ³⁰Nyaek at mat nyan kat wandi. Mat nyan min laataa yiga mabugat njivwa agwut wandi maa yigiyowun wandi. Yigiyowun walaa ana yindi. ³¹Anda nyan nyaekna kwundi wutaa yiga njivwa kwukiya Ngwuk angamak yelavika ligangwuk waa Jisas wandi maa nyamwun laataa yiga njivwa kwutndi wandi. Jisas ndi kat wandi.

God viga liga kava wuleivat tigiya nimba ndino wupma yuigiyandi. Nima sakwat takis sanya klaliga kavle nimbo yambisik yiliga taagwo ndi tat God viga liga kava wuleigiyandi. Ngwuk anaga ngwuk wuleigiya. ³²Ngu yagu la Jon ngwuk kat wuleingweya yambi visimogwindi. Ngwut ndina nyaangit wupmak kat kai wangwuk. Nima sakwat takis sanya klaliga nimbo yambisik yiliga taagwo ndi wutndi. ana kai wandi. Wutnja vak vilaa ngwuk ana mandip maawut yelavika wukngwuk waa wandi Jisas.

DIWAI WAIN WATIGA AMBUGATNA WAPUSEPUT

³³Jisas ndi kat wandi. Pagwula liga nat wapuseput ngwuk kat mbukiyowun. Tamba kita nyan ndina kipmamba diwai wain watiga ambugat kwutndi. Waina kandi tulaa wan ambugat tivwi kilindi. Waina ngu klavat veiginyanjeya waangu vandi. Ambugat kat viga linjeya awlapmba la ngay kwutndi. Wan ambugatna njivwa aywaa kwutaa ambugat kat viga ligiya nimba kat wan ngaymba taagalaa sivla kava yindi. Ndinai viga ligiya wain nat waambu klaigandi. Nat waambu kipma liga nyan klaigandi. ³⁴Wain sigipmak tinja njimbla lindi maa ndina njivwa kwuta nimba kat ambugat ay wandi maa ndina njambwi nyan klaiga wain klavat yindi. ³⁵Ndina njivwa kwuta nimba ambugat yandi maa ambugat viga la nimba ndina nat nyan kat vialaa nat nyan kat vatnyalaa nat nyan kat vatnyavak ndi kat kambak yaagilindi. ³⁶⁻³⁷Kipma liga nyan nat njambi nat njivwa kwuta nimba kat ay wandi maa yindi. Yindi maa ambugapmba la ndinyangu wandi, yindi. Wuna nyan kat vilaa ndina kwundi wukiyandi walaa ndina nyan kat ay wandi, ambugat yindi. ³⁸Ambugat viga la nimba ndina nyan yandi maa vilaa yelavitndi. Kipma kwukna nyana nyana. Ndi kat vatnyandyan kan kipma nina lak klaiganin waa yelavitaa ³⁹ndi kat kwutaa alaguat kalilaa ndi kat vatnyandi. ⁴⁰Kipma liga nyan yandeyan wan nimba kat angamak yigiyandi.

⁴¹Ndi kat wundi kavle nimba kat vatnyagiyandi. Vatnyalaa ndina ambugat kat viga ligiyaa nat nimba kat kwutaa yaa taagagiyandi.

⁴²Kan mbutuwa wapuseput tamba God wandi, piliwutnja nyaangit vla ligandi. Ngwuk vilingwuk? E? Ana vilingwuk? Kan nyaangit. Kupma piliwutndi.

Kambapmba ngay kwuta nimba tat yaagibnja kambak ngini kwutaa ngay tagumba taagandi, lindi.

Taagandi tiga wan ngayna njambwi kambanknat tindi.

God simogwindi, wan kambak kwutaa tagumba taagandi. God apma vat ndi kat simogwindi.

waa tamba piliwutndi. ⁴³Ngwuk Judana njambwi nimba ngwuk kat wowun. God ndinyangu kat kwunatndeya vat ngwuk ana klaingangwuk. Nat nimba Godna njivwa kwuka yetigiya nimba ndi klaigandi. ⁴⁴(Wan

wawa kambak kita nyan kambak kat kai walaa mamba veindeyan wan nyan kavle yigiyandi. Kambak ana kavle yigiyandi. Tagula kambakna. Wan kambak nat nyamba ndi kat viyandeyan ndi mbaw vla liga kavle yigiyandi waa wandi Jisas.

⁴⁵ God kat kwunatiga njambwi nimbo Ferisio Jisas mbutnda pagwula la wapuseput wutaa yelavitndi. Wanda nyaangit nin kat nima vat wavat wandi waa yelavitndi. ⁴⁶ Ngi kat ana kwutaa kalindi. Nima sakwat nimba ndi Jisas profetna waa wandi. Wan nima sakwat nimba kat vaaka liga ana ndi kat kwutaa kalindi.

TAAGWA KLAVAT TA NYANA KIGINDA

22 ¹ Jisas pagwula la nat wapuseput ndi kat mbutndi. ² Nyinangwupmba liga njambwi nyan ndinyangu kat viga ligiya vat kingi vat tigandi. Tamba nima king tindi. Ndina nyan taagwa klavat tindi, king nima kiginda kwutndi. ³ Ndina njivwa kwuta nimba kat wandi maa ngepma ngepma yiga ndinyangu kat wangwuk yaandi wandi ndi kat. Wandi, yindi. Yiga wanja nimba yavak kat kai wandi. ⁴ Kawiga liga vilevilaa ndina nat njivwa kwuta nimba kat ay wandi maa ngepma ngepma yiga ndinyangu kat wandi. Kiginda lamba kwuka taaganin tiandi. Njambwi nyan ndina kwandi bulmakau vatnyalaa ndina wimbu awmba kwalalaa taagalaa kigiya nimba kat kawiga ligandi. yagwa ngwula waa wandi.

⁵ Wanja vak yiga wanja nimba ana wutndi. Ndina njivwa kwagalalaa yavak kat kai walaa njivwa mina kwutndi. Kita nyan ambugat kwupmat yindi. Nat nyan stua viga livat yindi. ⁶ Nat nimba kingna njivwa kwuta nimba kat kwutaa liga viyalaa vatnyandi. ⁷ Nima king wutaa ndina maawut nyingi yiga ndina soldia kat ay wandi. Wandi maa yiga wan nimba kat aywaa vatnyalaa ndina ngay aywaa yamba tundi. ⁸ Ndina njivwa kwuta nimba kat wandi. Kiginda tamba kwuka liganin. Tak wawa nimba apma nimba ana ndi. Kavle nimba ndi. Ndi ana wawa vat wutaa alipsiga yalaa wawa kiginda kigiyandi. ⁹ Ava yambi ava yambi kava kava aywaa yigiyangwuk. Yilaa vingweya nimba kat aywaa kwutaa kiyangwuk. Kiyangwuk mala ndi kiginda kigiyandi waa wandi maa yindi. ¹⁰ Ava yambi ava yambi kava kava aywaa yilaa vinja apma nimba kavle nimba kat aywaa kwutaa kiyandi. Taagwa klalaa linda ngay ndinyangu mina taata lindi.

¹¹ Kind wan ngay wuleilaa apma waavwi kwusolapman kiginda kivat ya nyan kita kat vindi. ¹² Vilaa ndi kat wandi. Min, kiginda kivat yamin. Kupi waavwi kwusolapman manda kat kwo yamin waa wandi maa wan nyan awat ndi kat ana nyaangit wandi. ¹³ King ndina njivwa kwuta nimba kat wandi. Wan nyan kat kwutaa man taamba sangilaa ndi kat alagumba yiga yaagi. Kulun walaa liga kavamba tigandi. Wan kavamba liga nglaga

nimbi ngliaka tigiyan di waa wandi king. ¹⁴Kan wapuseputna angwa kingiyan. God nima sakwat nimba kat yagwa waligandi. Nima sakwat nimba ana wutaa ndina ngway yaligandi. Nat nimba mina yaligandi wandi Jisas.

TAKIS SANYA YAAGINJEYA VAK KAT WAGALANDI

¹⁵Ndi Ferisi yelavitndi. Jisas kat wagalaneyan anagandi nin kat kavle nyaangit mbukiya waa ndina maawupmba yelavitndi. ¹⁶Ngi kat tiga ndina nat nimbo Herotna mbaapmamba la nimba kat ay wandi maa Jisas ta kavat yindi. Yilaa liga Jisas kat wandi. Nyaangit simogwi liga nyan min. Min ana woseka waligamin. Min Godna angwa nyaangit ndinyangu nin kat pagwuga ana mbutigamin. Savagu mbutigambin nin kat. Min mandip mandip vapmba ana yiligamin. Kipmamba liga ndinyangu nin kat aywaa kita vapmba yiligamin. Nat nimbana yelavik vapmba ana yetiligamin. ¹⁷Nin kat awamba min. Romba liga njambwi king Sisa kat takis sanya kwineyan Moses kwiya nyaangit kai waa kalikiyanin? Min angamak yelavika ligamin. Nin kat ambuk waa wagalandi.

¹⁸Nin kat kavle nyaangit anagandi mbukiya waa maawupmba yelavitnja vak kat vilaa wandi. Ngwuk woseka waa pagwula liga nimba ngwuk. Nin kat kavle nyaangit anagandi mbukiyaa waa manda kat ngwula maawupmba yelavitngangwuk. ¹⁹Takis yaagingweya sanya kita agiya wun kat waa wandi maa kwindi. ²⁰Jisas sanya kwutaa ndi kat simagaga wandi. Kan kana sa kana mindama kan moni sanyamba liga waa wagalandi ndi kat.

²¹Wagalandi, wandi. Romba liga njambwi king Sisana si mindama wandi. Jisas wutaa wandi. Ngiyambak wangwa. Sanya ndina nda. Ndina nda ndi kat kwigiyangwuk. Godna nda Godnat kwigiyangwuk waa wandi Jisas.

²²Jisas waa nyaangit wutaa ngipali waa kwundi lapman laataa ndi kat kwagalalaa yindi.

KIYAA NIMBA LAATNJEYA VAK KAT JISAS MBUTNDI

²³Sadyusi walinja mbaapma nimba kiya liga nimba ngini ana laakiyandi waliga nimba ndi. Ndi yalaa Jisas kat wagalandi. ²⁴Nyaangit simogwi liga nyan tak Moses kupma piliwutndi.

Nyamwun taagwa klaliga nyan njantapman nyamwun
kiyandi, sambu nyamwuna taagwa klaigandi.

Klalaa nyan njangiyan di
waa piliwutndi Moses.

²⁵Tamba kan ngepmamba kita ndu kita lagwana nyangu nondanyangu mina sila vili tindi. Nima nyan taagwa klalaa nyan njantapman tiga kiyandi. Ndina sambu saasi kat klalaa nyan njantapman tiga kiyandi.

²⁶Ndi sila vili nondayangu nyan njantapman kita lagwamba klaliga aywaa kiyandi. ²⁷Tiga liga ngini wat taagwa kiyali. ²⁸Ngini kiya nimba laatinjeya njimbla wat taagwa kana taagwat tigiyaali waa wagalandi Jisas kat.

²⁹Jisas wanja nyaangit wutaa ndi kat wandi. Ngwuk apma vat ana yelavika ligangwuk. God waa nyaangit kat ana apma vak yelavika ligangwuk. Godna kwondu kat ana apma vak yelavika ligangwuk.

³⁰Ngini kiya nimba laatinjeya njimbla ndu lagwa ana klaigandi. Taagwa ndu ana klaigali. Ensel liga vla tigiyaandi.

³¹Kiya liga nimba laatinjeya vak kat ngwuk kat nat nyaangit mbukiyowun. tamba God ngwuk kat yelavika wandi, piliwutnja nyaangit tamba vingwuk? E? Ana vingwuk? Kupma piliwutndi.

³²God Moses kat wandi. Wun Ebrahimna njambwi, Aisakna njambwi, Jekopna njambwi nyan wun waa wandi God waa tamba piliwutndi. God kiya nimbana njambwi nyan ana ndi. Kwo liga nimbana njambwi nyana God waa wandi Jisas. ³³Wan nima sakwat ta nimba ndina nyaangit kat wutaa ngipaliga ndalaa wandi. Apma nyaangitna mbutinda waa wandi.

GOD KWIYA NIMA NYAANGIT

³⁴Jisas Sadyusi kat wagalanda nyaangit wutaa ndi kat awat mbutnjeya nyaangit kat yelavit sigitaa tagula ngega lindi. Tagula ngega linja vak vilaa Ferisi ndino yisolaa lindi. ³⁵Yisolaa liga ndina kita nyan kat wandi. Jisas kat laataa yiga wagala wandi. Wagalameya vak wutaa anagandi awat min kat kavle nyaangit mbukiya waa wandi, laataa yindi. Laataa ya nyan Moses kwiya lo simogwi la nyana. ³⁶Ndi Jisas kat wagalandi. Nyaangit simogwi liga nyan Moses kwiya nyaangit nima sakwat tigandi. Anda nyaangitna nima tiga nat nyaangit kat kwulataa liga. Wun kat ambuk waa wagalandi.

³⁷Jisas wutaa wagalanda nyaangit kat awat ndi kat wandi. Nima nyaangit kingiyan.

Nima nyan God ndi kat ngwula maawupmba yelavika solat siga yeti ngwula. Ndi kat viga ngwula mbangi nolin ngwandiga waavi laagnadi, yeti ngwula waa wandi Moses. ³⁸Kan nyaangit nat nyaangit kat aywaa kwulatndi. ³⁹Ndina kwupmba liga nyaangitno kita vatna. Kwupmba liga nyaangit kingiyan.

Mina mbangi kat kwunapmak vla nat nyana mbangi kat vilaa wupma kwunak

waa wandi Moses. ⁴⁰Tamba Moses nima sakwat nyaangit mbutindi. Profet ndino nima sakwat mbutindi. Mbambala ngwuk kat mbutuwa nyaangit vililik tamba la nimba mbuta nyaangitna angwa nyaangitna mbik.

JISAS FERISI KAT WAGALANDI

⁴¹Ferisi yisolaa lindi maa Jisas yalaa ndi kat wagalandi. ⁴²Juda kat kwunapmak ya nyan Kraist ndi kat ngwuk angamak yelavitaa ligangwuk. Anda nyana nyana waa wagalandi maa wutaa wandi. Ndi Devitna nyana waa wandi. ⁴³Jisas ndi kat wandi. Devit kat Godna waagan wuleindi maa Kraist wuna njambwi nyana wandi. Tamba la nyan Devit kupma walaa piliwutndi.

⁴⁴God wuna njambwi nyan kat wandi. Wuna yagindan naangimba ndaali. Min kat kao liga nimba kat siwun maa ngini min kat ana kao yigiyandi waa wandi God

waa piliwutndi Devit. ⁴⁵Devit Kraist kat ndi wuna njambwi nyana wandi. Kraist kat Devitna mat nyana waa manda kat waligangwuk waa wagalandi Jisas.

⁴⁶Wagalanda vak kat wutaa ana alipsiga ndi kat mbutndi. Ngini Jisas kat wagalanjeya vak kat vaaka lindi. Ngini ndi kat ana wagalandi.

FERISI YETHLIGA KAVLE VAT

23 ¹Jisas ndina mbaapmamba la nimbawgi nat nima sakwat nimba yalaa lindi, nyaangit ndi kat mbutindi. ²Mbuka wandi. Ferisio Moses kwiya nyaangit simogwi liga nimba ndinai mbukiya nyaangit awuk ngwula. Ndi Moses kwiya nyaangit simogwi wuka liga nimba ndi. ³Ndinai mbukiya nyaangit wuka yeti ngwula. Ndinai yiga yetiliga vapmba ke yetingwa. ndi apma vak ngambuga liga kavle vapmba yetiligandi. ⁴Ndi nat nimba kat walingandi. Yetilina vak kat vilaa ninai yetiliga vapmba yeti ngwula. Yetilinja vak vla yetivak nima njivwa kwutigandi. Nima njivwa kwutinja njivwa kat vilaa Ferisi ndi kat ana miwa yiga kwunatigandi. ⁵Ndina apma njivwa nat nimba vimbandi walaa kapmba kwutigandi. Nat nimba vimbandi walaa God wandi, lavungamba piliwutnja nyaangit kapmba kwutaa kaliligandi. Nat nimba vimbandi walaa sivla mbundi waavwi kwusoligandi. ⁶Nyaangit ngambulinja ngay wuleilaa njambwi nyana tigitmba ndaa livat waligandi. Nima kiginda kwutinja ngaymba wungi vat sigit nda livak kat waligandi. ⁷Nindi ngepmamba laataa liga nat nimba ndi kat apma vak tiga nimba ndi waa wanja vak wupmak waligandi. Nat nimba ndi kat nyaangit simogwi liga nimba ngwuk waa wambandi walaa waligandi.

⁸Ngwuk wuna mbaapmamba liga nimba aywaa ngwuk wupma ke yingweya. ngwuk aywaa kita mbaapmamba liga nimba ngwuk. Awat sowat min simogwi liga nyan min waa ke waa. Ngwuk aywaa ngwuk kat nyaangit simogwi liga nyan kita ligandi. ⁹Kan kipmamba liga nat nyan kat nina nyaekna waa ke wangweya. Ngwutna nyaek kita.

Nyinandwupmba ligandi. ¹⁰Ngwuk awat sowat min njambwi nyan min waa ke wangweya. Ngwutna njambwi nyan kita ligandi. Ndi Kraistna. ¹¹⁻¹²Ngwutna kita nyan njambwi nyanat tivat tivat wandeyan avla ndina si kwutaa viyesendagiyandi. Avla ndina si kwutaa viyesendandeyan God ndi kat kwutaa katsondi maa njambwi nyanat tigiyandi.

FERISI WOSEKA WALINJA VAK

¹³Ngwuk Moses kwiya lo simogwi liga nimbo Ferisio ngwuk kavle glei yigiyangwuk. Apma vak ana ligiyangwuk. Ngwuk woseka waliga nimba ligangwuk. nyinandwut wuleinjeya yambi kat ngwuk tiviligangwuk. Ngwuk wuleivak kat kai waligangwuk. Nat nimba wuleivak kat kai valigangwuk.

¹⁴(Ngwuk Moses kwiya lo simogwi liga nimbo Ferisio ngwuk kavle glei yigiyangwuk. Ngwuk woseka waliga nimba ngwuk. Ndu kiyandi, yetigat talagwana kwanda kwanda nda sikwuka klaligangwuk. Wupma yilingwan nima vat kavle yigiyangwuk.)

¹⁵Ngwuk Moses kwiya lo simogwi liga nimbo Ferisio ngwuk kavle glei yigiyangwuk. Ngwuk woseka waliga nimba ngwuk. Kita nyan kwutaa ngwutna mbaapmamba taagavat sivla mbundi yambi yiligangwuk. njambit kulaa yiga nduwi yiga wokega sivla mbundi yambi yiligangwuk. Ndi kat kwutaa taangangwuk maa kavle vat yilinjeya vak yilingweya vak kat kwulatigandi. Ngwutnogwi ndinogwi ya vitiga kavle kavat yigiyangwuk.

¹⁶Ngwuk nat nimba kat yambi simogwiga mini kiyala liga nimba vla ligangwuk. Ngwuk kavle glei yigiyangwuk. Nina ngepmana nat nimba Godna ngayna si waga nima njivwa kwukiyanin waa laataa nima kwundimba waligandi. Wanja njivwa kwutapman yinjeyan ngwuk Ferisi ndi kat ana kai waligangwuk. Nina ngepmana nat nimba Godna ngaymba liga golmba kwutnja awna si waga nima njivwa kwukiyanin waa laataa nima kwundimba waligandi. Wanja njivwa kwutapman yinjeyan ngwuk Ferisi ndi kat kai waligangwuk. Ngwuk ferisi Godna ngay makna ngaymba liga golmba kwutnja aw nima nda waa yelavita ndi kat wupma waligangwuk. Ngwuk mandip mandip waligangwuk. ¹⁷Ndi kat mbutingwa nyaangit tungwengwan yiga liga nimba vla liga mbutigangwuk. Ngwuk mini kiya la liga nimba vla ligangwuk. Godna ngay nima nda. Wan ngaymba golmba kwutnja aw mat nda. Ngwuk manda kat nat nimba kat kai walaa at nat nimba kat kai walapman yiligangwuk. ¹⁸Ngwuk Ferisi nat nimba kat kupma mbutigangwuk. Ndi nat nimba God kat kwunapmak kwanda kwanda taaganjeya njambana si waga nima kwundi wanjeyan nyaangit kai waa mbutigangwuk. Ndi nat nimba God kat kwunapmak kwinja kwanda kwandana si waga nima kwundi wanjeyan nyaangit tigandi waa mbutigangwuk. ¹⁹Ngwuk apma maawut ana yelavika ligangwuk. Kwanda

kwanda taanganja njambo njambamba taaganja kwanda kwando mbik kita nda mbik. ²⁰Jambana si wandeyan njambamba laaganja kwanda kwanda nda kat ndina maawupmba yelavikiyandi. ²¹Kita nyan Godna ngayna si wandeyan God kat yelavika liga waigandi. God kan ngaymba tigandi waa yelavika ligiyandi. ²²Kita nyan nyingangwut wandeyan nyinangwupmba liga nyan God kat yelavika liga waigandi. God nyinangwupmba liga ndina nima tigitmba ndaa ligandi waa yelavika ligiyandi.

²³Ngwuk Moses kwiya lo simogwi liga nimbo Ferisio ngwuk kavle glei yigiyangwuk. Ngwuk woseka waliga nimba ngwuk. Ngwuk klangwa nda aywaa nima nda mat nda kalitaa mbaapma amba vili taagaligangwuk. Mat glei nda kilinja ndana ngaanga kalitaa mbaapma tamba vili taagaligangwuk. Taagalaa nat kita mbaapma God kat kwiligangwuk. Moses kwiya lo tiga apma nima nyaangipmba ana kwutaa yetiligangwuk. Mat nyaangit mina. Moses nima nyaangit kupma wandi. Savagu liga vapmba ngwula maawupmba yelavika yeti ngwula wandi. Ngwuk wupma ana yetiligangwuk. Moses nat nima nyaangit kupma wandi. Woseka waga ke yetilingweya wandi. Ngwuk wupma ana yetiligangwuk. Kan tiga Moses kwiya nima nyaangit kwagalalaa Moses kwiya mat nyaangit mina ngambuga yetiligangwuk. Moses kwiya mat nyaangit nima nyaangit wuka ngambuga yetingweyan wovuna. Apma vat tigiayangwuk. ²⁴Nat nimba kat yambi simagaga mina kiyala liga nimba vla ligangwuk. Ngwuk mat kavle vak savilivak nima njivwa kwutigangwuk. Nima kavle vak savilivak ngwuk ana yelavika ligangwuk. Nima kavle vak ngwula lak yaligandi.

²⁵Ngwuk Moses kwiya lo simogwi liga nimbo Ferisio ngwuk kavle glei yigiyangwuk. Ngwuk woseka waliga nimba ngwuk. Ngwuk ngu tulaa kilinja kap vla ligangwuk. Kan kapmana alagu kap mina njangindi, apma vat tigandi. Yap kap ana njangiligandi. Kigin mbundi ligandi. Ngwuk wupma ligangwuk. Ngwuk kao yiga avla ngwula mbangi kwunapmak kat nima sakwat nda avla ngwula mbangi kwunapmak kat nima sakwat nda klaligangwuk. ²⁶Kavle vak yiga yetingwa vak ngwuk ana viga ligangwuk. Ngwutna kavle maawut kwunakngweyan apma vat njivwa kwuka ligiyangwuk.

²⁷Ngwuk Moses kwiya lo simogwi liga nimbo Ferisio ngwuk kavle glei yigiyangwuk. Ngwuk woseka waliga nimba ngwuk. Ngwut kiya nyan kat taagalinja ngay vla ligangwuk. Kan ngay alagu nge sawun mbangi kipma taagaligandi. Awla nge kavle njangu veiliga sim tigandi. ²⁸Ngwutno wupma ligangwuk. Nat nimba ngwuk kat vilaa ndi apma vat yetiga nimba ndi waligandi. Ngwula maawut wupma ana ligandi. Kavle vat woseka walinja vak ngwula maawupmba tigandi.

FERISI KAVLE WENGA KLAIGANDI

²⁹Ngwuk Moses kwiya lo simogwi liga nimbo Ferisio ngwuk kavle glei yigiyangwuk. Ngwuk woseka waliga nimba ngwuk. Tambana profetna

sim tigiya ngay apma vat kwutigangwuk. Tamba la apma vat ta nimbana sim ta ngay apma vat yelaga ligangwuk. ³⁰Ngwuk kupma waligangwuk. Tamba nina ngwat walanga ta njimblamba tigenin nin profet kat ana vatnyagenin waa waligangwuk. Woseka waligangwuk. ³¹Tamba la ndi profet kat vatnya nimba ngwula ngwat walanga ndi vatnya. Nina ngwat walanga ndi wangwuk. Ngwulo ngwula ngwat walanga ta vla ligangwuk. ³²Tamba kwutinja kavle njivwa vla ngwulo wupma kwutigangwuk. ³³Ngwuk kavle kamboyna nyangu vla ligangwuk. God ngwuk kat kwutaa ya vitiga kavat yisendagiandi. Ndi kat ana kwagalalaa nat yambimba yigiyangwuk.

³⁴Ngwuk kat wowun. Samat tiga apma nambu liga nimba, profet, nyaangit simaga liga nimba wowun maa ngwuk kat yigiyandi. ndina nat nimba kat vatnyagiyangwuk. Ndina nat nimba diwai krosmba kaalagiyangwuk. Ndina nat nimba kat kwutaa nyaangit ngambulingwa ngay kalilaa viyalaa savilingwuk maa ngepma ngepmat yigiyandi. ³⁵Wupma yilingwan apma nimba kat vatnyanja vatna kavle wenga ngwutna lak klaigangwuk. Tat apma vat ta nyan Abel kat tamba vatnyandi. Vatnyalaa tiga Berikaiana nyan Sekaraia kat ngini vatnyandi. Godna ngay wuleindi maa vatnyandi. Ndi aywaa vatnyanja nimbana kavle wenga ngwula lak klaigangwuk. ³⁶Ngwuk kat wowun. Ndi kan mbambala liga nimba wan kavle wenga klaigandi wowun ngwuk kat waa wandi Jisas.

JISAS JERUSALEM VILAA NGLANDI

³⁷Jisas Jerusalem walinja ngepma vilaa wandi. Jerusalem Jerusalemba liga nimba ngwuk tamba la profet kat vatnyangwuk. God waa nyaangit ngwuk kat mbupmat yala nimba ndi kat kambapmba vatnyavat yaagilingwuk. Nima sakwat njambi ngwuk kat kwutaa wuna mbaapmamba taagavat waliwun. nyaaga nyangu kat lila wiyo pupumba pagwuli la vla ngwuk kat pagwuvat waliwun. Ngwuk wun kat kai waligangwuk. ³⁸Ngwuk kat wowun. Samat tiga ngwutna ngepma sulindi maa ngini ndu nyan tapman ngepma tigiyaandi wowun ngwuk kat. ³⁹Mbambala glei wun kat ana nat njambi vigiyangwuk. ngini glei tiga wun kat vilaa waigangwuk. Ngwuk avi ngwula. God wandi, yaa nyan kingiyandi yaa. God ndi kat apma vat yindi, yaandi waa waigangwuk waa wandi Jisas.

GODNA NGAY KAVLE YIGIYANDI WAA WANDI JISAS

24 ¹Jisas Godna ngay kwagalalaa wogwendi maa ndina mbaapmamba la nimba yalaa wandi. Ndi kat ngay kat simogwi vat yalaa wandi. Kan ngay apma vat kwutinja ngeya. Godna ngaya waa wandi maa wutaa Jisas ndi kat wandi. ²Awa luwa. Apma ngeya. ngwuk

kat wowun. Samat tiga kan ngay sulindi maa nat kambak nat kambakna tagumba ana tigiyan di. Kambak kita kita mina ligiyandi waa wandi Jisas.

KAVLE VAT YANDEYA VAK

³Jisas Oliv walinja nduwimba wokela ndaa lindi. Ndaa lindi maa ndina mbaapmamba liga nimba kapma liga ndi kat yalaa wagalandi. Ngini Godna ngay sulinjeya vak kat mbupma vat anda njimbla yaigandi. Anda nda tak vineya. Vilaa liga yelavitneya. Njambwi nyan yaiga ngini la liga nandinya waa yelavika lineya waa ndi kat wagalandi.

⁴Jisas wutaa ndi kat wandi. yigumba viga alimba ngwuk. Ngwuk kat kita nyan woseka walandi. ⁵Ngini nima sakwat nimba wuna simba waga ngwuk kat yaigandi. Wun Kraist wun waga waigandi. Wan nimba woseka wanjeya nyaangit wutaa nima sakwat nimba maawut kavle yigiyandi. ⁶Tat nima sakwat nimba waliagiyandi. waliandi, vigiyangwuk. Ngwutna ngwaymamba liga nimbo ndino waliagiyandi. Sivla kavamba liga nimbo ndino waliagiyandi. walialinjeya vak vilaa nima maawut ke yelavika lingweya. Kan vak tigiyan di ngini. Ngini la liga nandinya asik glei ana yaigali. ⁷Nat kipmamba liga nimba nat kipmamba liga nimba kat yiga siga viyaga waliagiyandi. Nat kingna nimba nat kingna nimba kat yiga siga viyaga waliagiyandi. Ngepma ngepmamba liga nima sakwat nimba wundi kat tiga kiyagandi. Kava kava aywaa yinaw kwukiyandi kan kipma. ⁸Wan nima vak taagwa nyan kwupmak yipma sindi tileya vak vla tigiyan di.

⁹Tiga liga nat nimba ngwuk kat kwutaa siga viyaga vatnyanjangat kaligiyandi. Wuna mbaapmamba lingwa vak kat vilaa ngwuk kat aywaa kai waigandi. ¹⁰Wan yaiga njimblamba mbambala wun kat ndina maawupmamba yelavika kwutaa linja vak kwagalagiyandi. Ndi ndina mbaapmamba la nimba kat kai walaa kotnjangat kaligiyandi. ¹¹Wan yaiga njimbla nin profet nin waa woseka waiga nima sakwat nimba yaigandi. ndina nyaangit wutaa nima sakwat nimba apma vak yelavika linja maawut kavle yigiyandi. ¹²Wan yaiga njimbla kavle vat nima sakwat yaigandi. yandi maa wuna nimba nima sakwat wun kat kwagalagiyandi. ¹³Wan yaiga kavle vak vilaa wun kat kwagalalapman kwo ligiya nimba ndi apma vat tigiyan di. ¹⁴Wan yaiga njimbla mbutuwa apma nyaangit ngepma kava kava yiga mbukiyandi. Kava kava ngepma ngepmamba ligiya nimba wutaa kan Godna nyaangitna waigandi. Ndi aywaa wutaa lindi, ngini la liga nandinya yaigandi waa wandi Jisas.

GODNA NGAYMBA TAAGANJEYA KAVLE NDA KAT JISAS MBUTNDI

¹⁵Jisas wandi. Tamba God waa nyaangit waliga nyan Danyel kupma piliwutndi. Kita nyan Godna ngaymamba kavle glei nda taagiyandi. taaganda nda wan ngay nglambio ligiyandi waa tamba piliwutndi. Wun

Matyu kan vilingwa nyaangit piliwutiga nyan wun. Ngwuk kat wowun. Wan tamba piliwutnda vatna angwa nyaangit kat ngwula maawupmba yelavik ngwula wowun. ¹⁶Jisas ndi kat wandi. Tamba piliwutnda kavle glei nda kat vilaa Judiamba liga nimba vaaka piliga nduwiat ay ngwula. ¹⁷Kita nyan sambangemba liga ndina kwanda kwanda nda klavat ngay wuyleideyan ndi kavle yigiyandi. Kita yi yigiyandi. ¹⁸Kita yi yigiyandi. ¹⁹Nyan tiga taagwogwi nyan kat mwunya kwiligat taagwo ndi kat miwa yigiyangwuk. Kwiyatapman piliga yinjeya yambi kai. ²⁰Meit mwutolo kiya liga njimbla wungi vat kavle vat nin kat ke kwiga waa God kat wagala ngwula. ²¹Wan nima sakwat kavle vat tak wupma ana lindi. Tak God kipma kwuta njimbla tiga wungi vak kavle vak ana lindi. ngini wungi vak kavle vak ana nat njambi ligiyandi. ²²Nima nyan wan nandinyana sakwat kalitapman yindeyan ndinyangu aywaa kiyaigandi. God ndina mbaapmamba ligiya nimba kat yelavitaa wan nandinyana sakwat kalikiyandi.

²³Kita nyan yalaa ngwuk kat kupma avi ngwula Kraist kingiyan waa woseka wandeyan ngwut maawupmba ke yelavikngweya. ²⁴Wun Kraist wun. Wun God waa nyaangit mbutiga nyan wun waa nima sakwat nimba yalaa waigandi. Ndi ngwuk kat woseka waigandi. Yalaa simogwi liga nima njivwa kwukyandi. Kwutndi, ngipaliga ndaigandi. Kwutnjeya vak kat vilaa wan nimbana maawupmba yelavitnja vak kavle yigiyandi. Godna nimbana maawupmba yelavika linja vak kat kavle yivat yalaa waigandi. ngwutna maawut ana kavle yigiyandi. ²⁵Ngwuk kat ngini yaiga vak tamba mbukwun. ngini wan vak yandi maa ngwutna maawut ana kavle yigiyandi.

²⁶Nat nimba ngwuk kat yalaa avimba ngwuk Kraist kan ndinyangu lapman kwo kavamba ligandi waa wanjeyabn ke wuka. Nat nimba waigandi. Kan ngaymba pagwula ligandi waa wanjeyan ke wuka. woseka kwo waigandi. ²⁷Wun Godna nyaangit kipmat yalaa mbutiga nyan wun. Ngini yaweya vak ngwuk ndinyangu aywaa vigiyangwuk. Vlap vlap wandi, vingwa vak vla yawun, vigiyangwuk.

²⁸Ngwut tamba viga ligangwuk. Kiya nyana sim kwo kavamba yiga taagangweyan ndina sim ngaawi ambugavi yalaa plaga kigiyandi waa wandi Jisas.

KRAIST YANDEYA VAK

²⁹Jisas ndi kat wandi. Wan kavle njimblana nima vak yiga ngilindi maa nya yiga kulun waigandi. Mbak ana sigiyandi. Singwuk nyinangwupmba liga pika ndaigandi. nyinangwapomba liga nda kat yinaw kwukiyandi. ³⁰Tiga liga yaweya njimbla ngway tolandi, vigiyangwuk. Nyinangwupmba liga yaigowun. Wun Godna vak kipmana nimba kat simogwi liga nyan wun. Wun timbumba yaigowun. Wun nima

avo liga yaigowun. Kava kava ngepma ngepmamba liga nimba yaweya vak kat vilaa nima nyana yaa waa vaaka nglagandi. ³¹Nyinandwupmba liga nima sakwat ensel yigiyandi. Woli agwiat yigiyandi. Yambunat yigiyandi. Malingwatnat yigiyandi. Kambangwatnat yigiyandi. Yiga Godna mbaapmamba ligiya nimba kat kwutaa kaligiyandi waa wandi Jisas.

FIK WALINJA MINA NYAANGIT

³²Jisas ndi kat wandi. Fik walinja mi tiga vak kat ngwuk yelavik ngwula. Nguo lindeya njimbla apma kwin klandeya njimbla ngwuk vilaa yelavikiyangwuk. apma nya sigiya njimbla tamba ngway tologandi waa yelavikiyangwuk. ³³Ngwuk kat mbutuwa nyaangitnonala kita vatna. Mbutuwa vak kat wutaa ngwula maawupmba yelavita ngini la liga nandinya tamba ngway tologandi waa yelavikiyangwuk. ³⁴Ngwuk yelavik ngwula. Ngwula maawut ke tivinda. Ngwuk kan kimpamba vigiyangwuk. ³⁵Ngwuk kat wowun. Ngini kipma nyinandwut ngiligiyandi. Ngwuk kat mbutuwa nyaangit ana kwo valat tigiyan di waa wandi Jisas.

KRAIST YAIGA NJIMBLA KITA NYAN ANA VIGA WUKA LIGANDI

³⁶Jisas ndi kat wandi. Yaweya njimbla kita nyan ana viga ligandi. Nyinandwupmba liga ensel ndi ana viga ligandi. Nyinandwupmba liga ensel ndi ana viga ligandi. Wun Godna nyan wun ana viga ligowun. Wuna nyaek mina viga ligandi. ³⁷Yaweya njimbla kan kimpamba ligiya nimba yetinjeya vak tamba Noa ta njimbla yetinja vak vla ligiyandi. ³⁸Tamba Noa ta njimbla ta nimba ndi God kat maawut yelavitapman kwo nao mina ngu mina kiga taagwa mina klaga yetindi. Yetindi maa Noa njaambit kwutaa njaambitnat weleindi. ³⁹Sambiyangu nin kat vatnyavat yaigandi waa wan ngepmana nimba ana yelavika lindi. Sambiyangu yandi, ndi aywaa ngu kiga kiyandi. Wun Godna ngepmamba tiga yaweya njimbla Noa ta njimbla ta vak vla tigiyan di. ⁴⁰Wan njimbla ambugapmba vililik pali kitamba njivwa kwuka limbit. yaweya njimbla kita nyan kat kaligiyowun. Nat nyan tigiyan di. ⁴¹Taagwa vililik wit mil kwuka limbit, yaigowun. Yalaa taagwa kita kwutaa kaligiyowun. Nat taagwa tigiyan di. ⁴²Ngwuk yigumba viga alimba ngwuk. Anda siva ngwula njambwi nyan yaigandi. Ana viga ligangwuk. ⁴³Ngwuk maawut yelavik ngwula. Ngaymba ligiya nyan sikwutiga nyan yaiga njimbla wukendan ndi ana sindu kwagendi. Viga ligendan sikwutiga nyan ana wuleigiyandi. Ndi kat kai wandi, yigendi. ⁴⁴Ngwutno wupma sindu kwalapman viga ligiyangwuk. Wun God tiga kavamba liga yaweya njimbla ngwuk ana viga ligangwuk. Ndi mbambala ana yaigandi waga yelavika lingweya njimbla wun yaigowun waa wandi Jisas.

**NJIVWA KWUTA APMA NYAN NJAMBWI NYAN YAIGA
VAK KAT YELAVIKA NJIVWA KWUTNDI**

⁴⁵Jisas ndi kat wandi. njivwa kwuta apma nyan ndino wupma yilindi. Ndina njambwi nyan ndi kat wandi, wan njvwa kwuta nimba kat njambwi nyanat tigas viga lindi. Ndi kat kiginda sanya kwiga ndi kat biga lindi. ⁴⁶Njambwi nyan yilaa yalaa viga liga apma njivwa kwutigamin waa wandeyan wan njivwa kwutiga nyan nima vat solat siga ligiyandi. ⁴⁷Njambwi nyan ndina apma njivwa vilaa ndi kat waigandi. Min yaweya vak kat apma maawut yelavika apma njivwa kwutimin. Wuna kwanda kwanda nda aywaa minai viga ligiyaa waigandi. ⁴⁸Njivwa kwuta kavle nyan ndi kupma yilindi. Wuna njambwi nyan yindan asik glei ana yaigandi waa yelavitndi. ⁴⁹Yelavika liga ndinogwinala kita vat njivwa kwutinda nimba kat vityaigandi. Njivwa kwagalalaa nima ngu kiga yetiliga nimbanala yiga nima ngu kiginda kigiyandi. ⁵⁰Mbambala wuna njambwi nyan ana yaigandi waa yelavitindi maa ndina njambwi nyan wan nandinya yaigandi. ⁵¹Ndina njambwi nyan yalaa ndi kat viyalaa kavle nimba tiga kavamba taagagiyandi. Wan kavle kavamba liga nglaga nimbi ngliaa ligiyandi waa wandi Jisas.

MWUNYOWIA NYANGUNA WAPUSEPUT

25 ¹Jisas wandi. ngini nyinangwupmba liga yaiga nyan yaiga nandinya kingi vat tigandi. Mwunyowia nyangu tamba vili taagwa klavak ya nyan kat vivat lam kwutaa yindi. ²Nat tambanat mwunyowia nyangu apma vak yelavitapman kwo yindi. Nat tambanat mwunyowia nyangu apma vak yelavika yindi. ³Apma vak yelavitapman nyangu lam kalitnjeya wel klalapman lammina kwuka kwo yindi. ⁴Apma vak yelavika la ndi nyangu lam kalitnjeya wel klalaa lam kwuka yindi. ⁵Taagwa klavat ta nyan kiginda kwupmak kat yalapman tindi, kawiga liga sindu yindi, kwandi.

⁶Nima nindi ngan kita nyan walega wandi. Wan taagwa klavat tiga nyan ngi lamba yaa waa walega wandi. ⁷Wandi maa laataa lam sagilalaa ndi kat vivat yindi. ⁸Apma vat yelavitapman nyangu apma vat yelavitiga nyangu kat wandi. Nina lam wel ngilindi. Nin kat wel kwigiyangwuk wandi. ⁹Wandi maa kai wandi. Ngwula lamo nina lamo kalitneya wel sakwat ana ndi. Nin nina lam mina kalikiyanin. ngwuk yiga kla ngwula wandi, klavat yindi. ¹⁰Wel klavat yindi maa taagwa klavat ta nyan yandi. Yalaa ngay wuleindi, ndino tambanat nyangu nima kiginda kivat wuleindi. Wuleindi maa ndaamangena mbapmo kwaalandi.

¹¹Mbapmo kwalalaa tindi maa wel klavat ya nyangu yandi. Yalaa wandi. Nima nyan, nima nyan nin kat mbapmo lavwi wandi maa wandi. ¹²Ngwuk kanda ngwuk. Ngwuk kat ana viga ligowun. Woseka ana

wowun ngwuk kat ana viga ligowun waa wandi taagwa klavat ya njambi nyan. ¹³Jisas ndina mbaapmamba la nimba kat vilaa wandi. Ngwuk yigumba viga ligiyangwuk. Njambwi nyan yaiga nandinya ana viga ligangwuk waa wandi Jisas.

NJHWA KWUTA KUVUK NYANGUNA WAPUSEPUT

¹⁴Jisas ndi kat wandi. Ngini nyinangwupmba liga nyan yaiga nandinya kingi vat tigandi. Kita njambwi nyan ngay kwagalalaa nat kavat yivat tindi. Yivat tiga ndina njivwa kwuta nimba kat yagwa walaa ndi kat njivwa kwindi. ¹⁵Ndina maawupmba liga vak kat vilaa siga nagulaa ndi kat wan njivwa kwindi. Nat nyan kat dola 5,000 kwilaa wandi. Kan moni viga ligiyamin wandi. Nat nyan kat dola 2,000 kwilaa wupma ndi kat kwilaa wandi. Nat nyan kat dola 1,000 yindi. ¹⁶5,000 dola kla nyan wungi monimba bisnis kwuka nat 5,000 kdola kla nyan wungi monimba bisnis kwuka nat 5,000 dola klandi. klandi, ndinamba 10,000 dola tindi. ¹⁷Ndino 2,000 dola kla nyan wungi monimba bisnis kwuka nat 2,000 dola klandi. Klandi, ndinamba 4,000 dola tindi. ¹⁸Ndino 1,000 dola kla nyan ndi bisnis ana kwutndi. Waangu valaa wan moni waangumba laagandi, tindi. ¹⁹Nima njimbla liga njambwi nyan yalaa njivwa kwilaa yinda ndi kuvut nyanguna njivwa vivat yandi. ²⁰5,000 dola kla nyan yalaa nima nyan kat vilaa wandi. tat wun kat 5,000 dola kwimin. Wungi monimba bisnis kwuka nat 5,000 dola klawun. mina 10,000 dola agla waa wandi. ²¹Wandi maa njambwi nyan wandi. Min apma njivwa kwutima. min kat njivwa kwiwa moni apma vat viga limin. Ngini min kat nima moni kwiwun, viga ligiyamin. Wuna ngay wuleilaa wunogwinala apma vat yetigiyamin waa wandi. ²²2,000 dola kla nyan yalaa nima nyan kat vilaa wandi. Tak wun kat 2,000 dola kwimin, wungi monimba bisnis kwuka nat 2,000 dola klawun. Mina 4,000 dola kingiyan. Agla waa wandi maa njambwi nyan ndi kat wandi. ²³Min apma njivwa kwutima. Tak min kat kwiwa mat moni kat apma vak viga ligiyamin. Wuna ngay wuleilaa wunogwinala apma vat yetigiyamin waa wandi njambwi nyan.

²⁴1,000 dola kla nyan wuleilaa wandi. Njambwi nyan. Min kao mbundi nyan min. Ngi kat tiga min kat vaaka ligowun. Nat nyan tuga kandi ndamba kлага kiga yetiligamin. Nat nyan yaagiya mina sipmba sigika kiga yetiligamin. ²⁵Min kat vaaka liga wun kat kwima moni waangu valaa waangumba taagawun. Mina moni kingiyan. Agla wandi.

²⁶Wandi maa njambwi nyan wandi. Min kavle njwvwa kwutiga nyan min. Min mbangi kilipangi namwiya nyan min. Wuna vak tamba viga ligamin. Nat nyan tuga kandi ndamba klalaa kiga yetiligowun. Nat nyan yaagiya mi sipmba sigika kiga yetiligowun. ²⁷⁻²⁸Manda kat min kat kwiwa wuna moni bengmba taagalapman yimin. Bengmba taagagemin wan moni samat niman yigendi. Yilaa yawan bengmba taagagemin

1,000 dola nimba kat wandi. Kan kwutaa linda moni klalaa 10,000 dola kwuta liga nyan kat agwi ngwula. ²⁹Moni kwuta liga nimba ndi nat moni klaigandi. Klalaa ndi nima sakwat monio ligiyandi. Moni kwutapman tiga nimba wan kwutaa linja nda klalaa yaagigiyandi. ³⁰Wan kavle njivwa kwutiga nyan kat kwutaa alaguat yaagi ngwula. Yaagingwut, yiga kulun waliga kavamba liga nglaga nimbi ngliaka ligiyandi waa wandi njambwi nyan waa wandi Jisas.

NGINI LA LIGA NANDINYANA VAT

³¹Jisas ndi kat wandi. Wun ndinyangu kat Godna nyaangit mbutiganyan wun. Ngini njambwi kingat tiwun, Godna ensel wuna si kwutaa katsolindi, yaigowun. Enselonala yalaa kingna tigitmba ndaa ligiyowun. ³²Ndaa liwun maa kan kipmamba liga nimba aywaa yaa yisolaa ligiyandi. Ndi kat vilaa siga naguga mbaapma vililikmba taagaiyowun. Sip sip viga la nyan nat mbaapmamba sip sip taagalaa nat mbaapmamba meme taaganda vla taagaiyowun. ³³Sip sip kat yaagindan naangamba taagaiyowun. Meme kat ambugendan naangamba taagaiyowun. ³⁴Taagalaa yaagindan naangamba liga nimba kat wun njambwi king wun waigowun. Ngwuk apma nimba ngwuk. Wuna nyaek ngwuk kat apma vat yindi. Yagwa ngwula. God ngwuk kat kwindeya nda yaa kla ngwula. Tamba kipma kwuta njimblamba ngwuk kat kwindeya nda kwundaka taagandi. ³⁵Ngwuk wun kat apma vat yilingwuk. Wundi kat tiwun, wun kat kiginda kwingwuk. Ngu kivat tiwun, wun kat ngu kwingwuk. Nat ngepmamba liga ya nyan vla liwun, wun kat kwutaa ngwula ngayat kalingwuk. ³⁶Waavwi lapman tiwun, wun kat waavwi kwingwuk. Yelogwen kat tiwun, wun kat yaa kwunakngwuk. Kalambusmba tiwun, wun kat yaa vingwuk waa ndi kat waigowun.

³⁷Ndi kat wupma wowun, wan apma nimba awat wun kat waigandi. njambwi nyan anda njimbla wundi kat timin, min kat kiginda kwinin. Anda njimbla ngu kivat timin, min kat kwinin. ³⁸Anda njimbla kapma ngepma nyan vla limin, vilaa min kat kwutaa nina ngayat kalinan. Anda njimbla waavwi lapma timin, min kat waavwi kwinan. ³⁹Anda njimbla yelogwen kat kwamin, min kat kwunatnin. Anda njimbla kalabusmba timin, min kat yaa vinin waa wagalagiyandi. ⁴⁰Wun njambwi king ndi kat waigowun Ngwuk kat wowun. Mbutuwa apma njivwa ngwuk tamba yilingwuk wuna mbaapmamba la nima nimba mat nyaangu kat. Ndi kat yilingwa vak wuna lak yandi. Ngi kat tiga wun kat yilingwuk wowun waa ndi kat walaa ⁴¹ambugendan naangamba liga nimba kat waigowun. Ngwuk wun kat kwagalalaa ay ngwula. God ngwuk kat kai waligandi. Njimbla njimbla vitiga ya liga kavat ay ngwula. ngwula ngepma. Tamba wan kava God kwutndi. Setan dina enselonala ndi kat kwutaa taagandeya ngepma kat kwutndi. ⁴²Tak wun wundi kat tiwun, wun kat

kiginda kwivak kat kai wangwuk. Ngu kivat tiwun, ngu kwivak kat kai wangwuk. ⁴³Wun nat ngepmamba liga yalaa la nyan vla liwun, ngwula ngayat kalivak kat kai wangwuk. Wun waavwi lapman tiwun, wun kat waavwi kwivak kat kai wangwuk. Wun yelogwen kat kwowun, wun kat kwunapmak kat kai wangwuk. Wun kalambusmba liwun, wun kat vivak kat kai wangwuk waa wowun maa wun kat waigandi.

⁴⁴Njambwi nyan anda njimbla wundi kat timin, vilaa kiginda ngu kwilapman yinin. anda njimbla kapma nyan vla limin, min kat kwutaa nina ngayat kalilapman yinin. anda njimbla waavwi lapman timin, kwilapman yinin. anda njimbla yelogwen kat timin, kwunatapman yinin. anda njimbla kalabusmba timin, min kat vilapman yinan waa wandi maa ⁴⁵⁻⁴⁶wun njambwi king ndi kat waigowun. Wuna mbaapmamba liga mat nyangu ndi kat kwunapmak kat kai wangwuk. Ndi kat tiga kavat kalilaa ndi kat taagagiyandi. Yaagindan naangamba liga apma nimba njimbla njimbla apma vat tinjeya kava wuleigiyandi waa wandi Jisas.

JISAS KAT VATNYAVAK KAT NYAANGIT NGAMBUNDI

26 ¹Jisas yisola la nima sakwat nimba kat nyaangit kwilaa ndina mbaapmamba la nimba kat wandi. ²Nandinya vililik yindi maa Pasova walina pesto tigiyanidi. Wan nandinya wun Godna vak simogwi liga nyan wun kat kwutaa diwai krosmba kaalagiyandi waa wandi Jisas.

³Tiga liga God kat kwunatiga njambwi nimbo Judana njambwi nimbo yisola liga nyaangit ngambulindi. God kat kwunatiga njambwi nyan Kaiafasna ngaymba yisolaa liga nyaangit ngambulindi. ⁴Jisas kat pagwuga kwutaa vatnyagiyandin waa ngambulindi. ⁵Nima sakwat nimba Pesto tiga njimbla yaligandi. Ndi kat kwutneya vak vilaa nin kat kai walaa walegiyanidi. Ana nglaatndi. Ndina mala waa ngambulindi.

TAAGWA JISASNA NAMBUMBA SANDA SALITI

⁶Jisas Betanimba liga tak kawia kila nyan Saimona ngaymba lindi. ⁷Jisas ngaymba lindi, kita lagwa kambapmba kwutnja aw kwutaa yali. Wan awmba apma njangu veiliga sanda lindi. Wan sanda nima sanya kwiga klalinja sanda. Jisas njambamba liga nao kilindi maa wan sanda Jisasna nambumb salati. ⁸Ndina mbaapmamba la nimba vilaa walega wandi. Wan sanda manda kat kwo salati. ⁹Nima sanyo liga sanda. Wan sanda kwilaa sanya klalaa sanya lapman tiga nimba kat kwigeli waa walega wandi.

¹⁰Jisas wanja vak wutaa ndi kat kat wandi. Manda kat ngwuk li kat walega njika wangwuk. Wun kat apma vak kwunakali. ¹¹Sanya lapman nimba ngini ngwulogwinala njimbla njimbla tigiyanidi. Njimbla njimbla ndi kat apma vat yiligiyangwuk. Wun ngwutnogwina njimbla njimbla ana ligiyowun. ¹²Kiyawun maa wun kat waangumba taaganjeya vak kat

yelavita wan sanda saliti. ¹³Ngwuk kat wowun. Yelavik ngwula. Kan apma nyaangit mbutnjeya kava kavamba lilai sanda wun kat salikna vak kat yelavita mbukiyandi waa wandi Jisas.

JISAS KAT NGWUK KAT SIMOGWIGIYOWUN WANDI JUDAS

¹⁴Wan tamba vili kiyeli vililik Jisasna ngwaymamba la nimba kita nyan ndina si Judas Iskeriot. Ndi God kat kwunatiga njambwi nimba kat yiga vilaa ndi kat nyaangit ngambundi. ¹⁵Nyaangit ngambulaa wandi. Jisas kat kwukngweya vat ngwuk kat simogwiweyan wun kat angamala sanya kwigiyangwuk waa wandi maa ndi kat sanya kita ndumi kiyeli tamba vili kwindi. ¹⁶Sanya klalaa ndi kat kwagalalaa yiga Jisas kat kwutnjeya vak kat ndina maawupmamba yelavika lindi.

JISAS PASOVANA KIGINDA NDINA MBAAPMAMBA LA NIMBO KINDI

¹⁷Yis taagalapman nao kilinja pestona kita nandinya Jisasna mbaapmamba la nimba yalaa ndi kat wagalandi. Pestona kineya kiginda anda kavamba kwukiyandin waa wagalandi Jisas kat. ¹⁸Jisas ndi kat wandi. nima ngepma wuleilaa tamba wawa nyana ngay kat yiga vi ngwula. Ndi kat vilaa awa ngwula ndi kat. Nyaangit simogwi liga nyan wandi. Nima njivwa kwukweya njimbla tamba ngway tologandi. Mina ngaymamba wunogwinala wuna mbaapma liga nimbo pestona kiginda kigiyandin waa simogwi liga nyan wandi waa ndi kat yiga awa ngwula waa wandi Jisas. ¹⁹Wandi maa yindi. yilaa ngay wuleilaa pestona kiginda kwutndi.

²⁰Nglaambu Jisas yandi maa ndina mbaapmamba liga nimbo njambamba ndaa liga nglaambu kiginda kiga lindi. ²¹Kiga liga Jisas ndi kat wandi. Ngwuk kat wowun. Wuna mbaapmamba liga ngwutna kita nyan wun kat kwutajangat simogwigiyandi waa wandi maa ²²ndina mbaapmamba la nimba nima vak yelavika liga wunayi? Njambwi nyan wunayi? waa wagalandi. ²³Wagalandi, wandi. Wunogwina kita nombe awmamba kiginda klavat taamba kwusendagiya nyan wungian ndinayi wun kat simogwigiya. ²⁴Wun Godna vat simogwi liga nyan wun. Wun kat vatnyanjeyangat simogwigiya nyan kat ndi kat miwa ay ngwula. Ndi kat nyime kwutapman yigelan ndi apma vat tigendi waa wandi Jisas. ²⁵Judas Jisas kat vatnyanjeya vak kat simogwigiya nyan wutaa Jisas kat wandi. Nyaangit simogwi liga nyan. Wunayi? wandi. Wandi maa Jisas ndi kat wandi. Min ngiyambak wama. minayi waa wandi Jisas.

JISAS NDINA WIMBU NDINA YELOGWEN NDI KAT KWINDI

²⁶Kiga liga Jisas bret-nao klalaa God kat sivu kilaa limba ngiliga ndina mbaapmamba la nimba kat kwilaa wandi. Klalaa agi ngwula. Kan wuna wimba ngwuk kat kwiwa waa walaa. ²⁷wain ta kap klalaa God kat sivu

kilaa ndina mbaapmamba la nimba kat kwilaa wandi. Ngwuk aywaa kan ngu agi ngwula. ²⁸Kan ngu wuna yelogwena ngwuk kat kwiwa. kan wuna yelogwen Godna nyingi maawut kat kwunatndi maa ngwuk kat ana sigiyandi. Nima sakwat nimba yiga yetilinja kavle vak kwunapmak kan wuna mbangina yelogwen salakiyandi. ²⁹Ngwuk kat wowun. Wain walina ngu kipmamba liga ana nat njambi kigiyowun. God viga liga kavat wuleilaa ngini ngwulogwinala kupi apma ngu kigiyowun waa wandi Jisas.

³⁰Jisas wandi maa God kat yelavika mbangu kwundi walaa wan ngay kwagalalaa Oliv walinja nduwiat yindi.

PITA JISAS KAT KAI WANDEYA VAK

³¹Jisas ndi kat wandi. Mbambala ngan ngwuk aywaa wun kat kwagalalaa vaaka yigiyangwuk. Tamba la nimba God waa nyaangit kupma piliwutndi.

Sip sip kat biga la nyan kat God vatnyandi maa
ndi sip sip kava kavat yigiyandi

waa tamba piliwutndi. ³²Kiyalaa liga laataa tak Galiliat yigiyowun. Ngwuk ngini wuna kwupmba yaigangwuk waa wandi Jisas. ³³Wandi maa wutaa Pita Jisas kat wandi. Njambwi nyan min kat kwagalalaa ana vaaka yigiyowun. mina mbaapmamba liga nimba nat nimba ndi anagandi min kat kwagalagiya. Wun ana min kat kwagalgiyowun waa wandi maa Jisas ndi kat wandi. ³⁴Pita wawa nyaangit wutaa mina maawut ke silwoka kwagalaga. Mbambala ngan njambi kuvuk waigamin. Jisas kat ana viga ligowun waigamin. Wamin maa ava nyaaga vyaigandi waa wandi Jisas. ³⁵Pita wutaa wandi. Jisas kat ana viga ligowun waa ana wupma waigowun. minogwinala kiyaweyan apma vatna. Ana vaakiyowun waa wandi maa Jisasna mbaapmamba la nimba aywaa wupma wandi.

GETSEMANI WALINJA KAVA YILAA GOD KAT WAGALANDI

³⁶Jisas ndina mbaapmamba la nimbonala Getsemani walinja kavat yindi. yindi maa Jisas ndi kat wandi. Ngwuk kumba ndaa li ngwula. Wun samat yiga yilaa tiga liga God kat wagalagiyowun, waa walaa ³⁷ndina mbaapmamba la nimbana nat nimba kat kwagalaa Pita, Jems, Jon kuvut nimba ndi kat mina kwutaa yindi. Tiga liga nima maawut yelavika liga ndi kat wandi. ³⁸Wun nima maawut yelavika ligowun. Kiyavat tiga nyan vla ligowun. Ngwuk kumba liga sindu ke kwa. Wun kat kawiga ali ngwula waa walaa ³⁹ndi kat kwagalalaa samat kapma yindi. yilaa mindama mindama kipmamba ndalaa tiga God kat wagalandi. Wuna nyaek min kat wagalavat yigowun. Kan yaiga kavle vat wun kat yalandi. Wuna maawupmba yelavikwa vapmba wun kat ke yiga. Minaj yelavikiya

vapmba wun kat ay mila waa walaa ⁴⁰lataa kuvut nyaangu ta kavat ndi kat vivat yindi. Sindu kwanja vak vilaa Pita kat wandi. Ngwuk manda kat sindu kwangwuk. Samat wun kat ana kawiga liligangwuk? ⁴¹Mini viga liga God kat wagala ngwula. God kat wagalangweyan ngwuk kat yaiga kavle vat ana ngwuk kat kwulakiyandi. Kwo ligiyangwuk. Ngwuk kat biga ligowun. Sindu kwavat ana yelavika waa walaa lungwamataa yindi.

⁴²Yilaa God kat wagalandi. Kan yaiga kavle vat wun kat yalandi. minai yelavika liga vapmba kan yaiga kavle vat wun kat yandyan wovuna waa walaa laataa ⁴³kuvut nyangu ta kavat yindi. ndina mini vali kwutndi, sindu kwandi, yiga vindi. Vilaa ana wandi. Lungwamataa yindi. ⁴⁴Ndi kat kwagalalaa yiga kuvut wan njambi God kat wagalandi. Tak wagalanda wumba nyaangipmba wagalandi.

⁴⁵Wagalalaa ndina mbaapmamba la kuvut nyaangu kat laataa vivat yindi kuvut wan njambi. Yilaa ndi kat wandi. Ngwuk sindu kwangwuk? Wun Godna vak simogwi liga nyan wun. Wun kat kwutaa kaligiya kavle nimba tamba yaa ngway tologandi. laataa avi ngwula. ⁴⁶Laak ngwula. yigat. Wun kat simogwivat tiga nyan tamba yaa ngway tologandi waa wandi Jisas.

JISAS KAT KWUTAA KALINDI

⁴⁷Jisas walindi maa ndina mbaapmamba la tamba vili kiyeli vililik nyanguna kita nyan Judas yandi. Jisas kat kwutaa kalivat ta nima sakwat nimbana yandi. ndi yak kwuka njay kwuka nimbi nda kwuka yandi. God kat kwunatiga njambwi nimbo Judana njambwi nimbo ay wandi maa yandi. ⁴⁸Tak Judas ndi kat mbuka wandi. Yiga vilaa kipmwimba wusitweya nyan ndi Jisas wungiyani ndi. ndi kat wumba agwukmba ngwuk waa tak Judas ndi kat mbuka wandi. ⁴⁹Judas yalaa Jisas kat vilaa nyaangit simogwi liga nyan apma ngan walaa ndi kat yiga kwutaa ndina kiipmwimba wusitndi. ⁵⁰Wusitndi maa Jisas ndi kat wandi. Kita mbaapma nyan wun kat kwupmeya njivwa kwiyatapman agwup mila waa wandi maa Judasnogwinala ya nimba Jisas kat taambamba kwutndi.

⁵¹Jisasna mbaapmamba la nyan kita ndina ngway avamba kwa yak laguga klalaa God kat kwunat njambwi nayana njivwa kwuta nyana waan kalitndi. Kalitndi, kipmamba ndandi. ⁵²Vilaa Jisas wandi. Mina yak tinda vla sisenda. Kita nyan wan yapmba viyama vak vatnyagiyandi. ⁵³Wuna nyaek kat wagalaweyan wuna nyaek wandi maa nyingangwutna nima sakwat ensel yaigandi wun kat kwunapmak. Mbaapma tamba vili kiyeli vililik ensel wun kat walaa ndi kat sivat yaigandi. Wun ana wagalgiyowun. ⁵⁴Wun kat kwutaa kalilaa vatnyanjeya vak kat tamba la nimba lavu nyinangmba piliwutndi. Nyaek kat ndinogwi liga ensel kat wagalaweyan tamba piliwutnja vak ana kak kiyagandi. Wungi kat tiga kai wowun. Ana wagalgiyowun waa walaa ⁵⁵ndi kat kwupmat ya

nimba kat wandi. ngwuk manda kat nimbi nda njay yak kwutaa wun kat yangwuk. Sikwutiga nyan kat kwupmat tinja vak vla manda kat wun kat yangwuk. nandinya nandiya Godna ngay wuleilaa ngwutnogwinala ndaa liga nyaangit ngwuk kat mbutiwun. Wun kat wungi nandinyamba kwukengwuk tuwa. ⁵⁶Wun kat yilingwa vak kwo ana yiligangwuk. Tamba la profet piliwutnja vak vla wun kat wupma yiligangwuk waa wandi maa ndina mbaapmamba la nimba aywaa ndi kat kwagalalaa vaaka piliga yindi.

JISAS KAT KWUTAA NJAMBWI NIMBA YISOLAA LA NGAYAT KALINDI

⁵⁷Jisas kat kwuka nimba God kat kwunatiga njambwi nyan Kaiafasna ngayat kalindi. Moses kwiya lo simogwi la nimbo Judana njambwi nimbo wan ngaymba yilaa yisolaa lindi. ⁵⁸Pita sivlamba liga Jisasna kwupmba yandi. yalaa ngayna ngwutnyala way nge alagumba tindi. Plismanonala kita kavamba lindi. jisas kat yinjeya vakvimbawun walaa yalaa viga lindi.

⁵⁹God kat kwunatiga njambwi nimbo yisola la nat nimbo Jisas kat woseka wanja vak kat wupmak yalaa lindi. Wutaa ndi kat vatnyagianin waa yelavika lindi. ⁶⁰Nima sakwat nimba yalaa Jisas kat woseka walindi. Woseka walinja vak kita nyaangit ana walindi ndi kat. Mandip mandip nyaangit walindi. Ngini vililik pali laataa nimba sakwat nimba kat woseka waga mbupmbik. ⁶¹Kupma wambik. Tak Jisas kupma wandi. Godna ngay sulilaa nandinya kuvutmba kwukiyowun waa Jisas wandi waa woseka mbupmbik.

⁶²Mbupmbik maa God kat kwunatiga njambwi nyan laataa Jisas kat wandi. Min kat mbupmba nyaangit min an ngambumba nyaangit kat wutaa awat nyaangit mbukiyamin? waa wagalandi maa ⁶³Jisas kwundi ana wandi. God kat kwunatiga njambwi nyan at nat njambi Jisas kat nima kwundimba wagalandi. Min nin kat ambup mila. Woseka wana walimeya. nyinangwupmba liga God woseka wameya vak vigiyandi. Min Juda kat kwunapmak ya nyan min? Min Godna nyan min? waa ndi kat wagalandi. ⁶⁴Jisas ndi kat wandi. Min ngiyambak wupma wama wun kat. Wun Godna vat simogwi liga nyan wun. Ngini kan kipmamba liga yiwun maa wun kat ana vigiyangwuk. Nyinangwut wokelaa Godna yaagindan naangimba ndaa liga njambwi nyanat tiwun maa vigiyangwuk. Ngini nyinangwupmba liga ngaga yaweya vak vigiyangwuk waa wandi Jisas.

⁶⁵Jisas waa nyaangit wutaa God kat kwunata njambwi nyan nyingi maawut tiga avla ndina waavwi taambamba ngilitaa wandi. Wan nyan God kat kavle nyaangitna wanda. Ngini ndina kavle vat mbukiya nimba ana yalaa mbukiyandi. Kavle vat yinda vak ngiyambak wutna. Kavle

vat mbuta nyaangit kan yesolaa liga nimba nin aywaa tamba wutnin. ⁶⁶Ngwuk angamak ndi kat yigiyangwuk. Angamak ngwuk yelavika ligangwuk waa ndi kat wandi maa wandi. Ndi kavle nyan. Ndi kat sigiyandin. Kiyagandi waa wandi.

⁶⁷Wupma walaa ndi kat mindamamba sipmiya saga ndi kat taamamba vialindi. ⁶⁸Nat nimba pagwuga yalaa ndi kat vialaa wandi. Min Kraist profet vla timeyan min kat vialiga nimbana si ambuk waa kasega wandi.

PITA JISAS KAT KAI WAA PAGWUNDI

⁶⁹Pita alagu ndaamangemba ndaa lindi, God kat kwunata njambwi nyana njivwa kwutat taagwa yalaa Pita kat vilaa wali. Min Galilimba lan Jisasonala timin, viwun wali. ⁷⁰Pita wutaa wandi. Wanya vak wun ana viga ligowun waa walaa ⁷¹laataa ngegavamba la tivwina suwi yambat yindi. Yindi maa nat taagwa vilaa wumba yisolaa la nimba kat wali. Kan nyan kat avi ngwula. Kan nyan Nasaretmba la Jisasonala kita vat tindi. ⁷²Pita wala vak kat wutaa wandi. Nima kwundimba wandi. Wanya nyan wun ana viga ligowun wandi. ⁷³Tiga liga wumba yisola la nimba Pita kat vilaa wandi. Min min kat vinin. Jisasna mbaapmamba la nyan min. Galilimba liga nimbana kwundimba ngambuligamin waa wandi. ⁷⁴Pita wutaa ndi kat nima kwundimba wandi. Ngwuk kat woseka ana waigowun. Woseka waweya vak God viga wutaa wun kat sigiyandi. Wan wun kat wangwa nyan Jisas kat ana viga ligowun waa walindi maa ava nyaaga viyandi. ⁷⁵Viyandi maa wutaa Pita yelavitndi. Tak Jisaswun kat wandi. Wun kat njambi kuvut pagwuga kai walimin, ava nyaaga viyaigandi wanda vak kat ndina maawupmba yelavitaa Pita laataa yiga nimamba nglalindi.

JISAS KAT KWUTAA PAILAT TA NGAYAT KALINDI

27 ¹Ngambi gleimba God kat kwunata njambwi nimbo Judana nima nimbo Jisas kat vatnyanjeya vak kat yisola liga ngambulindi. ²Jisas kat kwutaa man taamba sangilaa njambwi nyan pailat ta ngayat kalindi.

JUDAS KIYANDI

³Jisas kat simogwia nyan Judas Jisas kat kwutaa kotndangat kalindi, wutaa mandip maawut silimaka yelavitndi. Yelavitaa wan ndi kat kwinja sanya kita ndumi kiyeli tamba vili kwutaa yiga God kat kwunatiga njambwi nimbo Judana njambwi nimba kat wandi. ⁴Wan nyan Jisas kavle vat yiga yetila nyan Simogwiwun mala apma njivwa kwuka yeta nyan kat kwo vatnyagiyangwuk waa wandi. Wandii maa wutaa wandi. Nina njivwa ana ndi. Min mina njivwa waa wandi maa ⁵Judas wutaa sanya Godna ngaymba yaagiga kwagalalaa wup yiga yelavika

yilaa kwapmba yaaw tulaa mimba tulaa vasak selindi. Vasak selilaa kwapmba tunda yaawmba kiyandi. ⁶God kat kwunatiga njambwi nimba ngay yapmba la sanya klalaa wandi. Ndu nyan kat sivak kat kwina sanya. Godna ngaymba bengmba liga sanyogwi ana kita kavamba taagagiyandin. Wupma ana yigiyandin. moses kwiya lo nin kat kai wandi maa ngambundi. ⁷Ngambuga liga kita maawupmba yelavika ngambulaa wan sanya kwutaa aw nyaliga nimbana kipma kat wenga kwindi. Kwilaa klandi wan kipmi. Kapma ngepmamba liga yaiga nimba kiyangjeyan waangu valaa ndi kat kumba laagagiyandin waa wandi. ⁸Wan kipma kan mbambala tina njimbla kwo ligandi. Yelogwen ndaa la liga kipma walinja kipma. ⁹⁻¹⁰Tamba la profet Jeremaia tamba piliwutnda vak kak kiyandi, mbambala viganin. Ndi kipma kwo ana klandi. Jeremaia piliwutnda nyaangitmba klandi. Tamba kupma piliwutndi.

Isrelmba la nimba ndi kat sivak kat wenga kwinja sanya kita ndumi kiyeli tamba vili kwilaa aw nyaliga kipma liga nimba kat kwilaa wan kipma ndina lak klandi. God wun kat wandi maa wupma waa tamba piliwutndi Jeremaia.

PAILAT JISAS KAT WAGALANDI

¹¹Jisas njambwi nyan Pailat ta kavamba laataa tindi maa ndi kat wagalandi. Min Judana king min? waa wagalandi. Wagalandi maa Jisas wandi. Min ngiyambak wun kat wama. ¹²God kat kwunatiga njambwi nimbo Judana nima nimbo yalaa yisolaa liga Jisas kat nima sakwat kavle vak kat ngambuga lindi. Ngambulinja vak kat wutaa Jisas awat ndi kat ana kulumataa wandi. ¹³Jisas kwundi walapman tinda vak kat vilaa Pailat ndi kat wandi. Min kat kotinia nyaangit min ana wutigamin? ¹⁴Jisas wutaa ana Pailat kat wandi. Wuka kwagalalaa lindi. Wuka kwagala linda vak kat vilaa Pailat ngipaliga ndalaa lindi.

JISAS KAT KWUTAA KALILAA VATNYA NGWULA WAA PAILAT WANDI

¹⁵Pailat wan pesto la nandinyamba kalabusmba la kita nyan kat kwo ay walindi. Juda wan nyan kat simogwindi maa kwo wogwelaa ay walindi Pailat. ¹⁶Wan njimbla kavle glei nyan kalabusmba lindi. Ndina si Barabas. ¹⁷Wan nima sakwat ndu lagwa yisola lindi maa Pailat laataa ndi kat wagalandi. Anda nyan kat kwo ay waigowun. Ngwuk kanda kat yelavika ligangwuk. Wangwuk maa waigowun. Barabas kat kwo ay waluu? Jisas waa Kraist walinja nyan kat kwo ay waluu? waa ndi kat wagalandi. ¹⁸Pailat Jisas kat kwagalavak kat yelavika liga ndi kat wangalandi. Jisas ndi kavle vat ana yindi. Ndina kumbut maawupmba ndi kat kai walaa kwutaa kiyandi. Ndi mandip maawut anagandi yelavikiya walaa ndi kat wagalandi.

¹⁹Pailat jas tila tigitmba ndaa lindi maa ndina taagwa wali maa kita nyan yalaa Pailat kat mbutndi. Wan yalaa lindi kat wutina nyan ndi kavle vat ana yindi. Nak ngan wun smapmba viwun. Ndi vak kai. Ndi kat kwagala mila. Wan simak vilaa wun kat kavle vat nima vat yandangat nima maawut yelavika ligowun waa wali mina taagwa waa Pailat kat mbutndi.

²⁰God kat kwunatiga njambwi nimbo Judana nima nimbo nima sakwat yisola la ndu lagwa kat wutnjangat wandi. Pailat kat awa ngwula. Barabas kat kwagalamin nina lak yaandi. Jisas kat kwutaa vatnya mila waa Pailat kat awa ngwula wandi. ²¹Wandi maa Pailat laataa ndi kat wagalandi. Anda nyan kat kwo ay waigowun waa andi maa Barabas kat waigamin wandi. ²²Wandi maa Pailat ndi kat wagalandi. Jisas waa Kraist walinja nyan kat angamak yigiyowun waa wagalandi maa wandi. Ndi kat diwai krosmba kaalaa mila wandi. ²³Pailat ndi kat wandi. Kavle vat yinda vat wun ana viga ligowun. Anda kavle vatna yinda waa wandi maa ndi nima kwundimba kiselaa wandi. Ndi kat dewai krosmba kaala mila waa kiselaa wandi.

²⁴Pailat yelavitndi. Ndi kat waluwa vak ana wutigandi. yelavika walinja vapmba yilapman yiweyan wun kat waleagiyandi waa yelavitaan ngu awmba kalitaa yisolaa viga lindi maa taamba ngu njangindi. Njangilaa wandi. Wan nyan kat tamba kwagalawun. Ndi kat kwutaa vatnyangweyan wuna vak ana ndi. Ngwuk ngwutna vatna waa wandi Pailat. ²⁵Wandi maa ndi aywaa ta nimba wutaa wandi. Wama vak tamba wukanin. Wovuna. Nina vatna. Ndi kat vatnyaneyan nglambi nina lak nina nyangu lagwa nina lak yaigandi wandi. ²⁶Wandi mala Pailat wutaa barabas kat kwo ay walaa wandi maa Jisas kat kwutaa viyalaa diwai krosmba kaalavat kwutaa kalindi.

KAO YA NIMBA KWUSILIGA JISAS KATWANDI

²⁷Pailatna mbaapmamba liga soldia Jisas kat kwutaa Pailat wuleilaa njivwa kwuta ofisat kalindi. Wuleindi maa soldia yaa yisolaa ngilitaa ndi kat vindi. ²⁸Ndina waavwi lapmiga klalaa yelogwen mbangi waavwi kwindi, kwusondi. ²⁹Mangi nimbi yamboy klalaa ndina nambumba wegwuga taagalaa kaalandi. Suwa kalitaa ndina yaagindan taambamba taagandi, kwutaa lindi, kwali mamba silaa ndi kat kwusiliga wandi. Min Judana king min. Apma vat tigamin waa ndi kat kwusiliga wandi. ³⁰Walaa ndina mbangimba ndi kat sipmiya sandi. Taambamba kwutaa linda suwa klalaa ndina nambumba viyandi. ³¹Ndi kat kwusiliga kwagalalaa ndi kat kwusonja yelogwen mbangi waavwi lapmiga klalaa ndina waavwi kwindi, kwusondi. Kwusondi maa ndi kat kwutaa diwai krosmba kaalavat kalindi.

JISAS KAT DIWAI KROSMBA KAALANDI

³²Jisas kat kaliga liga ava yambi yiga liga kita nyan Saimon ndi kat ava yambimba soldia vindi. Sairini walinja ngepmamba ya nyana.

yalindi, ndi kat vilaa wandi. Kan kiwai kros klalaa mina lak walalaa kali mila wandi malaa klalaa walalaa kalindi. ³³Yiga liga Golgota walinja nduwiat wokendi. Golgota walinja nduwina angwa si Andagava Nambu. ³⁴Nima nguo mi mbio kita awmba salitaa Jisas kat kwindi. Njangu wutaa kivak kat kai wandi. Ana kindi. ³⁵Soldia ndi kat kwutaa kiwai krosmba taagalaa man taamba kaalandi. Kaalalaa ndina waavwi klavak kat satumba kaselindi. ³⁶Satumba kasega ngililaa kwo ndaa liga ndi kat viga lindi. ³⁷Jisas kat kotnja nyaangit lavungamba piliwutaa ndina nambu siso diwai krosmba kaalandi. Kupma piliwutndi. Ndi Jisas. Judana kinga waa piliwutndi.

³⁸Sikwuta mbit nyanogwi Jisaso kaalandi. Nat nyan kat yaagindan naangimba kaalandi. Nat nyan kat ambugendan naangimba kaalandi. ³⁹Diwai krosmba Jisas tindi maa yi ya la nimba ndi kat biga nambu njingwenga kwusiliga ndi kat waga yilindi. ⁴⁰Kupma kwusiliga wandi. Godna ngay sulilaa nandinya kuvupmba kwukiyowun wamin. Min Godna nyanat timeyan mina mbangi kwunap mila. Godna nyanat timeyan diwai kros kwagalalaa ngaga yaa mila waa kwusiliga waga yilindi. ⁴¹God kat kwunatiga njambwi nimbo Moses kwiya lo simogwi la nimbo Judana nima nimbo ndino wupma kwusiliga walindi. ⁴²Kupma walindi. Nat nimba kat tak kwunatndi. Ndi avla ndi kat ana alipsiga kwunakiyandi ndina mbangi kat. Ndi Isrelna kingat tindeyan ndi diwai kros kwagalalaa ngaga yaigandi. Diwai kros kwagalaa ngaga yandeyan ndi kat vilaa waiganin. Ndi njambwi nyana waa waiganin. ⁴³Wun Godna nyan wun. God wun kat kwunakiyandi waa walindi. God ndi kat anagandi alipsiga kwunakiya. Vigiyandin waa kwusiliga ndi kat walindi. ⁴⁴Sikwuta mbit nyan Jisasonala mbik kat diwai krosmba kaalandi. Jisas kat kwusililinja vla mbilo kwusiliga walimbit.

⁴⁵Nima nindi nandinya nya kulun wandi. 12 klok kulun walaa tiga yiga 3 lok nglaambu kembandi. ⁴⁶3 klok nglaambu Jisas nima kwundimba kiselaa wandi. Ndina kwundimba wandi. Eli, Eli, lema sabaktani. God wuna nyaek wun kat manda kat kwagalmin waa wandi. ⁴⁷Wumba la nimba yigumba ana wutndi. Wutaa wandi. Awuk ngwula. Ndi Ilaija kat waligandi waa wandi. ⁴⁸Ndina kita nyan piliga namininga klalaa nima ngumba sivugundi. Sivugulaa njimbwi mbaomba ngilaa kwusoga Jisasna tipmwimba taagalaa agi wandi. Jisas kivak kat kai wandi. ⁴⁹Wumba la ndina nat nimba wandi. Kumba kawiga viga ligiyandin. Tiga liga Ilaija ndi kat kwunapmak yandeya vak vigiyandin. Anagandi yaiga waa njika wandi. ⁵⁰Jisas nima kwundimba kiselaga waga kiyandi.

⁵¹Kiyandi maa Godna ngay nindimba la nima waavwi ngilitndi. Angwapmba liga ngilika ngaga yandi. Nima yinaw kwutndi, nduwimba la kambak mbiliga yindi. ⁵²Godna mbaapmamba la tiga kiya nimba nima

sakwat mat matna kipma mbilindi vasagla laatndi. Laataa lindi. ⁵³Ngini Jisas laatndi maa ndi Jerusalem wuleini, nima sakwat nimba vindi ndi kat. ⁵⁴Jisas kat biga la njambwi soldagwi ndina kwupmba la soldio yinaw kwutindi mala kiya nimba laatnja vak vilaa vaaka lindi. Vaaka liga wandi. Ndi Godna nyana luwa waa wandi.

⁵⁵Sivla kavamba la ndi taagwa nima sakwat yitega viga lindi. Tamba Jisas Galilimba liga yandi, ndina kwupmba yandi. Yalaa ndina kiginda kwutndi. ⁵⁶Ndina nat kita lagwa Maria. Magdala walinja ngepmana taagwat. Nat Maria tili. Li Jems Josepna nyimeat. Sebedina mbit nyana nyime lilo tili.

JISAS KIYANDI, WAANGUMBA TAAGANDI

⁵⁷Jisas kiya nandinyana nglambu arimatia walinja ngepmamba la sanyo la nyan yandi. Ndina si Josep. Ndi Jisasna mbaapmamba ta nyana. ⁵⁸Ndi Pailat kat yiga Jisasna sim kwutaa kalivat wagalandi. Kwutaa kali mila waa Pailat wandi maa Josep Jisasna sim kwutaa kalindi. ⁵⁹Josep sim klalaa sawun mbangi waavwi lalaa Jisasna sim mbaatndi. ⁶⁰Mbaataa kwutaa kaliga yiga kambapmba vanja kupi waangumb taagandi. Wan waangu Josepna waangua. Sim taagalaa nima kambak mbandiga dkliga waangu tegilindi. Tegililaa kwagalalaa ngepma yindi. ⁶¹Magdalamba la Mariagwi nat Mario waangu la kavamba ndaa liga viga limbit.

SOLDIA JISAS TA WAANGU KAT VIGA LINDI

⁶²Jisas kiyandi, vaangulaa tiga nat nandinya God kat kwunatiga njambwi nimbagwi Ferisio laataa yiga Pailat kat wandi. ⁶³Kupma wandi, njambwi nyan. Wan woseka waliga nyan tamba wandi. Kiyalaa nandinya kuvut tiga laakiyowun waa wandi. ⁶⁴Wamin maa ndina waangu liga kava soldia yiga viga ligiyandi. Soldia yiga vilapman yinjeyan ndina mbaapmamba liga nimba ndina sim sikwuta kalilaa Jisas tamba kiyalaa laatndi waa woseka waigandi. Tak Jisaana mbaapma nimba nima sakwat kavle nyaangit woseka wandi. Samat kavle vatna. Ngini Jisas kiyalaa laatndi waa wanjeyan nima kavle vatna waa Pailat kat wandi. ⁶⁵Wandi maa Pailat wandi. Ngwuk soldia kat kwutaa kaliga yiga waangu liga kavamba taagangwuk, viga ligiyandi wandi. Wandi maa soldia kat kwutaa kalindi. ⁶⁶Kaliga yiga waangu taa kavamba taagandi, viga lindi. Waangu silitinja kambapmba njambiya taagandi, tindi. Kan kava ke yangweya waa taagandi. Wungi njambiya kat soldia yiga viga lindi.

JISAS KIYALAA LIGA LAATNDI

28 ¹Njivwa lapman nandinya ngilindi maa Sande ngambi Magdalana taagwa Mariagwi nat Mario Jisas taagndi ta waangu vivat ngambi gleimba laataa yimbit. ²Yilimbit maa yinaw kiyandi,

nyinangwupmba liga ensel ngaga yandi. Yalaa waangu tegilinja kambak mbandiga kalilaa wungi kambak tagumba ndaa lindi. ³Enselna mindama vlap vlap wandi, kembandi vina vla ndina mindama wupma lindi. ndina waavwi sawun mina lindi. ⁴Waangu viga la Soldia ensel kat vilaa ava mban plaga vaaka liga yiga kipmamba ndandi. ndalaa kiyalaa la nimba vla lindi.

⁵Taagwa vililik yambit maa ensel mbik kat vilaa wandi. Diwai krosmba kaalanja Jisas kat kwaaka vivat yambit. Viga ligowun mbik kat. ⁶Ndi kumba waangumba ana ligandi. Tamba laataa yindi. Tamba Jisas wandi. Kiyalaa liga ngini laakiyowun wandi. Wanda vapmba laatndi. Tinda waangu yaa vi mbila. ⁷Mbik kwiyatapman yiga vimba vat ndina mbaapmamba la nimba kat yiga mbuikiyambit. Kiyalaa liga laataa Galiliat yindi. Ngwuk ndina kwupmba aymba ngwuk. yiga mbupmba ngwuk. Mbik kat wawa nyaangit mbitna maawut ke tiviga waa wandi ensel.

⁸Wandi maa waangu kwagalalaa piliga yimbit. Vaaka yelavika solat siga yimbit. Yiga Jisasna mbaapmamba la nimba kat mbupmat yimbit. ⁹Yilimbit maa Jisas ava yambimba mbik kat vilaa wandi. apma vat alimba mbit waa wandi, wutna kwali kwali ndaa silaa ndina mamba kwutaa ndina si kwutaa katsoga wambit. ¹⁰Jisas mbik kat wandi. Mbik ke vapmba. Tak Galiliat yiga tigowun. Wuna mbaapmamba la niimba kat ambukmba mbik. Mpupmbik, wutaa wuna kwupmba yalaa wun kat vigandi waa wandi Jisas.

SOLDIA WAA NYAANGIT

¹¹Wumbit taagwa yilimbit maa waangu kat viga la nat soldia laataa ngepmat yindi. Yiga God kat kwunatiga njambwi nimba kat Jisas laatnda vak mbutndi. ¹²Mbutndi maa God kat kwunatiga njambwi nimbo Judana nima nimbo yisolaa nyaangit ngambundi. Nyaangit ngambulaga soldia kat nima sakwat sanya kwilaa wandi. ¹³Ngwuk kupma ambukmba ngwuk. Ngan sindu kwanin maa Jisasna mbaapmamba la nimba yalaa ndina sim sikwuta kalindi waa ambukmba ngwuk nat nimba kat. ¹⁴Ngwuk kat viga la njambwi nayan mbukngweya nyaangit wutaa ngwuk kat kai wandeyan ndi kat yiga waiganin. Wamin maa ngwuk kat ana siga vyaigandi waa wandi Judana njambwi nimba. ¹⁵Soldia wutaa kwinja sanya klalaa wanja nyaangitmba waa ndinyangu kat yiga mbutndi. Soldia waa nyaangit wuka liga apma vala wangwa waa Juda walindi. Mbambala nimbun wupma waligandi.

JISAS NDINA MBAAPMA NIMBA KAT NJIWWA KWINDI

¹⁶Tak Jisas wanda Galilimba liga nduwi Jisasna mbaapmamba la tamba vili kiyeli kita nimba wokendi. ¹⁷Wokelaa Jisas kat vilagala solat

sigu ngu navin viyaa ndi kat tindi. Ndi kat nat nimba vilaa liga Jisas ana ndi waa maawupmba yelavika lindi. ¹⁸Jisas ndi kat yalaa ngwaymba liga wandi. Nyinangwutna kwondu kipmana kwondu aywaa tamba klalaa ligowun. ¹⁹Kan kwondu ngwuk kat kwiwun mala klalaa ngepma ngepma aywaa yigiyangwuk. Wuna nyaekna si waga wuna si waga wuna nyaekna waagana si waga ndi kat ngu yagugiyangwuk. ²⁰Ngwuk kat mbutuwun, wutaa yetingwa nyaangit ndi kat mbukngwuk maa kwutaa yetigiyandi. Ngwuk kita nda kat wana yelavitapman yilingweya. Ngwuk kat ana kwagalagiyowun. Ngwutnogwinala njimbla njimbla tigiowun. Ngwulogwi tiliwun, kipma nyinangwut ngiligiyandi ngini la liga nandinya waa wandi Jisas.